

# **ITI HASNI KATARANG**

**EDITED BY  
G. A. WRIGHT, 1934**

# **ITIHASNI KATARANG**

**EDITED BY  
C. A. WRIGHT, 1934**

Acc. No. 8796  
Class No. 94.1.1 Book No. 1A.1.1  
Author Wright C. A  
Title Itikani Katarang

---

**DISTRICT LIBRARY**  
**EAST GARO HILLS DISTRICT**  
**WILLIAM NAGAR**

---

*Accession No.* \_\_\_\_\_

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

**Help to keep the book fresh and clean**

*Published by :*

**TURA BOOK ROOM**

*1st Edition, 1934*


*Reprinted, 1952*

*Reprinted, 1977*

*Reprinted, 1980*

*Reprinted, 1984.*

" 1988



Printed by  
M. Dasgupta  
Calcutta (INDIA)

## JA·PANG KATARANG

### BAK I

JAK

Gautama Buddha	...	...	1
Asoka—Modhunath G. Momin	...	..	3
Harun-Al-Rasid—Modhunath G. Momin		..	4
Ram Aro Sita—Jakme D. Shira	...	...	7
India—Miss Holbrook	...	...	15
Sultan Mahmud—Mrs. Aaron N. Sangma		..	17
Lilaboti Mrs. Aaron N. Sangma	...	...	19
Pathanrang—Mrs. Aaron N. Sangma	...	...	21
Alauddin Aro Padmini—Mrs. Aaron N. Sangma			22
Babar—Miss Holbrook	...	...	26
Sher Shah—Modhunath G. Momin	...	...	28
Humayun—Modhunath G. Momin	...	...	29
Akbar Miss Holbrook	...	...	32
Sivaji—Jakme D. Shira	...	...	37
Chan Bibi—Mrs. Aaron N. Sangma	...	...	40
Durgabati—Mrs. Aaron N. Sangma	...	...	42
Jehangir—Modhunath G. Momin	..	...	44
Nur Jehan—Mrs. Aaron N. Sangma	...	...	47
Ahalya Bai—Mrs. Aaron N. Sangma	...	...	50
Hazi Muhammad Mohasin—Mrs. Aaron N. Sangma			55
Paja Rammohun Roy—Mrs. Aaron N. Sangma	...		58
Ranjit Singh—Mrs. Aaron N. Sangma		...	62
Chundra Lela—Modhunath G. Momin		...	64

## BAK II

Romulus Aro Remus—Jakme D Shira	...	69
Persiani Raja Kyrus—Miss Holbrook	...	71
Solon—Miss Holbrook	...	73
Socrates—Modhunath G. Momin	...	75
Homer—Modhunath G Momin	...	77
Solomon—Miss Holbrook	...	81
Gun Gnanggipa—Solomon Faja	...	84
Chaucer—Jakme D. Shira	...	86
Peru Aro Do-bipa	...	87
Griseldani Chakchikani	...	88

## BAK III

Columbus—Mrs. Aaron N. Sangma	...	93
Marco Polo—Miss Holbrook	...	95
Vasco Da Gama—Miss Holbrook	...	97
Magellan—Miss Holbrook	...	98
Joan of Arc—Mrs. Aaron N. Sangma	...	100
Napoleon Bonaparte—Mrs. Aaron N. Sangma	...	104
Florence Nightingale—Mrs, Aaron N, Sangma	...	108

---

## RAK I

### GAUTAMA BUDDHA

Itihasko sena skangan India silrorobeaha aro skia manbeaha, maikai Salaramni a-song a-gilsak gimikni mande-rangko mikbraputaha.

Kristona skang hajalni hajal bilsio Aryanrang salgrosaliramchiko ia asongona napdambaaha, aro Mongolianrangara salgrosaliramchiko rebaaha. Ua jatrangara chibimani a-sal gnaunggipa a-kawerango songdongeaha; aro uamang namsanggriko, dolprakon an-tangtangni ama ambi aro dakbewalrang dingtang dingtang ong-ani gimin dolsa dolgipin baksa nangrimgriknade maikoba dakna nangachim.

Gautama, jeni janggi tangani salranga skango 2,500 bilsimangosa ong-achim, ua dingtang dingtang ong-anirangni gimin chianchibeaha aro ra-dime pilakchin gipgipa torom mingsako bikotaha. Bilsio ritchagitammangui ja-mano Asoka Gautamani toromko gipataha, aro jat aro a-songni nangrim-aniko dingtang dakjebeaha.

Gautama Sakyas jatni rajani bidingo atchiaha. Chonmitingo a-songko sason kama dakchakani ong-gnigipararakosa una skie on-ao uko tarichong-motenggenchim. Ua namsranggipa, chatro ong-enggenchim, aro songni santan-tango donggipa pilak obostaman uko gisik nangatbeenggenchim.

Brahmin kamalrangni boli on-anirang, dakgrikrakgipa jatrangni sikar ka-e roarang, an-tangtangko on-kange re-ro-gipa sadhurang, be-entangtaneko saknaatgipa soinasirang, jaksrangipa maude aro uni kakketgipa jikni kam, saran; pilakan uni chonmitingo gisiko nange chanchironganhang ong-eunaha dongachim.

Aganritinghaengani kride ua uni pantemitinga nitogipa me-tra saksako kimaha. Ua un baksa kusi ong-e dikdiksuana dongaha. indiba depante dejakraka mikkaug nikani salo, ua uni jikko, bisako, ripeugrangko aro una kasagipa maude-rangko wate tom-tomaniko am-na ua re-chakatangaha.

Ua dongkamgipa tom-tomaniko mangsonga, jekon ua bebera-na skiako man-aha; chong-motan jeo ua tom-tom-srange janggi tangna man-gen aro atchitaia aro siarangba dongjawa.

Ua an-tangko on-kangtaitaie bebeni ramako man-na mangsonge re-roroaha. Ja-man ki-tiko ua nitogipa aro sik-dikdik dakgipa burung bolgrimo dongna tik ka-aha. Ua biapo grikgipa chiring dilsa jokachim aro sepango a-barang dongachim, ian chanchibewalna aro gisikni kamko ka-na namchongmotgipa biap ong-achim.

Sakbonga bi-amgipa soinasirangba uni dakako dakpaaha aro bilsa dokna kingking an-tangtangko on-kangchong-motaniko dakaha, indaken uamang ram-sisi ram-dengdeng-pilaha. Bilgrisrang ong-na skang, Gautama an-tangko duk on-aiachide uni am-gipa tom-tomaniko man-ani chol ong-jawa ine uiaha. Ua an-tangko on-kangdugaaniko wat-galaha aro namkala janggi tanganio dongtaiaha. [Uni jik deonaba re-pilangna ua skaha indiba ua re-pilangsrangjaha.] Ua jeko am-a ua unona sepangbeaha ine ua uiaha.

Ua jechi re-angoba uni ka-saa aro tom-tomani mik-kangna pilak mandean aiao inmanaha. Ua skanirangko namatani ja-pangko sandiaha; chongmotan ua skaniranga, simano kuši ong-na ska aro a-gilsako gam man-bena ska. Saknaanirangko gimaatna skang skanirangkon gimaat-chengna nanga, uko dakna ua, "Dunachet Namgipa Ramarango" skiaha: Uaranga iarang:— kakket chanchiani, kakket janggi tangani chol, kakket kam, kakket gisik, kakket katchaa, kakket an-saoa, kakket ku-agana aro kakket cholon.

Ia katarang aro Buddha an-tangni tom-tomgipa aro kasagipa mikkang bimang uni a-songni namgipa mande-rangko gisiko nangatbeani ong-aha. Rajarang aro dal-dal-gipa manderang uni ia gital skianiko knatimna re-batokaha; aro bakbakan ia "Namgipa Ramarang" ko India gimiko namnikataha, aro a-song gipino skiroroaha aro Salaram a-song gimikoba gipataha.

Buddhani sninggiparang China, Japan aro sagalni bang-bea chichangrango skiaha. Aro uamang jechi re-anga uanon Buddhist torom giproroaha.



## ASOKA

Piyadasi Asoka rajani bidingo atchiaha. Ua sason ka'ani niamrangko bang-bee skia man'aha. Ua gisik sram-gipa aro dakna amgipa ong-achim. Ua Taxilani Governor ong-chengaha, aro ja-mano Ujjainniba ong-aha. Uni pagipani siani ja-mano ja-chong ong-e ua Patriao sason ka'aha aro bilsu brini ja-mano Maharaja ine mukut stikatako man'aha. Ua namsranggipa aro sason ka-chongmotani bil gnanggpia ine uina man'a. Ua a-bachengon songnokko baridaproroatna skachim.

Da-ororoni Orissa Provinceni a-sul Kalinga aro Madras Presidencyni salgrochini district ge-gniko ka-rakgipa Asoka ra-sekaha. Uororo jedake ua districtrang burungrara ong-achim uandaken da-ororoba ong-enga. Aganrongenga gita a-brini manderang uarango dongachim. Uamang changni chang a-kaweo tom-tome songdongenggipa manderangni songnokona ong-onbae nok, jam aro a-barangko ra-seke ra-rongachim Asokani ua songo napara indake namgija dak-giparangko champengna aro uni sason ka'ani bilko salgrochi Himalayaona salgipengchi Mysoreni sepanggipa Palarona kingking bariatna ong-achim.

Kalingako dakgrikmitingo ua skia mingsako man'aha, chong-motan dakgriktaigija uni rajoko ka-saachi sason ka'na aro bilchi draachi dakgija rinok rinok uamangko rakina mangsongaha. Ua uni mangsongako uni pilak rai-jona aro uni songnokni a-palrangchinaba aganprakataha. Adita bilsirangni ja-mano Maharajani watatgipa manderang Egypt, China, Japan, Java aro Ceylonona sokangaha. Uko bilchi jakchi uni songnokko sason ka-gija ka-saaosa pang-chakgipa da-gipa tom-tomgipa raja ine mingaha.

Ua Buddhani toromko namnikbeaha. Ua uko bebe-ra-aha aro Sanghani dilgiparangoni saksa ong-aha. Ua matburunrangko boli on-na beng-aha aro uarangko uni cha-aninaba so-otna on-jaha. Jilanirangna ka-sagija dake aro uarangni janggiko gimaatahi namen namja ine ua aganprakaha. Ua sikar ka-jaha aro ka-saninggija dake an-tangna katchaaniko dakjaha. Somoi jokon ua toromni gimim chanchirongaha.

Ua dal-dalbegipa krongrangko mingsinggipa biaprango songdoaha aro uni aganprakanirangko uarango seataha. Uni toromigipa raja ong-ana aro uni daka kama pilakni namgni-na ong-a ine nike pilakan una ka-saaha aro uko mande ra-aha.

Ua an-tangan Buddhist ong-e toromko gipatna kreng-beahaoba pilakni dakbewalkoba dingtangtjaha aro je toromba ong-china an-tangtangni toromko ska gita ra-na beng-jaha. Ua torom mingsako ra-e torom minggipinko chonnikaniko beng-aha.

Beben indakgipa rajasa pilaknin raja bebe aro mitelako man-chongmotna kraa. Saksa itihasko segipa a-gilsakni dal-batgipa mande sakdokni gisepo uan saksa ong-a ine mesokaha.

### HARUN-AL-RASID

Changsao Bagdad songjinmani raja Hurun-al-rasid an-tangni songjinmani manderang maikai dongtokenga uko nina ine rajani ganding chindingko tarigija mande ramram gita gane chine an-tangni montri baksa re-angaha.

Adita re-angon songjinmani ramasamo saksa kana bi-angipako nikaha aro una ka-sachake tangka gong-sako on-aha. Unon kana tangkako man-e aganaha, Na-a ka-sapae on-ode indide angui skoo apsa jar-achi gatingdatangbo Indake agane ua rajani ba-ra jar-teo rim-aha.

Unon raja aiao inmanpile aganaha. Anga nang-ni agana gita dakna man-ja, maina ga-tingdatesa on-ode kasae on-ani mamung namgni dongja.

Unon ua tangkako on-pile aganaha, Dokgija on-gipa-onikode mamung saloba ra-jawa, maina dlogkija on-gipaoni-kode anga mamung saloba ra-jawa ine anga Isolui himungo mikhetmanaha. Unon raja alamala sagija ga-tingdataha. Unon kana rajako mitele uni on-aniko ra-rikaha.

Ia ong-ako nike sal gipino ua kanako an-tangni mik-kangona rimangchina raja montriko agapaha. Rajani ge-eta

gita sal gipino ua bi-anggipa kanako rajani mikangona rim-baoa kana rajako olakie aganaha, Mainiba a-sel angko rimbaatama?

Unon raja aganaha, Mejalo nang-ni bi-ana anga tang-kako on-on na-a an-tangko ga-tingdatosa tangkako ra-rik-ahani gimin na-a ua katako aganna nanggen. Aro aganon bebeko aganna nanggen, tol-ode na-a sasti man-gen.

Unon kana an-tangni obostako aganna a-bachengaha, Maharaja, angni atchiramde ia Bagdad songjinmaon ong-a angni bimungko Baba Abdula minga. Angni ma-a paani simanoa anga uamangni gam gimikkon man-rikahachim aro uchia anga ua mangsotchetko breenba a-song gipinchi mal ra-roroc badinggipa mahajonrangna bhara on-rongachim. Changsao saksa mahajonni malrangko ra-ange Balsora songjinmaona sokon malko ra-one donmano an-tangni utrangko moe songtangchina re-pilangengachim.

Unon ramadilo saksa soinasiko grongaha aro agangriken agangriken soinasia angna aganaha, Na-a gam bang-ako man-na skode indide ia a-brini jatchio gam bang-begipa a-kol damsas ghang, nang-ni utmangsotchetko gape ra-baoba ra-ha-gija gitar ong-aigen. namungba bon-angjawa.

Indake aganako knae anga namen kusi ong-beaha, aro anga uko inaha O soinasia, na-ade toromi mande ongani gimin na-ade gamko namnikja Uni gimin ka-sapae nara ua gamni a-kolko angna mesokode ut mangsako gam gata ghang nang-na on-genchim. Unon soinasia namnikkujae Nang-ni ut mangsotbriko gam gata ghang on-atode ua gamko nang-na mesokua margen ine aganaha, Anga uko namnike kurachakaha, aro ong-one mesokbo hai ine soinasina aganaha, Unon chinga a-bri a-bimanduko adita doang-manve a-gitok damsana sokaha. Unon soinasia, Ianon tom-tom dongbo aro utrangkoba ianon kabo, maina ianon gamko gatna nama ine agauenba wa-alko so-aha aro montolko jarion sepangoni a-a korakgni dake bretaha, unon ning-chiniko niatoa itui nok tesako nikataha. Ning-china wapange nioa tangka aro sonaan gapako nika angni dokra-rango gape braenba ra-tokmano ut mangsotchetko gate re-chakatrasion timi ge-sa nambeako angna mesokenba

uko an-tangni chola jepo sike ra'e ong-katbaon ua a-kol skang gitau a'a namcheptaiaha. Unon anga soinasina ut mangsotbri aro an-tangna ut mangsotbriko ra'e ramako re-angaha.

Ontisa re-angarion angni gisiko indake chanchiaha. Anga maina ut mangsotbriko soinasina on-manaha? Mangchikung bipilkuna ine chanchie angni utrangko donangkuemung jarikange bi-ekuaha, aro aganaha, O soinas, na-ade toromi mande ong-ani gimin nang-nade gamko nangja; da'o mangchikungko on-pilbo. Angni bi-ako knaon ua Moangkubo ine aganaha. Unon anga ut mangchikungko moange adita re-angon, da'o soinasio ut mangkolatchi dong-kuenga, mangchikungko bi-etaiode on-kugenkon ine chanchitaie aro angni utrangko donangtaie bi-etaiaha. Unoba soinas rakgija on-ataijok. Da-ode angaba mangsotdok ong-jok, indiba uchi mangkolgrik dongkuenga, ukoba bi-etaiode on-kugenkon ine chanchitaiemung re-angtaie bi'e nioa ua mangkolgrik dongspakon on-atkamsrangaha. Unon anga da-ode bang-aha, namaha ine chanchie re-angtaiaha. Adita re-angon anga chanchitaiaha, oe anga bang-bea gamkon man-ade man-jok indiba anga inditan mikbokgipa papi; chonbegipa soinasini ra-anggipa timinan mikboktaie re-angemung ua timikon bi-etaiaha, aro aganaha, O soinas, na-ara ua timiko maina ra-angengade, ukoba anguan donangsrangbo na-ara ine bi-on soinas ukoba bikote on-ataijok. Unon anga timiko oe nioa sam gapako nike sing-aha, aro aganaha, O soinas, na-ara angna ka-saen pilakon on-enga, uni gimin ia samara maina nama ukoba aganpabode.

Unon soinas samko jako ra'e aganaha, ia samko jakrani mikrono nongode a-gilsak gimikoni gam donggipa a-kolrangko nika ine aganemung angni mikrono nongatoa a-ning a-sak jojrangrang aro a-gilsak gimikkon pang-sang-sang dake nikaha, unon anga jakasi mikrono nongode nikbatgen ine chanchicuba uchiba nongatchina ge-ctoa. jakasini mikrono nongode kava ong-gen, uchide nongnabe ripeng ine soinas beng-aha. Indiba anga soinasini aganako tol-engasa ine chanchie uchiba nongatchina jetjetari ge-etani gimin ua nongataha.

Unon rang-san wala gita andalaha. Anga grape grape uko namatpilhina soinasiko mol-molahachim, indiba ua ka-onangesa, bebegijagipa mikbokgipani ian bite ine aganemung angui ut mangsotchetkoba moe ra-angaha. Angara saknae aro duk ong-e grape dongrikaiaha. Indakmitingo Balsoraoni Bagdadona songregiparangsa ka-sachake angko uto gateuba rimbapaaha. Anga mikbokani a-selosa indaka obostao ga-akaha ine nike dokgija on-gipaonikode mamung saloba ra-jawa ine Isolni bimungko rim'e mitchetaha. Ian angni kata ine kana mande aganaha.

### RAM ARO SITA

Ru-utbea bilsu re-angaha. Indiani salgrochipak Ayodhya songjinmao Dosorot minggipa dal-gipa raja saksu dongachim. Da-ororo Ayodhyako Oudh ineba minga. Uni jik sakgitamchim Uamangni himungrang, Kausalua, Kaikeyi aro Sumitra Uamang sakprakan depanterangko ba-aha, indiba da-o Kausalua depanteni gimin segen.

Kausalua Dosorotni jikmongma ong-achim. Ua nambegipa depante saksako ba-aha, aro uni bimung Ram ong-achim Ua nitobegipa, bebegipa, manigipa aro sontolgipa ong-achim. Uni pagipa aro songnokni pilak mande-rang uko namnikbea aro una ka-sabeachim. Ramni chasongni pilak raja panterang Ram gita ka-donggipa, bilakgipa aro ka-saninggipa ong-tokjachim. Ua jedake nitua indaken uni kamrangba ong-achim.

Unomiting Janaka rajao nitobegipa demechik saksu dongachim aro uni bimungko Sita mingachim. Sitani pagipa dal-begipa Sivani chri minggipako dake, je pantean ua chriko changsa goe be-tongutgen, una an-tangni nitogipa demechikko bia ka-e on-gen ine pilakchin aganprakataha. Pilak mingsinggipa, dal-dalgipa raja panterang Sitako man-na ske ua tarigimin chriko be-atna joton kana re-batokaha. Uamang inditan kana amgija uko pegomdole be-atna joton ka-beaha. Uamangoni saksaba uko gongdolatna mang-mangba man-jac kratcha-e re-angpiltokna nang-aiaha. maina

uan jrimbegipa ong-achim. Ja-man ki-tiko Ram aro Lokon adasa an-tangtangni chriko ra-e unona re-baaha. Janaka raja, ua chriko be-atna joton ka-e nichina Ramna on-aha. Ram ua chriko ra-e goatna salkringon rang-san ua jrigipa chri tong-gui be-tongaha. Nigipa manderang Ramni dakako, uni bilaka aro changako nike aiao inman-tokaha aro pilakan kusi ong-an-gape inchrotokaha. Indake Janaka raja an-tangni nitogipa demechik Sitako ua apsan salon Ramna bia ka-ate on-aha, aro iana pilak manderang kusi ong-tokbeaha. Uni ja-mano, Ram aro uni nitogipa jikgipa Sitako rimbite pagipani songjinmaona re-bapilaha.

Ram aro uni pilak jonggiparang Ayodhya a-songni rajani nokrango dongtokaha. Janapgimin gita Ram inditan namgipa aro bilakgipa ong-ani gimin jonggiparang uni bilaka aro ka-donganina rasong chabeachim. Ram an-tangni jonggiparangni gisepo Lokonna ka-sabata, aro namnikbata-chim aro uan uni nambatgipa ripeng ong-achim. Uamang damsan dongoba jegrikarang aro namnikgrikgianirang dongjachim.

Ja-mano Dosorot an-tangan budepa ong-aha aro an-tangni ja-mano raja ong-rikgnigipako seokani sal ong-aha. Dosorot raja aro pilak manderang Ramko raja donna sikbe-achim, maina uan pagipa aro rajioni nikanio nambegipa maude ong-achim. Indiba uni ma-detang Kaikeyi uko namnikjachim. Ua an-tangni depante Bharatkosa raja ong-atna skaha.

Iani ru-utgijan. changsao indake ong-aha, Dosorot raja dakgrikmitlgo uni gari chakani ra-chakgipa dambengo on-changgipa bol ge-sa be-changahachim. Ua uko salna man-jae a-sel nanganio ong-nasiengachim, indiba uni jikgipa saksa Kaikeyi un baksa gario dongpaenba a-sel ong-ani-ko-jokatani cholko nike an-tangni jaksiko dambeng uatongo sikkroke gari chakako rakatenba gari chalaina man-aha. Raja an-tangni jikgipa Kaikeyini ka-donganina kusi ong-beaha. Ua inditan kusi ong-aha, Kaikeyi jeko bi-genoha minggni on-aniko jechakgija on-na kurachakaha.

Ia a-sel ong-ani ruutkujaon. Dosorot an-tangni pal raja ong-rikgnigipako seokani sal sokaha, aro ua salona

kingking Kaikeyi segipani minggui kurachakaniko bi-kuja-chim. Da'o ua Ramko raja dongen ine uisooa rajako seokani sal ong-na skang, walo sriksrik rajachi re-ange. O raja nang-ni angna ku-rachakgimin on-aniko da'o angna nangaha ine aganaha. Skanggipa Bharat nang-ni pal raja ong-rikchina, gnigipa Ram bilsu chibrina kingking burungchi rikgalatako man-china ine agame uni ja'o tugope bi-aha. Jikgipani kragija bi-aniko man-na raja namen duk man-beaha maina, ua Ramna ka-sabea aro ukosa an-tangni palo raja donna gisiktango tik ka-soachim. Indiba Dosorot namgipa aro an-tangni ku-rachakgiminko pe-gijagipa mande ong-ani gimin, duk ong-oba jikgipani bi-aniko dakna ku-rachakaha Ayodhyani pilak manderangde iani gimin mamungkoba knapakujachim.

Indaken pring seng-ahaoa ua songnokni manderang Ramkon rajana seokgen ine chanchie. uko name tariate namgipa gario gate Dosorotni dongramona rimbaaha. Mongmarang aro gurerangba uni ja-man ja-man re-baaha. Mechikrangba an-tangtangni kelkirango nitogipa pulrang aro nisanrangko dake tarisoaha, aro uni re-bamitingo kelkirang gita pulrangko galonattokaha; aro pilak manderang, Ram raja ong-gen, Ram raja ong-gen ine sorokjoljol inchrotokaha.

Uandake namang rajani dongramona sokbaaha, aro nano dala alaniko dakengachim. Raja singhasono chata gipsokko wine aro antanga santagchi dal-dalgipa manderangko rimbite asongengachim. Uon Ram garoni ong-one, ua tom-aona re-ange pagipako tugope olakiala. Pilak manderangan Ramkon raja seoknasienga ine chanchie sriksrik nie dongtokengachim Indiba Dosorot pilak manderang knasokna gita, Anga mingsa ku-rachakaniko angni jikgipana ku-rachakaha, ua da'o bi-enga, anga uko pe-na manja. Anga angni pal Bharatko raja donna nangaha. Ramkode bilsu chibrina burungchi rikatna nangaha ine agame raja jumanu mikango asonge gam-bee grapaha Uno tom-gipa manderang pilakan. Bharat raja ong-jachina: hai Ramkon drae raja donna ine chriktokaha. Indiba Ram jrip dongchina namaugko beng-e. Rajani agana gitau ong-china angan burungchi katanggen ine aganprakaha.

Uandaken uamang Bharatko raja donna tik karaha. Ramde burungchi re-angna tariaha. Ua an-tangni jikgipa Sitana ka-sabeoba, ua rajani demechik ong-ani gimini burungo dongna amjawa ine chanchie an-tang baksa rim-angna sijkachim. Indiba Sita setangna ka-sachongmotgipa me-chik ong-achim. Ua mamung duknaba kenjaha Sioba tangoba burungon setang baksa donggen aro inamung saloba segipako watatjawa aro ua un baksa re-pachong-motgen ine ua agana. Burungo dongge duk ong-a aro nambegipa, nitobegipa, an-senggipa rajani dongramko watangna duk ong-anina bate, Ram donggijao saksan dongrike duk ong-nikon ua dal-nikbataha. Uandaken Sita segipa baksa burungchi re-pana taripaaha. Ramni ka-sabatgipa jonggipa Lokon uamang mangmangko watatna sijkae uamang baksa re-angpana tariaha.

Uandake katangani sal sokahaoa Ram an-tangni nitogipa rajani dongramko watangaha. Sita aro Lokonba ki-sang ki-sang ja-achi Dosorotni dongramona re-angpaaha. Pilak manderang sorokjoljol chadenge uamangna graptokaha. Uamangba uamang baksa rajani dongramona napange an-tangni nitogipa mingnamgipa ganding chindingko oktoke bigilniko dakgipa nitogijagipa gawanirangko ganskaaha. Indake Ram an-tangni pagipa, Dosorotna chaunggitamna kingking bon-kamgipa salamko one grapaha. Raja uamangko songjinmako badejana kingking gario gate watat-aha. Songjinmako badeahaoa uamang garioni ong-one ja-achi nok grigipa burungjoljol re-angaha. Ua burung inditan dika, aro burungni bolui biterangna agre mamung cha-aniba dongjachim. Burung dikbeani gimin matcha-rang, matchokrang aro ma-manti matburungrang bang-beachim. Sita uandakgipa burungrangko songtango nirkongjaani gimin uarangko nina namnikbeaha. Aro pangnan uarangko nie an-tangni segipa baksa dongge rajani dongram nokko gualpilaha. Ua burung jatchio Ram aro Lokon chonggipa noktop te-sako rikaha. Uano uamang bolui biterangko cha-esa janggi tangaha.

Indake Ramni burungchi katangani gimin Dosorot namon kalimaha. Aro denanteni katangani walon sae.



prineon siaha. Unou manderang uni siani ja-mano Bharat-ko raja songalia. Indiba Bharat iako dakna an-tangko kramikjachim. Ua Ramni katangmitino Ayodhyao dong-jachim. Bharat ma-gipani ka-saninggija daka kamko namen namukjaha, maina ua adatangni tangengo uni kosako raja ong-ua ontisaba sikjasrangachim. Bharat pagipani singha-sono Ramna jitarangko Ramni pal done pagipani dal-gipa songnokko sason ka-aha

Ram, Sita aro Lokon mande grigipa burungni nok bi-sao bolni biterangko cha-e kusi ong-e dongmitingo Indiani sal-gipengchipak Rakshasas minggipa skalrang bang-beachim. Uamangni rajako Ravan mingachim. Da-o uamangoni skal saksu Surpanakha minggipa, Ravan rajani nogipa, Ramko burungo nike una mikchaaha aro uko kimna skaaha. Ram uko namnikjasrangchim. Surpanakha Ramko ma-manti cholchi man-na joton ka-beaha. Ram uko ka-onangbee uni nachil samsako den-pake wataha. Ram uko ka-onangbataha, maina ua Sitako cha-china an-tangni adatangko ge-etahachim. Surpanakha saknaa aro kratcha-an gape Ravana katang-aha. An-tangko indake saknaa aro kratcha-atani gimin Surpanakha Ramko a-jak sokna sikbeaha. Uni gimin ua Sitako rime katchina Ravanko ge-etaha. Ravan skangon Sitani nitoanini gimin knaaha aro uko man-na sikbeachim. Indiba Ravan mikkaug para iako dakna kenachim. Uni gimin chalaki dakesa uko rimena mangsongaha.

Indaken salsao uamang burungo chongipa noko dong-engmitingo, Ravan skal saksako sonani matchok pilate namangni dongram nokni saraona watataha. Ua matchok nitoba, uni jarara tangkani, uni gronga gamchatgipa ro-ongni aro uni be-en gimikon sonachi toka gnangchim Maibakai Sita ua matchokko nikataha. aro uko man-na sikbeaha. Uko nikarion Sita an-tangni segipa Ramko uko an-tangna rim-echina ge-etaha. Ram pangnan Sitana ka-sabea aro uko kusi ong-atna uni ge-etako dakna jechak rongja. Uni gimin lanpakoba jikgipani aganako dakna kurachakaha. Re-angna skang Ram an-tangni jonggipa Lokonko uni sokbapilkujana kingking dongdilsoschina aganangaha. Indake agane ua an-tangni chriko ra-e sonani matchokko rikangaha. Adita rikangon Ram matchokko

srpaha, indiba ua uko rim-na man-jachim; maina uni rim-na dakon ua matchok chel-e chel-e katangroroaha. Ua uko rim-na joton ka'en ka'en chel-kalachi sokaugaha. Jamawo ua an-tangni ra-bitgipa chrichi ua matchokko ka-onange goaha. Unon matchok Ramni ku-rang gita tiktak, Lokon, augko jokatbo, Lokon, augko jokatbo ine chrikaha.

Sita an-tangni segipani re-bapilako niso'e dongeng-mitingo ua okamani ku-rangko knaaha. Ua Ramni ku-rang gita knaarion Ramna maiba a-sel ong-chongmotaha ine chanchie namen jajrengbeaha. Ua Ramko dakohakechina jonggipa Lokonko ge-etaha. Lokon bochitangko burung-grimo saksan watangna sikjachim, aro ua Ramni katakoba pe-na sikjachim. Uni gimin ua re-angna jechakbeaha. Indiba Sita uko mamanti kragija katarangchi saibeahani gimin sikjaoba re-angaha, indiba re-angna skang ua nok bi-sako duule line ge-sako salenba, Na-a mamung saloba ia lineko ga-bate re-nabe. Ia lineni ning-o dongenga dipet mamung a-sel nangani nang-ona sokbajawa aro mamungba nang-ko nangija dakna man-jawa, ine agan-ange Ramko dakchakna re-chakatangaha.

Lokonni re-angmiting o ua burungni nok bi-sao Sita saksanahachim. Indakmiting o Ravan maikai Sitako rimangna mangen indake sepango time dongengachim. Ua ia somoi-on Sitako chalaki dakachi rimangna mangen ine nikaha. Ua antangko soinas gita tarii Sitaoniko maiba on-aniko bina ine re-baaha. Sita kasachakgipa ong-ani gimin soinasiko nikarion adita cha-ani biterangko pialao ra-bae on-aha. Indiba Ravan uarangko aro done on-ani gimin uni on-ako ra-na jechakaha. Sita ong-gija dongna kenachim, maina ua uamangni bewal gita soinasirangna maikoba on-na nanga ong-jaode soinasirang sao on-rongachim, aro uamangni sao on-ara pangnan tik ong-rongachim. Lokonni sale donanggimin lineko ga-bate uni jako on-echina Ravan Sitana aganaha. Ong-jaode ua uko sao on-gen ine kenataha. Uni gimin Sita ua lineko ga-bate on-anirangko Ravan rajani jako on-echa. Unon Ravan on-anirangko ragija Sitako jako rim-ketaha, aro an-tangni balwani gario gate uko rime katangaha. Indake bolrang, a-brirang aro chiringrangko batangmiting o Sita an-tangni

jaksan aro skoo illuruani ba-rako galonangaha. Aditani jamano Ram aro Lokon nok bi-saona sokbapilaha. Uamang Sitako nikejahani gimin ka-suangsuang dake ichi uchi katjojoe okamaha, indiba Sita pilakoba dongjachim. Uni gimin namang adasa ontisaba dongdikgija, cha-gija ringgija Sitako am-na re-chakatangjok. Uandake uamang adita chel-e re-angoa Sitani gale donanggipa jaksan ge-saku nikaha aro on-tisa re-angtaioa ge-gipinko nikaha. Unikoa uamang adita chel-e re-angtaiaha aro matako man-e tue dongenggipa Jatayu minggipa do-o mangsako nikeaha. Nikatchengode Ram ua do-oan Sitako chike cha-chongmot-aha ine chanchiengachim, indiba sepangona re-angoa ua do-o maikai Ravan Sitako drae rimangaha aro maikai Sitako ra-sekrikpilna joton ka-bee dakgrike anako man-e sinasiengachim uarangko tale Ramna ag-maha.

Iarangko aganman-o ua do-o siangaha. Ram ia do-oni manggisiko namedake tarie ganchiko rike so-aha. Ram Jatayuni katarangko knae namen duk ong-beaha aro Sitako am-na salgipengchipak re-angaha. Ram aro Lokon bang-a a-brirang, chiringrang, chibimarang, aro bang-a aiao inmanpilgipa ong-ronggijanirangko ramao nikangaha. Jamau kitiko uamang Sugriv aro Honumanko grongaha. Sugrivarua makkerangni raja aro Honumanara rajani dal-gipa gener-l saksu ong-achim. Ua somoio Sugrivarua antangni jong-gipachi singhasonko ra-seka man-engachim. Sugriv Sitako man-pilua Ramko dakchekua ku rachakaha. Uni gimin Ram uko uni gimaatgimin singhasonko man-pilatna dakchakaha.

Uandake namang Sitako am-na Honumanko Lanka chichangona watataha. Bang-a aiao inmanpilgipa ong-ronggijanirangko batangman-o aro bang-a dukrangko chakangman-o Honuman ua chichangona sokeaha. Ua chichang gimikoniko Sitako am-beaha. Bon-kamau ro-ongchi killa kadulginin bari darasani jatchioniko adita skal me-chikrangko nitimate Sitako koedi gita donengako bolo gakate niatiba ua nikataha. Bak rimbachengonin Ravan Sitako antangk kunchina mol-molaha aro bang-a boksirangko onaha. indiba Sita, Ravanni mol-molako knachakjaha. Ramna agre uni gitel pilakba gri inesa ua aganchakajachim. Uandake mol-moloba knachakjaani gimin Ravan uko duk ong-

Alana ine koedi dake donaha. Uko nitimgipa skal me'chik-  
taugba Ravanko kimna kurrachakchina jringjring una sastiko  
on'e singaha. Indiba Sita uamaagni duk on'e singani-  
rangna kenjaha, aro mamung saloba Ravanko kimna kurr-  
chakjaha. Sitani inditana kingkung duk on'e grape, sintir-  
denge ram'sisi ram'dengdengpilako nike Honumanni kar-  
tongo una kasachaka napaha. Honuman Ramni onratgipa  
jakstemko on'e, ruutgijan Ram nang'ko ia dal-begipa  
dukoniko jokatna antangni sipairangko rime re-bagen ine  
agane Sitako kardongataha. Indine agane Ramna pilak  
ong'a obostarango agama ua re-augpilaha.

Honuman chichango dongmitingo bang-bea dukrangko  
manaha ine agana gnaug. Ua chichangni manderang  
Honumanko rime uni ki-meo kilko kadape kerasin sim-  
bole wa'al so'e uko wataha. Sita Honumanko wa'al kamja-  
china antangni miteo bi beaha. Uni gimin wa'al Honu-  
manni kimil dingsakoba kamjaha, aro on'tisaba wa'alui  
bisak seenggachim. Honuman wa'al gnaug ua chichangni  
manderangni nokrang aro a-barangko katmikmikana aro  
wa'al uamangni mi misirangko bon'e kamtokaha. Indake  
umoni manderang duk ong-beaha. Ua Sitani donggipa nok-  
kode watehangaha aro ukosan manguang kamjaaiachachim.

Ruutgijan Ram antangni sipai kotokrangko rimbite  
Ravan rajako dakgrikna re'angaha. Makrerang Ramko  
Indiaoni Lanka chuchangona sagalko ro-ongchi dolong kabate  
dakehakaha. Uamang ua gitan re'ange Ravan rajako dak-  
grike amaha, aro Sitakoba antaug baksa rimbapilua man-  
aha. Kabatgimin dolongni chin da'onaba dongenga ine  
agana.

Ram Sitako man pile pagipani songnokona re-augpilaha.  
Bharat adatangni re-bapilana kusi ong-beaha aro ua uni  
pagipani singhasonko una oni soaha. Indake Ram burung-  
chini re-bapilmano pagipani singhasonko man'rikaha.  
Indiba Ram antangni jikgipa Sitako Ravan baksa bang-  
bilsina dongna nangija gri ong-jawaha ine kenchake bang-  
lakko onaha. Jarman kitiko Ram ua bebegipa me'chik  
ong'ama ong'ja uko nua gita dal-begipa ganchiko rike uno  
wa'alko so'e ching-chaenggipa wa'alo Sitako soaha.  
Indiba Sitao nangija dongjani gimin wa'al uni kni ding-

sakoba kamjaha. Ramni inditan duk on-engako nike Sitani ma-gipa a-ako ku-angate Sitako rimnapungaha Ja-mano Ram uko am-beoba nikjajok. Uni gimin Ram janggi tanga gimiko duk ong-aha, aro an-tangni bebesranggipa aro namsranggipa jikgipako an-tangni kragija duk on-ako chan-chie on-tisaba kusi ong-nan manjaha, Aro uni kasabegipa jikgipant una bebegipa ka-saani uuoni chel-na man-jaha.

## INDIA

India a-songara manderaragipa aro rokom rokom jatrangan gapgipa a-song ong-a. Ia a-songni manderangni ku-sikrang a-gilsakni gipin jatrangoni dingtangsraaga. Manderangni torom dintang dintang ong-ani gimin uamangni cholonrangba dintang dintang ong-a. India a-songo mande sak koti kolatchina bate donga. India bang-a manderang apsan niamni ningo aro apsan sason ka-ani ningo dongna nanga, ong-jaode uamang tom-tome aro kusi ong-e dongna man-jawa.

India a-song dal-begipa a-song ong-a, Germany, Austria. France aro Spain a-songrangko dondimode, badita dal-genchim India a-song inditan dal-a. India a-song dal-asan ong-aia indiba uo dal-dalgipa chibimarang, apalbegipa a-kawerang. chubegipa a-brirang aro ding-begipa a-gisirang gnang.

Dal-batgipa chibimarang. Ganges, Indus aro Brahma-putra chibimarang ong-a. Uarang Indiani salgroom jokbara Ganges chibima uni salaramni a-kawejoljol jok-bie Bengal Bay-o braea; Indus chibima Punjabko jokpake Arabia Sagalo braea, aro Brahmaputra chibima. jeko an-chinga Songdu mingronga Assamko jokpakani gimin an-chingni chibima ine an-chinga aganna man-a. An-chinga i uni nitoako, dal-ako aro mingsinganiko uia.

India a-songni jatchijoljol a-kaweari, uko Hind istan ine mingrongbata. Ia a-kawe gitan Ganges chibima jokbaani gimin a-sal gnanggipa a-kawe ong-a. Uni salgipengchipak a-a chudata, uko Deccan ine ming-a Deccan jolni sagal

rikamo adita a-kawe dake donga aro uarango boudor-rangko daka. Chibimarang a-kawerangko jokronga aro a-kawco. a'a gamna, badingua aro rama re-na manderangna altuani gimin bang-a manderang a-brirango dongana bate a-kawerango dongna namnikbata.

A-gilsako donggipa a-brirangni gisepo chubatgipa a-brirang Indiao donga. Ua a-brirangko Himalaya ine minga uan Indiani salgroo donga. Ua a-brirang 1,500 mail ro'a aro chubatgipa, Everest minggipa, a-bri dotsa 29,000 foot-na bate chubata. Bang-a gipin a-brirangba gnang aro a-kawerango donggipa manderangna bate a-brirango donggipa maderangna an-sengbata, maina balwa ka-sinbata.

India a-songo mikka waani gimin chnchiate niode jimbeani gimin aiao inmanpilgen. A-gilsako gimikna bate mikka wabatsranggipa biap Assamo donggipa Cherrapunji ong'a, aro Indiani saliramchipak Sind jolo on-tisaba mikka wajasrang. India a-song ding-begipa a-song ong'a aro uni ka-sinbatgipa biapmangba Englando ka-sina gita ong'ja.

India a-songo rokom rokom matburungrang gnang. A-gilsakni dal-batgipa matburungrang, chongmotan mong-marang, matcharang, mapilrang, matchapengrang, matchu aro matma burungrang, jerang baksa matcharangba dak-grikna kenpila, indakgipa matburungrang bang-bea gnang. Kenbegnigipa singhorang da'o bang-gijasan dongaiahaoba skangode bang-been dongachim. Aro rokom rokom dal-dal-gipa bisigrakgipa chipurang, chong-motan chipu nokma chipu gram aro ua gita gipinrang jerangni suode, mande mamungdakeba tangja, indakgipa kenbegnigipa chipurang gnang.

Da-ororo Delhi songjinma India a-songni skotonggipa song ong-enga. Delhi songjinma gitchambegipa songjinma on'za. Dal-dalgipa Mughul rajarang aro una skang Hindu rajarangba uano sason ka'aha. Uno nambegipa aro gamchatbegipa Shah Jehami rikgipa Do-deni Singhason gnangchim. Uko Persiani raja uororo donggipa rajako ame uko aro un baksa gamchatgipa ro-ongrangkoba ra'angaha. Shah Jehan Agra songjinmaoba an-tangni jikgip-

ako gisik ra-na gita a-gilsakno nitobatgipa gopramko rikaha. Ua gopramni bimungko jikgipani bimungchi Taj Mahal ine mingaha. Calcutta, Madras, Bombay aro gipin gipin bang-bea songjinmarang gngang.

India a-songo mi, gom, misi, dal, me-rakku, grit, cha, alu aro gipin chagiparangba bang-a gngang. Lebu, te-rik, te-gatchu, te-brong, kompiram, te-mit, anaros aro gipin gipin biterangkoba man-ronga. Sona, rupa, silgrak, koila, kari aro indakgipa bosturangkoba a-aoniko bikotronga. India a-songo manderang ma-manti bosturangko dakna man-a aro badingani cholrang gngang. Ramarang, sorokrang, reil ramarang, jahasrang, post office, telegraph office aro schoolrang bang-bea gngang. Pilakko agantokna somoi dongja.

India a-song A-chik manderangni a-song ong-a. Na-a nang-ni a-songni gimin name chanchiahama? Sa sa India a-songko dilgiparang ong-a? Sa sa India a-songko sason ka-e name tom-tome rakina jotou ka-eng? Mande jinmani namgnini gimin chanchigiparang sa sa? ong-a? Na-a India a-songo donggiparangni gisepe saksa ong-ani gimin na-a kusi ong-jama? Na-a India a-songna, chong-motan a-songtang-na, mai maiko dakenga? Na-a aratgipa, tol-e agangipa, kakketgijagipa, an-tangni giminsan chanchigipa ong-aide, na-a nang-ni a-songna mai maikodakenga? Na-a bimchip-gipa, namgipa, bebegipa aro kakketgipa mande ong-ode, na-a nang-ni a-songko dakchakgipa saksa ong-chongmota. Sak-prakprakan dakchakgiparangoni saksa ong-pana jotou ka-na hai.

## SULTAN MAHMUD

Indiani mingsinggipa raja saksa, Asoka minggipa, bang-a a-songrangko ame uarango Buddhist torom-ko prochar ka-aha. Ua gamko man-na ka-donge gipin a-songrangchi manderangko watatjaha, indiba toromko prochar ka-e gipat nasa bang-bea manderangko watate prochar ka-ataha. Indiba gamni a-sel bang-a manderang re-barongachim. Uandakgipa raja saksani gimin da-o janapgen. Uni bimun?

Sultan Mahmud. Uni bimungko knarin ua Musalman ong-a ine na-simang uia. Da-ororoni Kabulu Ghazni songjinmaan uni dongram songjinma ong-achim. Uan bils 997-o raja ong-na a-bachengaha. Uni pagipa aro Lahoreni rajana gisepo jegrikani gnanngchim. Mahmud raja ong-on Lahoreni rajana sastiko on-na skaha. Mahmud Indiani bang-a rajarang baksa dakgrike uamang-na bang-a gimaaniko dakalia. Uororode India bang-a chonchongipa rajorang aro rajarang gnanngchim. Raja saksa raja sakgipin baksa melijachim. Uni gimin Mahmud sakprakprak pilakkon amna man-aha. Maina Mahmud raja saksako rim-gittangode gipin rajarangde ka-dingsteke niaiaachim. Mahmud Lahoreni raja Joypalko rim-chengaha. Ua dakgrikao Joypal amako man-aha. Mahmud uko rim-gittangode. Ja-mano, Joypal Mahmudna bamon, Mahmud uko watatpilaha aro uni sona nokko on-pilaha, changgnina kingking amako man-e Joypal kratcha-beaha. Ua duk ong-e aro kratcha-e nom-bokpilaha. Ja-man ki-tiko ua wa-alo bilprue siaha.

Mahmud changchi-snina kingking India napaha. Pilantian ua bang-a gam aro gamchatgipa bosturangko rangrongachim, aro chol man-ahaon gamna mikboke Indiaona re-bapilrongachim. Badiaba badiaba rajarang dakgrikao amako man-e bilsianti Mahmudna kajinako on-na ku-rachak-aha. Mahmudni mikkangode rajarang kenan til-til tal-tal daktokaiachim; indiba uni songtangchi re-angpilahaode uamang kajinako watatjachim aro Mahmudko hobil dak-pilauachim. Ia rajarangko sasti on-na gita ua pil-nupil Indiaona re-baaha. Uororo Indiani bang-a mite nokrang gamchatgipa gamrangan gapachim. Dala aro chona pilak manderangan aro rajarangan mite nokna gamrangko ka-sae on-rongachim. Na-simang da-ororo bang-a mite nokrangko nikna man-a aro uarang dal-dalgiparang ong-a. Skango iarangna bateba dal-dalgipa mite nokrang dongachim.

Ia mite nokrangko Mahmud nikaha. Ua bang-a dal-dalgipa mite nokrangko ra-seke ra-aha. Indiani mapo na-simang Gujarat a-songko nika. Gujarat a-songo Somnath minggipa mite noko bang-a gam, tangka aro sona dongachim. Mahmud ua mite nokko ra-sekna sikbeaha. Ua mite nokko rakkigiparang bil ama dipet champengna joton ka-aha. Mah-



mudna bang-a tangkarangko on-na ku-rachakaha. Indiba Mahmud aganaha, Anga miteko pale cha-na re-baja, indiba miterangko gimaatnasa re-baaha. Indine agane ua miteko an-tangni tonualchi bilsa dokpretaton mite be-kningaha, aro miteni bimang ning-oni bang-bea gamchatgipa gamrang ong-katbaaha. Mahmud uarangko man-e namen kusi ong-beaha, aro ua bang-bea gamrangko ra-e Ghaznichi re-ang-pilaha.

Mahmudko ra-seke ra-anini giminsan na-simangna aganengpiti, ua bang-a nama kamrangkoba ka-aha. Ua duk man-giparangni dukrangko chel-atna man-na gita bang-a namgnirangko dakaha. Saoba mande saniba kosako namgi-jako dakode ua mandeko sasti on-rongachim. Ua an-tangni manderangko leka pora skiatna dal-begipa schoolko dakaha. Na-simangni gisepo mitam mitam scholarshipko man-a; Sultan Mahmudba uandake scholarshipko on-paachim.

Mahmud Persia a-songkoba ra-sekaha. Changsao Persia a-songo adita dokprete ra-gipa manderang, me-chik saksani depanteko so-ote uni pilak tangkarangko cha-ue ra-aha. Ua me-chik uamangko Sultan Mahmud nalis ka-aha. Mahmud aganchakaha, Ua a-song angoni namen chel-a; indita chel-a a-songoniko anga ua dokprete ra-giparangko maikai champengna man-gen? Me-chik aganchakaha, Raja ong-e aiotko rakina man-jaode, a-songko sason karani mai namgni? Ia ramrangipa me-chikoni indita raka katako knana Mahmud on-tisaba ka-onangjaha, indiba ua chel-a a-songo dokprete ra-giparangko rim-na nambata cholkosa dakataha.

## LILABOTI

Ghaznini raja, Sultan Mahmud Indiaona bang-a chang re-baachim, indiba Indiani salgipengchipakona oa sokangjaha. Ua je somoio Indiani salgroona re-baachim, ua apsan somei Indiani salgipengo mingsingbegipa pandit saksa gnangchim. Uni bimung Bhaskaracharya ong-achim. Lilaboti uni saksa kamkam demechik ong-achim.

Bhaskaracharja sima niachi ba sal jarangko chane niachi, mandeni mikkangchini obostaranko agansona man'achim. Ua Lilabotini rasongko sima nie, ua me-chik bi'sa bia ka'ode, bia ka'ani ja'mano ruutgjan segri ong-gen ine agansoaha. Uni gimin Bhaskaracharja namen chanchia ong-kataha. Uni demechik saksa mangmang indake dukko man'aha. Indiba nama salko seoke uko bia ka'atna man'ode Lilaboti segri ong-janaba donga ine ka'donge, je somoio bia ka'atode segri ong-jawachim, indake rasong gnangani ba nama salko tihtak uina man-gen, maina unomiting chasongo Indiao ghoriko jakkalaniko uikujachim. Lilabotiko bia ka'atani sal sokahaoa, ua tihtak somoiko uina gita indake dakaha; Bhaskaracharja piala ge'sako ra'e uko ki'sango kol puaha aro ua kol pugimin pialako chini kosako donaha. Jersalo ua pialao chi gape dubigen unon Lilabotiko bia ka'atani somoi tihtak ong-gen ine tik ka'aha.

Me-chikrang Lilabotiko bia ka'ani ganding chindingko ganataha. Nokni samtangtanchi doka dam'ani aro ma'manti kusi ong'anirangko a'bachengaha. Lilabotiba namen kusi ong-beaha. Uan, ua pialana mai ong'angengaha uko nina chini sambao asongengachim. Uni skoo bi'a ka'ani mukut gnangchim aro ua mukuto bang'a muktarang gnangchim. Lilaboti skoko bamdate pialako niengachim, indakmitingo uni skooni mukutoni chongipa mukta rongsa ua pialani a'kolko mituketa gita ga'akaha. Ua muktani ga'akonako pilakba nikjachim. Uni ja'mano ua pialao chi gapdojaha. Ruuta somoini ja'manoba piala dubikuja ine nike maiba ong'aha ine pilakan kenchakna a'bachengaha. Uamang pialako namedake nioa Lilabotini mukta rongsa pialani a'kolo chang-kefe chiko jokdoatjaha ine nikaha.

Bia ka'ani tik somoi badeangaha. Bhaskaracharja namen duk man-beaha, indiba bia ka'aniko champengjaha. Un salon ua Lilabotiko bia ka'ataha aro ua ruutgija salrangni ja'manon segri ong-bebeaha. Lilaboti maikai uni janggi tangani salrangko re'atgen uako chanchie uni pagipa namen jajrengaha. Ja'man ki'tiko ua Lilabotina saljarangko chane uiani bidako skina mangsongaha. Lilaboti pangnan porai-ani aro seanirangko dakrongode ua gisiko duk man-jawa ine ua chanchiaha. Lilabotini pilak uianirangni gimin na-

simang knaon me-chik bi-sa saksa badita uianiko skie ra-na man'a uko na-simang tale nikna man-gen.

Lilaboti salgimik gimik pagipao porairongachim. Ua hisapko man-srangachim. Lilaboti uni pagipako kitap-rangko sena dakehakaha. Ua chanani namnambea uian-rangko bikotaha. Ua English ku-siko ki-taprangko sejahaoa manderang uni ki-taprangko inditan namnikaha je uni seani-rangko English ku-sikona pe-skaaha.

## PATHANRANG

Ghaznini raja sultan Mahmud pil-nipil Indiaona napba-aha. Indiba ua Indiao dongkamjachim ine na-simang uia, Indiba da-ororo Indiao bang'a Musalmanrang songdongenga India uamangni songdongram a-song ong'a. Maina skang intal indiao Musalman rajarang sason ka-baenga. Indiao sason ka-chenggipa Musalmanrangba, Sultan Mahmud gita Afghanistano songdonggiparang ong'achim. Indiani maponiko nibo, unon salgro saliramchipako Afghanistanko nikgen.

Unomiting Afghanistanni ning'o Gaur minggipa a-song clamsa gnangchim. Gauri rajarangko Gauri ine minga-chim. Gauri raja saksa Indiani bang'a biaprangko ame bamataba. Ua an-tang ia a-songona re-bagija uni pal sason kagipako watataba. Englandni raja ia a-songni Maharaja ong'a. Ua an-tangan ianona re-banongama? Ua dal-gipa manderangko watata aro uamang-sa sason ka-ani kamrangko ka'a. Ua Gauriba indake dal-gipa manderangko watate Indiao kamko ka-atachim. Uandake sason kagipa saksani bimung Kutubuddin ong'achim.

Gauri raja siahaoa, Kutubuddin an-tangan jakgitel ong'e Delhic raja ong'aha. Ua Gaurchi re-angpiljaha. Musalman-rangni gisepo ia Kutubuddinan Indiao raja ong-chenggipa ong'a. Musalmanrangni gisepo bang'a mamalrang gnang: Kutubuddin aro uni jaman jaman sason ka-gipa bang'a Musalman rajarangko Pathanrang ine mingsingachim. Ua pilak Pathan rajarang aro rani saksani gimin da o agangen.

Maharani Victoria Indiani Maharani ong'achim. Delhio-ba changsao Musalman rani gnangchim. Uni bimung Sultana Razia ba Maharani Razia ong'achim. Ua gisik gnangbegipa ong'achim, aro uni pagipa gipin biaprangchi re-na nangode, sason ka'ani kamko pangnan uni jako donang rongachim. Uani gimin Raziani adatang namen namnikja-chim; Raziani pagipani simano uni adatang saksu raja ong'rikaha. Indiba ua mamung kamkoba cholijachim, uni gimin rajotrang ua rajako a-rikate Raziako rani donskaaha. Na-simang maiko chanchia? Ua noko asonge dongari song-nokko sason ka'ani kamrangko chu-sokatahama? Uandake mamung saloba ong'jachim. Ua rajani ganding chindingko gane pilakni mikkango katchario asongrongaha, aro an-tangan bang'a golmalrangko bichal ka'aha, gipin gipin a-song-rangni rajarangni baltigipa manderang baksaba ua an-tangan agangrikaha, aro nanga katarangko janaprongaha.

Razia bregimin nokol saksana ka-sabeachim. Raziani ka-sachakanichi ua mande a-songo saksu dal-gipa mande ong'aha. Ua mande chu-onga gita bilkoba man'aha. Rani an-tangan jena ka-sara, sawa, una kenjagen? Indiba a-songni mitam dal-gipa manderang iako chakchikna man-jaha. Skango jean chakolsa ong'achim, ua da-o uamang-na bate batangen, iako uamang chakchikna amjaha. A-songni dal-dalgipa montring kumong nangrime Raziani kosako bobil ong'e chakataha. Raziaba kenjaha, ua an-tangan dakgripaaha. indiba dakgrikao amako man'e adita salrangni ja-mano so-otako man'aha. Ua bilsi gitam jadokmangsau sason ka'aha.

## ALAUDDIN ARO PADMINI

Sakgipin Pathan rajani bimung Alauddin Khilji ong'achim. Ua bilsi 1295 intal bilsi kolgriksana sason ka'aha. Uan bilagipa, ka-donggipa mande saksu ong'achim. Indiani bang-bata a-songrang, salgrochipak donggiparang, pilakan ong-nasipile uni ning'o ong'achim, aro salgipengchipako adita chel-aona kingking bariataha. Indiani salgipengo jalang kabatgipa Rameswarko na-simang nikgen, ua biapona

kingkingan Alauddinni sipaini pamong songnokrangko amange Musjid, chong motan Musalmanrangni olakiram nok te-sako rikaha.

Asokani songnokua bate Alauddinni songnok dal-bata-chim. Rajputrang Alauddinni bobilrang ong-achim. Nasimang Indiani maponiko Rajputanako nibo, aro ua province-oniko chitor songjinmako nibo. Uororo Rajputana a-songni chitor songjinmao Padmini minggipa nitobegipa, gun gnanggipa rani saksa dongachim. Uni mik kang bimang daknangbean baksa gisik seng-a, nama aro sapanina pilakan uko aiao inmanaha. Mongsongde ua nitoao pilak me-chik gipinrangna batbea ina, aro uko mingsinga a-song gimikona gipangaha. Musalman raja Alauddinba Padminiko mingsingako knaaha. Ua mikbokbegipa raja ong-e antango nitogipa jikgiparang bang-oba sakgipinni jik Padminini gimin chanchie gisik dongtojaha, aro uko je chotchiba man-na nanga aro uko man-jaskal Chitor songjinmako pe-gen ine gisiko kimkim chanchiaha. Alauddin kratcha-ninggija Padminini segipa Bhim Singh rajana uni nitobegipa jikko ianerani jagringo mangmang mesokchina bi-e chiti kingsako seaha. Uni bi-ako on-ode ua un baksa dakgrikma tariako dontonge jringirotna uni ripeng ong-e nangrime dongna ua ua chitio ku-rachakaha. Bhim Singhni gisiko maidake chanchiani ong-katenggenchim an-chung chanchiate nina man-a. Jeba ong-bo Bhim Singh namgipa ong-e tom-tome dongna skaha, aro duk ong-beoba jiktangni jagringko janerao nina on-na rakna sikjaha. Jagringkodé nina man-gen ine una uiataha. Jagringko nina man-gen inako knae Alauddin sakgipinni duk aro kamni gimin mamungkoba chanchigija antangni mangsongako chu-sokatna man-gen ine chanchie kusi ong-beaha. Indaken ua antangni bang-bea sipairangko nangani ong-on man-na amna gita uni Padminini jagringko nina re-angmitingo Bhim Singhni kilani adita chel-ao time dongchina tik ka-aha. Bhim Singhko rim-na bang-a cholrangko dakman-ao ua antang baksa banggija manderangko rimbite Bhim Singh rajani nokona re-angaha. Bhim Singh uko mande ra-e rimchaksoaha.

Alauddin janerao padminini jagringchi antangni mikron-rangko okkaataha; aro gisiktango Bhim Singhko rim-e

uko so-otna aro Padminiko rimdrabae jik dakna chanchiaha. Ua Bhim Singhna bang-a dakchakaniko aro boksisko ku-rachakaha. Ripeng ong-ani aro nang-rimaniko mesokna un baksa re-pachina Alauddin uko nampinike mol-molaha. Bhim Singh uni cha-chipile nampinikako uijaha, aro uni katako bebesusu nike un baksa re-angpaaha. Indiba killako on-tisa batarion mai ong-aha? sauntangtanchini kimpreta gita bobilni ku-rangko rang-san knaoa aro uamangni ja-birang bang-gria gita a-a mobapiloa ua kurak jakwak dakaiaha, aro ua antangko koedi gita sildeng patakosa nikaiaha. Un baksa re-pagipa Rajput sipairang bang-jarangoba aro dakgrikna on-tisaba taria dongjaolha ka-dongbee janggi dingsa dong-kuengaona kingkingan dakgrikchakaha.

Bhim Singhkode Delhiona rim-ange patok noko chipe doneaha.

Da'o Bhim Singhni raijo aro uni ka-sagipa jikgipa Padminini gimin chanchiate nibo! Maikai a-song so-so jeng-jeng aro duk gapan baksa a-songtang aro rajatangna ka-sagipa Rajputrangni ka-onanga ching-chaaha.

Da'o Alauddin Bhim Singhko man-e ka-kimkin dakaha; aro Padminina segipako man-pilna skode uni nokona re-bachina ine chitiko seataba. Padmini duk ouga aro kenani gisepo uni gisik seng-ako da'o jakalna nangaha. Re-angenga indiba ang baksa sakhajalsa me-trarangko rim-angpaenga ine ua uisoataha. Iarangko knae Alauddin gisiko aiao immanpile kusi ong-e jedakeba Padminide antangnian-manchaha ine chanchiaha. Ua uko mandera-sona ramarango gamchatgipa ba-rarangko andapaha, aro uarango pulrangko galaha aro similgipa torangko satkikiaha aro pilak nok aro ramarangko nitoatanirangchi nitoataha. Raijoni pilak manderangko doke dam-e kusi ong-china ge-etaha. Indiba ia Alauddinni Kusi ong-soaniara magnasachim. Sakhajalsa ine agangipa me-trarang pilakan me-chikrang ong-jachim. indiba uamang-a Rajput sipairangni gisepo bilakbatgipa aro ka-dongbatgiparansa ong-achim. Uamang uamangni gana chinani ning-o dakgrikani silchidareko gandape me-trarang dake tariaha. Aro Padmini dake gipinko togie Padmini

an-tangde Chitor songni rakbatgipa killani ning-o dongnurik-aha. Indake ua sakhajasa sipairang nitoatgimin rotrango Delhiona re-angaha. Uamang-ni rotrango porda peng-tok-achim. Uamang Delhiona sokoa Alauddin mande ra-bee uamangko rim-chaksoaha.

Padmini dakgipa pilakna skang an-tang segipako mik-kang nichengna dikdiksana bi-aha. Alauddin mamung ken-chakgija uko dakna on-aha. Ian Bhim Singhko jokatani chol ong-achim. Padmini dakgipa rang-san Bhim Singhko kaa-rangko enge songjinmani a-palona katdilangaha, aro tarie nisengsoenggipa gureo gong-raka dipet chalaie katangaha. Bhim Singhko nina watata ruutahaoa Alauddin dongknapijae Padminiko an-tangni mikkangona bakbak rimechina mande watataha. Indiba nibo, patoko Padmini aro Bhim Singhba dongjaha.

Da-o Alauddin me-chikni an-tangni kosako chalaki dak-ako uie namen ka-onangaha. Doke dam-e kusi ong-anirangba pilakan bilding bildang ong-aha. Ua gari ning-o dong-gipako ka-saninggija so-cte galchina sipairangna hukumko on-aha. Aro Bhim Singhko rikangchina bang-bea sipai-rangko watataha

Garini do-gako oon silchidare aro inchroachisa uamang uamangui dakgni kamua aganchakaha. Uano bilongbee dakgrikani ong-aha, aro an-tangtangni bang-ani baditaba ehang bang-bate Rajputrang Musalman sipairangko so-otaha. Indiba bon-kamao uamang amchakjaha, aro saksa sakgnisan jokaiaha.

Chitor songko nisirangua lakni lak sipairang chaangaha, aro Chitor songjinmao bilongbee dakgrikani ong-aha. Changgni ba changgitamo Alauddinni sipairang Rajputrangni jako tang-pilaha. Indiba bon-kamao Rajputrang amchak-jaha; maina Musalman sipairang Rajput sipairangna hajalni hajal bang-batachim. Uamang dakgrikmitingo Bhim Singli-ko so-otaha. An-tangni setangko so-otahana da-nang Padmini duk ong-bee kratcha-ana bate-de sion nambata inc chanchie sak hajal chi-gitam Rajput me-chikrang baksa kam-enggipa wa-alo bilprue siaha.

Indiba Chitor Musalmanni nung'o bang'e ruute dong-jaha. Bhim Singhni depante, Hamir Musalmanrangni jakoniko Chitorko jakgitel ong'ataha Alauddin raja ong-mitingo, pangnan dakgrike jakgitchajachim. Ua janggi tanga gimiko on-tisaba tom-tomani aro kusi ong'aniko man-jaha. A-songni samtaugtangehin una bobil dakna a-ba-chengaha. Uni sason ka-mitingo Mogul minggipa jatrang changbongana kingking Indiaona napaha, indiba ua uamang'ko bang'en sasti on-aha. Changsao ua sakhajalbonga Mogulrangko so-otaha ine agana gnang. Indake ma-manti tom-tomgija ong'anirangni gisepo bilsu kolgrik sana kingking, sason ka'e ua siangaha. Uni ja'mano Mogulrang uamang'ni jakoni rajoko ra-seke Indiao sason ka-na a-ba-chengaha.

## BABAR

Timurni simanoa uni songnokko Bang-bea chonchona staterang dake bak bak dakaha. Uarangni gisepo Ferghana minggipa, jeko da-ororo Kokan minga, Turkestanni chongipa a-song ge'sa ruutani ja'mano Babarni pagipani pal ong'aha, maina uaba Timurni su-gipani degipa ong'paachim. Pagipani simano bilsu chignisan ong'aenggipa uni pal raja ong-rikskaaba.

Babar singhasono gakatsrapgijan, ua an-tangko gima-atna siggipa an-tangni wanggipa baksa dakgrikna nangaha. Babar an-tangni songnokko gimaataha, indiba uko an-tangui raja ong-atna namnikgipa mitam Turkestanni pamongrang aro uamang'ni ma-drangrang uko watgaljaha. Bilsu kolgrik-na kingking ua biap damsaoni biap damsaona katiojoaha. Salantin ong'nasipile ua dakgrikaha aro basakobara ua angipa ong'aha, basakobara janggitangna kene katna nang gipa ong'aha. Ua aro uko ja-rikgipa bang'a Turkestanni manderang bang'a salrangon bakrarango aro a-pal bangbango tuna nangaha Basakobara salgimik gure janggilon salko re-ataha.

Ja-man ki-tiko Babar salgipengchina re-na tik ka'aha; maina Turkestano an-tang gita chachia ka-donggipa gipin



pamongrangba bang-ani gimin ua uano dal-gipa songnokko dakna man-jawa ine nikaha. Maina ua bang-a songjinmarangko ra-seke man-ahaoba, uarangko watgalna nangaichim. Uni madrangba kimkim dak dongani biap dongpajani gimin ua baksan rep-ana namnikaha. Indaken uamang Hindukush a-brirangni agitokrangko gatbae Afghanistanona re-baaha.

Afghanistani manderang ka-donggipa aro dakgrikragiparang ong-oba, Turkestanni manderang uamangna bate ka-dongbatgipa aro dakgrikragbatgiparang ong-ani gimiu Babar bakkakan antangko Kabulni aro Ghaznini nokgipa dakatna man-aha. Uano ua adita bilsirangna kingking sason kamanahaoa, antangko bilaka chu-ongaha ine chanchie Indiachina ong-onbaaha.

Babarni bilsil bilsil sotbri ong-ahaoa, uni sipairang sak hajal chi-gitamsanchim. Indiba uamang-oni sakprakan bang-bea dakgrikanirango dakgrikmanpaaha, aro uamangni dilgipa baksa signiona re-na nangani ong-oba, kengijagiparang ong-achim. Babar ka-dongen Punjabni a-kaweona dilbae Delhiona tongtong re-dilbaaha.

Pathanni raja, Ibrahim Lodi, mande laksako rimbite uko warachakna re-chaksoaha. Indiba uni manderang ruuta bilsirangna kingking Hindustanni ding-gipa a-kaweo dongsoahani gimin bilgriahachim, uni gimin gital re-bagipa Turkestan manderang baksa warachakna uamangni bil chu-ongjaha. Ibrahimni manderang amchakjae katpilaha, sak-hajal kolgrik gureo gakatgipa siparang dakgrikram a-baon gitile siaha. Ia dal-gipa dakgrikaniko 1526 bilsio Delhini sepango Panipato dakgrikaha.

Panipato dakgrikania Babarko Delhinisan nokgipa ong-ataiachim, maina Hindustano Rajputni rajarangna agreba Musalmanrangni dal-gipa songnok dambonga dongachim. Rajput rajarangni gisepo mongsonggipara Sanka raja ong-achim. Rajputrang Babarko dakgrikaha, indiba Babar uamangko amaha. Bilsil gitamni gisepon ua antangni degipa Humayun baksa Indiani salgroni bang-a Musalman rajarangkon antang-na bamdraataha. Ua salrangona king-

kitab India sason kagipa Musliman rajarangni glsepo Babaran nambatgipa ong'achim. Babarni orto 'Singho' onga aro ua singho gitan bilakgipa aro kardonggipa ong'achim. Ua mande changrogiparangkoni jak samtangtangel i sakprak gipake guare eluani kosakko ga'akgija katua man'achim. Antangni nika chibima damantikoni jrobataria, aro salprakoni mail ritelaprak gureo gakate re'na mar'achim.

Babar dakgrikani a'bako namnikgipa ong'oba, ua dakgrikna amgijagipa aro dakgrikijagipa manderangkodi so'otjaha. Ua Indiaona manderangko so'otna, uamangni olakiani nokrangko gimaatna aro uamangoniko ra'sekna re-bajachim. indiba gisik gunggipa aro namgipa raja ong'e uamangni kosako sason ka'na re-baaha. Ua antangni katua bebegipa aro pangnan gisiko kusi ong'gipa ong'achim aro ua mamung saloba mitchignini kamrangko dakjachim.

Babar India ruute dongjaha, maina uni sason ka'ani bilsil brisan ong'aengpition ua bilgri ong'na aro sana a'bachengaha. Uni ka'sara degipa Humayunba bilongbee saaha, aro ua sichong'motgen ine manderang chanchitokaha. Unon saksa toromigipa mande uo donggipa gamchatbatgipa gamko, ong'jaode, Agraoniko ra'seke mangipa hirako, Isolina on'emung uo bi'ode, haida, uan antangni degipako manpilnaba donga ine una aganaha. Uni gimin Babar antango donggipa gamrangni gisepo uni janggian gamchatbatgipa ong'a ine chanchie ukon Isolina on'na mangsongaha, aro antangni degipani turamko changgitam re'duuleinung, antangni janggiko ra'skaen degipani janggiko jokatchina Isola bi'aha. Untal Humayun bate bate an'sengbatroroe ja'mano namsrangaha, indiba Babar bilgri ong'oroange bilsil 1530-o siaha.

## SHER SHAH

Sher Khan, ba Matcha Pamong, antangni himungko Sher Shah, ba Matcha Raja ine mingkaaha. Matcha gitachachan ua bilakgipa aro karakgipa ong'achim. Indiba namen chalakibegipa aro ka'sauingbegipa ong'achim. Uo

bobilna ka-sachakani gri, aro dakgrikmitingo an-tangni katako pe-achi maiba man-dapani ong-genode ua uko dakna mamungba neng-nikjachim.

Indiba ua raja ong-ahaon gisik gnange aro namedake sason ka-aha. Una skang ong-enggipa Musalmanni rajarang agre dal-giparang ong-ani gimin chonchonarangni gimin nirokaiaha ine ua uiaha. Uamang uamang-ni dal-gipa manderango gisik gri gita ka-donge uamang-ni jakon an-tangtangni pilak kamrangkon pakwataha. Aro ua dal-gipa manderanga skangde bilakgipa aro ka-donggiparang ong-ahaoba, ruutgijan altuae janggi tanganiko am-giparang ong-aha. Uamang agre tusiaha, cha-aringaha aro an-tangtangni dakna nangni kamko an-tangtangni jaktangtangchi dakani pal uamang-ni nokolrangna on-skaaha.

Sher Shah indake cakjaha. Ua pilakni giminan an-tangan nirokaha. Uan raja dal-gipa ong-ahaoba, mamung saloba aratjaha, indiba an-tangni jaktangchi kam ka- an-tangni janggi tanganiko man-na nanggipa kangalbegipa mande gita pangnan jakchakgija kamko ka-aha. Gipin pilak Afghan rajarangna bate ua a-songko nambate sason ka-aha, maina raiotrangko niroknara rajani kam ong-a ine ua uia-chim. Ua Hindurangko duk on-jaha, aro a-songko sason ka-o dakchakua ua uamang-oni bang-akon rakkipaaha. Uamang-ni giseponi saksa Todar Mall minggipa kajinako ra-giparangni pamong ong-aha.

Ua bilsu brisan raja dal-gipa ong-e sason ka-angalia. Uni degipa uni pal raja ong-rikskaaha, indiba uan uni pagipa gita gisik gnanggipa aro sason ka-na changgipa ong-jachim. Uni gimin uni songnok bilding bildang ong-aha aro Humayun dakgrike uko man-piltaiaha, indiba ruutgijan ua siaha ine an-ching uina mara. Indake India a-songni rajarang dingtang dingtang ong-rongani gimin uamang-ni raiotrangba dukman-rongbeachim.

## HUMAYUN

An-tangni sina skang Babar uni dal-batgipa depante Humayunko okame una aganaha, Angde, Isol nang-na ka-sae

ang-ni ja-manchi angni songnokko on-rikode, nang-ni jongadarangna ka-sae dakchina anga nang-ko mol-mola. Humayun uni pagipani aganangako bebe daken manaha aro uko maniara una neng-ani ong-achim, maina ua ant-angni jonggiparangna ka-sara aro uamang-ko duk on-na sikjachim. Uni pagipaba una ka-sara aro ka-dongchachim. Agilsak gimikon Humayun gita chacha ripeng gri ine uni pagipa aganrongachim.

Humayun antangni songnokni mitam bakrangko antangni jonggipa sakantinan suale on-e songnokko sason ka-na a-bachengaha. Saksana ua Afghanistan aro Punjabko on-aha. Ian uni ka-sabee dakani kam ong-oba, gisik gnangani ong-jahachim, maina ua songo ka-donggipa aro bilakgipa manderangan gapachim, aro Humayun ua songnokrangonikon antangni sipai kotokrangna manderangko aro officerrangko man-rongachim. Humayun dakchakani pal uni jonggiparang uni kosako hobil ong-e dakgrikaha, maina uamang sakprakan raja ong-na skachim. Uni gimin uamang-ni tangenga dipet tom-tomanin ong-jaha.

Babar antangni songnokko tom-tom aro kimkim dake dakangna man-jahachim. Uni gimin Humayun singhasono gakatrikarion, bang-a bobilrang baksa dakgrikna nangaha. Uan ka-donggipa ong-achim, indiba uni pagipa gita uni sko bilakgipa ong-jachim. Uni janggi tangani bon-kamachibara ua apingko cha-aha aro uan uko aratata aro gisikko bilgriataha.

Sher Khan, ba Matcha Pamong ine minggipa, Afghanni saksa pamong gnangchim. Uan changsao matcha mangsako tonualchi apsa den-arin so-otaha, aro uan Bengalni Governor ong-achim. Babarni siani ja-mano ua ant-tangko a-song gimikni kosako nokgipa dakna chanchiaha. Ua antangni sipai kotokrangko ruuta bilsina kingking tariaha aro Bengalni pilak a-brio donggipa killarangko ra-sekaha.

Ua salrango Humayunara gipin Afghan pamongrangko dakgrike, jakchakgija ong-engachim. Sal re-angoa Babarni nangipa aro gitcheanggipa sipairang siangtokaha, mitam dakgrikarango so-otako man-aha. Humayun Afghanistano sason ka-gipa antangni jonggipana adita manderangko

watutchina seatoa ua watatna jechakaha. Uni gimin uni sipai kotokrang namedake skiako man-gijagipa mandera-rasan ong-aiachim.

Afghanrangko amani ja-mano Humayun salaramchi Sher Khanko dakgrikua re-angaha. Unomiting wachikari aro songgimikon chirara ong-aiengachim. Sher Khan aro uni manderang a-brini killa ran-gipa biaprangona kataha. Humayunni bang-a manderangan saaniko man-aha, mitam uko wate katangaha. Ua katpilaha aro uni sipai kotokrang bilding bildang ong-aha.

Unon Sher Khan uni namedake tarigimin bang-bea sipai kotokrang baksa uamang-ko chadrapaha aro Humayunni sipai kotokrangko katataha. Daldalgipa songjinna Delhi aro Agrako ra-sekaha aro 1540 bilsio Hindustanni raja ana.

Humayun Indiao bilsichikungna raja ong-man-ua, an-tangni bebegijagipa jonggiparangni dakchakako am-na Punjabchi aro unoni Afghanistanchina katangaha. Indiba batesa uamang uko so-otna am-ani gimin ua bilsu gitamna kingking ma-manti dukrangko chake brangroraaba. Indiako watsrangna skang agisio uni degipa Akbar atchiaha. Mugul rajarangni bewal gita depante ba demechik atchion boksisko sualna Humayuno mamungba dongjaoba, ua uni jepouiko dangroke matchok ganduri on-tisa man-akon an-tangko ja-rikgiparangna on-tiprak tikkote sualaha, aro uni simila balvao gapahaoa. Angni degipako mingsingaba a-gil-sak gimikchi indaken gipanggen ine ua aganaha.

Akbarko uni wanggipa maibakai ringgittaugange Kabulo adita bilsirangna chipchange donaha. Humayun aro uni jikgipa adita ja-rikgiparang baksa Persiachi katange, adita salna kingking Persiani rajani sokgipa dake dongeaha. Persiani raja una ka-sae dakaha, aro una sakhajalchikung sipairangko on-aha. Ua uamang-ko rimbite Afghanistanona re-bapile bilsu chikungna kingking uni jonggiparang baksa dakgrikaha. Ja-man kitiko uni jonggiparang saksa dakgrikao so-otako manaha, saksara Meccachina katangaha. Gitamgipa jonggipakoba ua amaha aro indake Humayun adita bilsina kingking Kabulo sason ka-aha. Ja-mano ua

Indiaona re-bataiaha. Uni jonggiparang pil-nipil uni jako ga-aktaitaiaha, indiba ua uamangko pil-antian kema ka-aha ua an-tangni pagipana ku-rachakako mamung saloba gualjaha.

Unochacha Sher Khan simanahachim aro uni ja-mano raja sakgitam ong-aha. Uamang-oni bon-kamgipara bilgri-gipa aro sason ka-na amgijagipa ong-achim. Humayun an-tangni bilakgipa aro ka-donggipa sipairanko rimbite re-bae Delhiko ra-seketaiaha. Indake bilsil chi-bonga gimaatani ja-mano ua Delhi aro Agrako man-epiltaiaha. Indiba runte raja ong-angna man-jaha, maina ua sal sao an-tangni nokni jang-kiko gakatmitingo ga-soltape bilonge ga-akonaha, aro unonin pasike uni bilsil sotbonga ong-on ua siaha. Uan bilsil 1556 ong-achim.

## AKBAR

Indiako sason ka-gipa pilak Musalman rajarangni gisepo Akbaran nambatgipa ong-achim. Uni bimungni ortoa 'Dal-begipa' ong-a, aro ua dal-begipa rajaba ong-bebeaha. Ua bilsil 1556 oni bilsil 1605 ona kingking raja ong-aha.

Pagipani simitingo Akbar bilsil chi-gitamsan ong-eng-pitichim. Uni samtangtangchi bang-a bobilrang gnangchim. Uni pagipani nogipani segipa Beiram minggipa uni bebegipa general saksa ong-achim. Uan ka-donggipa Turkistanrangni General saksa ong-achim. Ua an-tangni bilakgipa jakchi an-tangni bobilrangkon bamataha. Ua an-tangni gritang Akbarna jrona, gureo gakatna, chri, bra, tonual aro sel-uko jakalna aro sipaini ma-manti nanga kamrangko dakna skiaha. Uan Akbarni pal bilsil bongana kingking namen kimkim dake sason ka-aha.

Uochacha Mogulrangni songnok Delhi aro Punjab-sanpitichim. Bengal, Jaunpur, Sind, Guzerat, Malwa aro Kandescho bilakgipa Pathanrang aro Rajputoni Rajput rajarang da-ona dongkuenga.

Akbar bilsil chi-chet ong-on, nirokgipani ning-o ong-e dongako nengnikaha, aro an-tangni ma-gipa aro an-tangni

lingo donggipa pamongrangni didiako man'e sason ka'ani bilko an-tangni jako ra'aha. Beiram bilko on'na sikjaoba, Akbari mangsongchongmotako nika ja-man ki-tiko watgale on'nan nangaha. Aro ua Meccachina re-jojoangaha. Unon ramadilo uni skango so'otgipa saksa Afghan mandeni depaute uko so'ote galaha.

Akbar Kabulni ka-singipa a-brirango donggipa ong'ani gimin mangrakgipa aro bilakgipa mande ong'achim. Duo ua an-tangni ska gita dakna man'aha ine nikon India an-tangui songnokko mangrakatna skode, ua Hindurang baksa ripeng dake uamang'ni namnikako mau'na nanggen ine ua chanchiaha. Aro India gimikni jat, aro torom jeba ong'chong, uamang gimikkon jatsan gita ku-monggrikatna mangsongaha. Indiba ua iako daknara ua skang an-tangni ning'o donggipa pamongrangko an-tangna bamatna aro an-tangni a-song Delhion tom-tomaniko dakchengna nangachim.

Bili kolgriksa ong'on Delhi gimikan an-tangna name bamsrangaha ine nikaha. Uochacha Hindustano sakritcia-samang Rajputni rajarang dongachim. Ua uamang baksaba nangrimna aro uamang'ni dakchakanichin salgroo donggipa Indiani Pathan rajarangko amna mangsongaha. Ua bilakbegipa sipai kotokko rime. Rajputona re'ange bilakbatgipa Rajput rajarangkon dakgrikchengaha. Akbari bilakako aro namako nikon rajarang una bamaha aro ukon namnikaha. Ua uamang-na ka-sae dakaha aro a-songtangtangko rakichina on'aha indiba an-tangko uamang'ni kosako dal-batgipa raja ine ku-rachakakosan am'iaha.

Uno Akbar Rajput pamongrangni demechikrangko bia karaha aro uamang'ni pagiparang aro jonggipa adatangrangko sipai kotokrangni dal-gipa dilgiparang dake donaha. Uamang'an uni ripengrang aro bakdrang ong'aha. An-tang'ni degipa Salimni dal'ahaoa, ua unaha Jotbai minggipa Rajput me-chikko bia ka'e on'aha. Bili snini bon'chotao ua Rajputrangni nokgipa ong'aha, aro pilak Rajput pamongrangni kosako nokgipa ong'skagipa ong'aha.

Unon Rajputrang aro uni nangrimgipa aro ripeng Hindurangni dakchakachi Akbar Hindustano donggipa gitcam Pathanni songnokrangko ge-sani ja-mano ge-sa dake

amrooangaha. Ua Jaunpur, Bengal, Kashmir, Sind, Guzerat, Kabul, Malwa aro Kandaharko amaha. Uni rute sason ka'ani chon-kamachibara Akbar Vidhya a'brini sal-giochi donggipa Hindustan, ba India gimikkon, sason ka'aha.

Akbar mande changroa aro nitoa; uni chela apala aro jakrang ro-roa; uni mikron aro knirang sina, ua sakgitchak indiba budopachibara uan dunelrooangaha. Ua adha Persian aro adha Turkestan ong'achim, aro uan Persian aro Turkestanni kn-sik minggnikon aganna man'achim. Ua bilakbeachim. Ua gureo gakatua namnikbea aro salprako mail 30 ba 40 dake re-ronga. Uan a'songni gisepo slai gona changbatgipa ong'achim. Uo slai bang-bea aro slai pongantini dingtang dingtang bimungrang gnangchim. Uaragoni pongsa, jeko ua 'Sronge Gogipa' ine minga, uchi ua mangritcha chi sku matburungrangko goaha.

Akbar budepa ong-rooangaha baksa uni ka-tongba nom-rooangaha, aro ua kasagipa ong'aha. Ua bang'a dak-grikanirangko dakgrikna nangaha, indiba ua mamung saloba manderangoniko raseke songnokrangko misijaha.

Akbar Muslimanni bi'sa onge Musliman gita dal atako man'aha. Indiba uan Hinduranga ka-sagipa aro rinok rinok dakgipa ong'achim. Pilak toromon nama gnang aro Isolan ka-sachongmotgipa, uko jeoba man'na ama, Musliman-rangni olakiani noko ong'bo, jeoba Isol gnang ine ua agan-rongachim. Akbarni dongmiting somoirango pilak nauderangan an-tangtangni ska gita toromko olakina man'achim. Namako dakan Isolko namnikatani ong'a. Tongtong namako regipani gumaako anga mamung saloba nikkuja me uni rokomsa tangkao sedapa gnangchim.

Akbar antangan skia mangipa mande ong'achim, aro ruuta bilsina kingking sena aro porainaba changachim. Maina bi-samitingo uni ka-saninggijagipa mamatang una leka porako skijaha. Indiba antangna ki taprangko poraie orako ua namnikbeachim. Krtap knghajalbongana agre donggipa uo library gesa dongachim, Rong nonge uoksa dakgiparangkoba ua namnikbea, aro uo bang'a rong rong noksa dakgiparang gnangchim. Ua knatogipa gitrang aro poetryrangkoba knatimua namnikachim.



Akbarni kachario banga skia mangipa manderang gnauchim, aro namangan songuoko donggipa pilak Hindu aro Muslimanrangko apsan dake sason kana dakchakaha. Uamangni gisepo mongsongbatgipara Abul Fazi ong-achim. Jena Akbar jongtaugna gitao kesaaha, aro pilak kamon uni ku-mongako rapaaha. Uan kasegipa, ruok rinok dakgipa aro skia mangipa mende ong-achim. Ayeon Akbari, ba Akbarni Nianrang ingipa kasegipa aro Akbarni nokni gunin, uni sason karantai pimin aro uni songrakni gunin tale seaha. Abul Fazlko Akbarni depa aro dejakra Salim namnikja-achim aro uko mkenegachim. Uan gunin Abul Fazl ni a-bhinandu biyako re angmuhoro Salim uko so-otna sipairangko bhara ure watataha. Akbar antangni ripeng namgipako gimatahani gunin sal gunin kungking chagija ringgija kalimaha.

Akbarni kachario donggiparangni gisepo mongsonggipa Hindu: Todar Mal Raja ong-achim, jenu reuta salna skang Sher Shahni ngogo kanko kachachim. Uan Akbarna namen dakchakchani ongaha, aro Akbar bakbakan uko kajmarangni pamong dake donaha.

Hindustanko amana jamano Rajputni pamong dal-giparangna sipai ketokko dileni kamrangko onaha. Mansingh Raja, jeni nogipako Salim bia kachachim, nan dal-batgipa genend ong-achim. Uko skang Kabulni Governor aro uni jamano Bengaln Governor dake donataha.

Akbarni sason ka-ani bonkanachibarami salrang tom-tome re angaha. Ua changsao Deccanko amna joton ka-aha, indiba jamano age duk onggen me nika na uko watgalaha. Uni depante Salim oia achita duk onaha. Changsa una bolul dake chakataba indiba banga manderang un baksa ku-mongjaha, aro uni jara-ano uni pagipa uko kema ka-aha.

Akbarni singhasoro gakatani bilsa chignini jamano Deccanni Musliman raja sakbri nangdume Vijayanagarni Hindu songnekko dal-gibaha. Ua bilsa Kistna chibimani rikani Talikotao biongbea dakgokan ongaha. Dal-gipa Vijayanagar gnaaha. Kistnani salgipeugchuni song gimik-kon dilgiparang antangtaugni sason ka-gipa songrangko ra-aha. Uamangni gisepo mongsonggipa Mysoreni raja ong-achim.

Akbarni dongmitingo skangua bate manderang lusi ong-batachim, maina uamang-ni kajinarang Pathan rajarang-ni dongmitingona, bate ritchengbatachim. Aro Hindu, ba Musalmanba ong-bo, pilakan apsan kajinako on-na nangai-achim. Skango donggipa Musalman rajarangde Hindurangko Jazia minggipa kajinako on-atachim. Musalman ong-pagija sakantian Musalman ong-jani giminan ua kajinako on-na nangachim. Ia kajinako Akbar rajaha. Rongtalgipa biaprangko nina re-giparangoniko ra-gipa kajinakoba ua dondikataha.

Pilak manderangan an-tangtangni torom aro bewaltang tangko dakna man-achim, aro pilakba pilakkoba kamik-kenatna ka-dongjachim. Indiba Hindurangni mingsa ka-sanninggijagipa bewalko Akbar namen rake bengaha. Hindurangni dakbewalo jikgipana skang segipa siode, segipani ganchio bildape sirongachim. Iakon 'Suttee' ine minga. Akbar iako dondikatna bil ama dipet krengaha.

Todar Mahi aganako ra'e a-song gimikni a-akon totokaha aro gegipa mi misirangui kri uraugko ma-chet dake bak dakaha. Asal gnanggipa a-arangna gita asal grigipa a-arangna kajinarangko on-na nangjaha. Skangde manderang kajinana miko on-achim, indiba Todar Mal tangkako on-atskaaha. Kajinako gilgipa manderangna mini bakko on-ani pal tangkako tik ka'e dormahako onaha. Bilsi chikungprako mikkangchi bilsi chikungna a-ani kajinako tik ka-sorongachim. Manderangko namnikatgijagipa adita git-cham kajinarangko ua gimaataha. A-aoniko bite man-ani bak gitamni bak sani pal gitako rajana kajina on-na nangachim.

Akbar pilak gipin Mogul rajarangui sason kanutingo a-songui obostara rajaosa pangchakronga ine nikaba. Raja namode, uni songnokba nama, aro raja namiaode ba aratgipa ong-ode, uni songnokba namjachim. Akbarni •skaan uni niam ong-achim. uni kesako dongskagipa mamung bil dongjachim. Indiba English manderangui, sason ka-ani ningo, Englando ong-bo, Indiaoba ong-bo, niam dong-achim, jeko pilak manderangan namedake uina aro manina nanga. Kangal bi-amgipa jekai amja uandaken rajaha ua

mamrangko pena amjachim. Iana skang bilsu ritchadeko English manderang ia niamko uamang'ni rajakoba nam-mkatpaaha.

Akbar bilsu soddok gitam ong'e siaha. Ua bilsu sotbonga sa sason karaha. Bilsu 1605 o ua siaha. Uni depante de-jakra uni pal raja ong'rikskaaha.

*Musalman Maharaja.* Ua Delhini singhasono maharaja gita sal chikimgna sason karaha. Unon ua amako man'e Persiaona arikatako man'aha. Ja-mano ua Persiani kotok baksa re-bapile Delhi aro Agrako rim-taiaha. Ua uni library nok. maibleni ro-ongko dakgimin steprango ga-ake siaha. Uko Delhio gopaha. Goprano uko gisik ratani gita dal-gipa aro nitogipa nokko rikaha. Uara sawa?

## SIVAJI

Mahrattaranga da-ororo an'chingni Bombay Presidency ine minggipa Western Chat jolo donggipa manderang ong'a. Uamang bilakgipa aro game cha-na bimchipgiparang ong'achim aro uamang'oni mitamrang a-rankario an-tang-tangni a-barangko game cha-na man-jamiting somoio Bijapur rajarangni ning'o gure gakatgipa sipairang gita kamko ka-rongachim. Mahrattarang chonchongipa indiba bilakgipa gurerango gakatranga aro uamang'ni namnikbat-gipa silchidarerang tonual aro sel-u ong'batachim.

Ahmadnagarni Sultauni ning'o Maloji minggipa sipai saksa dongachim. Uo Shaji minggipa chongipa depante saksa dongachim. Salsao ua Mahratta general Lukji Jadhava Raoni nokchi alaona re-angaha. Atamoa ua bilsu gitam ong-gipa an-tanggni demechik Jijabai minggipako ja-ping samsao aro Shajiko samgipino rim'e lamang sakgni jik se ong-na krabegen ine ka-ake jinmana inwate roengachim. Iako knae Shajini pagipa lamangko jinmani mikkango agane bondobost ka-ataha ine Lukji namnikjabea aro ka-onang-beachim, maina an-tangara Devagirini Yadava rajani

ma-chongnisa aro Shajiara ramram Mahrattasan ong-aia-chim. Indiba jeba ong-bo Shaji aro Jijabaiko bia ka'e on-aah aro uamanug-na Sivaji minggipa depante saksa atehiaha.

Ahmadnagarni songnokko mugulrang amaliaoa Shaji Bijapur rajani ning-o kamko kae Induni salgipengo donggipa bang'a districtrangko autangni nokgipani sasonni ning-ona ra-baaha. Ua dakgrikani gimin songtangoni chele dongmitingo Sivajiara ma gipa aro Brahmin skigipa saksachi Poonao skiako man-engachim. Skang'e chasongo donggipa manderangni gimin uamaug una skiaha aro Bhavani mite me-chikk'o olakianukoba skiaha. Ua gureko maniatna aro tonual aro seluko jakkahua chaugbegipa ong-baaha. Ua bilsil chur-sokahaon antangko gure gakatgipa aro javachi re-gipa, sipai dolni kosako skotonggipa dake donaha. Ua songui sepango donggipa manderangoniko abrini killarangko ra-eaha aro gipinrangkoba nikaha. Indake ka-dongani aro bimchipanichi Sivaji Poonani sepango donggipa chom-chonggipa songrangni nokgipa ba gitel ong-aha.

Ua bilakrorobaahaoa Bijapur rajani a songko gimaatra a-bachengaha. Afzal Khan, Sultanni noblerangoni saksa, A-brini meseko gita rim'e kachao chipe Sivajiko kachariona rim-bagen ine ua jiomani mikkango mitchetaha. Uni gimin Sultan un baksa sipai dolsako on'e uko rim-china watitaha. Sivaji Musalman generalna kenbea dakmikaha aro Partabgarh killani guareo uko saksan grongua uo mol-molaha. Afzal Khan tik ka-gimin biapona sokbaao Sivaji sepangba-engachim ine niksoaha. Ua mamung silchidare gri gita mikkang pa-aha, indiba ua ning-o jolongga gnaanggipa dal-begipa cholako kruachim, aro uni ning-o tonualko sikachim. Aro jakasichi ua Matchani Jakskil ine minggipa dal-begipa sil kom-kuko ra-bitachimi. Atzal Khan antangko uni olakina bangopako de-chrona ine gonggongmitingo Sivaji uko salone antangni tonualehi so-otaha. Unon burungo dong-nuenggipa uni mauderang chapinape Bijapurni sipai ketok-ona chaangaha. Indake namang dol gimikan Mahrattarangni jako ong-tokaha, Adita bilsirang batangahaoa Bijapur aro Golkondani raja sakgnian bilsianti adita tangkako on'e Sivaji baksa tom-tomaniko dakna kusi ong-beaha.

Sivaji da-ode Mogul generalrangchisa chaskana tari-skaaha. Ua Aurangzebko mitchiaha aro matchurangko so-otgipa aro torom nokrangko pe-giparagoniko an-tangtangni miterang aro torom nokko rakina gita an-tangni a-songni manderangko okamaha. Maharajani mamatang chong-mot Shaysta Khanko Deccanona Sivajiko warachakchina watut-aha, indiba ua an-tangni janggiko gimaatnasiahachim. Atam sao Sivaji aro uko ja-rikgiparang bia ka-ani dol gita tarie Poonao napaha. Andalahaoa uamang Mogul generalni dongramona babilsa janggilchipakni do-gachol gita nappret-angaha. Shaysta Khan tusiaoni mikrake jenetenesa an-tang-ni turamoni ong-kate katna man-aha. Indiba uni kelkiko ong-one katmitingo uni jaksi ge-gniko den-sotrikna man-ha-achim. Sivaji aro uni manderang songji-mani a-palchi kat-angtokaha aro bilchamrangko nate Poonao donggipa man-derangni nikwatna man-gipa Raigarh killaona napangaha.

Aurangzeb Mahrattako warachakna bang-bata sipai dol-ko watataha aro uamang killarangoni ge-sani sepango uko rim-aha. Ua Emperorna bamna nangaha aro Delhichi re-angna nangaha. Uno Aurangzeb uko namen chonnikbee jakkalaha je Sivaji uko mande jimani mikkango raka aro ka-onangani katachi aganaha. Aurangzeb una mamungba gisiko nanganiko mesokjaha, indiba uko an-tangni nok an-dalao chipchange donchina ge-etaha. Ia chalakigipa Mahratta mittai donchakani koko nape walo uoni ong-kate katangaha. Ua bakan an-tangni gimaatgimin killarangko rapilaha aro 1674 bilsio Raigarho raja gita mukut stikatako man-aha. Ua uano bilsidcknasan sason ka-aha, indiba ia somoimitingo salgipengchi Tanjoreona soke re-ange Deccano aro Carnatico donggipa districtrangko chouth ba a-ani kajinako una on-ataha.

Sivaji ka-donggipa aro bimchipgipa ong-achim ine an-chinga nika. Ua me-chikrang aro bi-sarangna ka-sachak-gipaba ong-aha. Aro ua an-tangni a-songko nokol itaoniko jokatna joton ka-beaha. Mahrattarango ramram ong-aigipa mingisa namgija bewal gnangchim. Ian tol-napani ong-chim, Aroba je a-songrangoniko chouth minggipa kajinako drae bi-achim, uamang-a cha-ua gita ong-a-achim. Uamang

bakan ra-seke ra-giparang ong-baskaana agre mamung nambata bite ong-katbajaha. Ian Muhammadanrangko gita Indiani pilak bakrangko donggipa Hindurangko gimaataiaha.

## CHAND BIBI

Chand Bibi ka-dongbegipa, gisik seng-begipa aro nam-gipa rani ong-achim. Ua Bijapurni rajani jikgipa ong-achim. Segipani simano ua gamko man-rikaha. Rajani simano Ibrahim Adil Shah a-songko sason ka-rikngigipa ong-achim. Unomiting ua chonbeengpitichim, aro sason ka-ani kamko jako ra-na amkujani gimin Chand Bibi uni bilsokkujana king-king sason kaaha. Uni su-tang Ibrahim Adil Shah bilsok-ahaoa, ua sason ka-aniko una pakwataha. Ua an-tangde janggi tangani bangki salrangko tom-tomao re-atna mang-songaha. Indiba ua indake dongna man-jaha.

Sulsao Bijapurni rajani noko me-chikskarang baksa golpo ka'e romitingo a-palo dintangmancha jikjikako knaaha. Niatoa gure gakatgipa sipairangko nikataha. Uamanga pilakan uko am-engachim. Chand Bibi rang-san maiba a-sel ong-aha ine uiaha. Unon katako ra-bagipa saksa Ahmednagarni nangako aro uni dakchakaniko bi-ako una aganaha.

Uni deragatgipa Abhas Khanba re-bagalgale Ahmed-nagaro raja ja-chong dongani gimin bilonge dol dol dake kajia ong-enga, aro uasan ong-ja Mogul rajani depante Muradba nangchappae a-songko nisie galna am-enga ine una aganaha. Songtangni duk ong-beani katarangko knae ua golmalko namatna re-angna ua namnikako mesokaha.

Una Ahmednagaroni katarang sokbadapaha. Ua katarangko rongtale uiahaoa, me-chiksan ong-a indiba uko namangni diligipa dake ra-chakgenma uko sing-ataha. Namnika aro kusi ong-bea ine una aganchakaha. Ua me-chiksan ong-cha unona re-ange dakgrikdilna ba dakdilna mangsongaha.

Ua unona gureo gakatgipa sipairangni pamong dake sokeaha. Un baksa uni namchiktangba re-an-paaha. Ua

pilakna skang Bijapur aro Golcondani manderangni dakchakaniko bi-chengaha. Uni samtangtango uni bobil bang-achim, aro dilgipa me-chiksan ong'a ine uie mikchepachim. Mitamrang Muradko didiaha aro una dakchakaha. Indake ua uni kosako bobil ong'anirangko uisoe Muradko champengsoani cholrangko daksoaha, aro una nanga gita sipairang chu-onge donga ine uie ua kusi ong'e mandetangrangko an-saodilaha.

Bijapuroni gureo gakatgipa sipairang uko dakchakna re-baengachim, indiba uamang ramaoengpition Mogulrangchi changduule nisiatako man-aha.

Chand Bibi gipinni dakchakaniko man-jawa ine nike an-tangni ning'o donggipa sipairangchin warachakna mang-songaha. Iana skangba ua dakgrikao dongpaahachim aro ua dakgrikao gisik nauggipa ong'e maidake dakgrikna nanga pilakkon namedake ma-siaha. Ua samtangtaugchi bobilrangni gisepe jajagija aro dakna nangako watchanggipa sipairangko didiaha aro dakdilaha. Adita jarangna dakgrikani jamano Muradni a-tipo cha-anirang bon-changaha. Indiba Ahmednagarode skang gitan apsan dougaiengpitichim.

Wal sao bobilrangoni indina ku-rangko knaaha. Bamnakode bambo, killako pe-na kamanrangko samanaha. Iako knae kena uape mitamrang raniko bamchina mol-molaha. Indiba ua iana ka-a mojaha, aro knasoka dipet, Pilakan sitokjaskal dakgrikkuna ine inwataba. Uni ku-rangna an-saoatako man-e sipairang krengchichie dakgrike bobilrangni kaman sagimin biapko ra-sekna man-aha, aro sagimin kamanrangko pilakkon nosto ka-e galaha. Murad aro uni manderangha kamanrangko so-na ua biapona chaprethaaha. Indiba neng-bee dakgimin kamranga pilakan magpasaha ine uie Murad namen duk ong-beaha. Kaman sagimin biap dam-sako Chand Bibi nikchangaha. Mogulrang uko so-ahava killam pakma samsako napruatsrangaha.

Iako nike warachakgipa sipairang kenjagokaha aro wate katua am-engachim. Indiba Chand Bibi tomadko jako ra-e antangan chadilaha. Uui inditan ka-donga aro dake mesok-ako nike Abbas Khanni ning'o donggipa sipairang ka-dong-pilna a-bachengaha, aro bobilrangni mikkangchi chaprete dakgrikaha aro bobilrangko dim-dematua man-aha.

Naprugimin killani pakmako bobilrang chaprubagen ine chanchie Chand Bibi slairangko bang-en sachake dongchina mitam sipairangko ge-etaha.

Bean bebe ua apsan salni atamchibarao Portuguese manderang ua be-prugimin pakmako nape dakgrikna chaba-aha. Indiba namang pilakan tang-pilaha; aro pil-nipil joton ka-oba amna man-jaha, Portugueseni dilgipa saks a iano so-otako man-aha.

Indakmitingo Chand Bibide be-prugimin pakmao chadenge an-tangni manderangko an-saoatengachim aro mata bu-a man-giparangko ra-ange sanchina ge-etengachim.

Mogulrang namen bilgriaha aro bilding bildang ong-aha. Walangengon rani be-prugimin killako tarina ge-etaha. Pring seng-oa uko matchotsrangaha aro skang gitan apsan ong-pilaha.

Pring sao Murad bamani nisanko watate sigiminrangko ra-ange galna Chand Bibio hukumko bi-aha. Ua una indake dakna on-aha. Tom tomaniko dakmano ua dakgrikani ganding chindingko okaha, aro an-tangna mamung rasongkoba ra-jaha. Indiba ua Isolko mitele aganaha, Ia pilak bilko ong-gipara Isolsa ong-a aro Uni rasongsa.

## DURGABATI

Mogul raja Akbarni somoio ka-donggipa Hindu me-ebik saks a Dugabati minggipa dongachim. Uni a-song Coromandel ong-achim, aro uni skotonggipa song Gornagar ong-achim. Na simang Indiani mapo Jubbulporeko nika, ua Gornagar Jubbulporeni mail bonga chel-ao dongachim. Gornagarni samtangtangchin a-brirara duulachim arotultie uko batsotna man-jachim. Coromandelni manderangba namen ka-donggiparang ong-achim. Uni giminan iana skang Musalmaurang pilakba dakgrike amna man-kujachim.

Asuf Khan minggipa, Akbarni sipaini pamong saks a Coromandel songnokna gisik nangaha. Coromandelni bang-a gamsengni gimin knae ua mikbokaha. Uko-nike Akbarba



Asuf Khanko Coremandelko ra-sekna joton ka-china didina abachengaba. Bils 1567-o Asuf Khan ua songnokko dakgrikna napuha. Un baksa gure gakatgipa sipairang sakhajaldok aro jaachi re-giparang sakhajalchi-gni dongachim.

Ia katako knae Coromandelni manderang kene dongtogija ong-aha. Indiba Durgabatini ka-tong mojaha. Ua dakgrikchakna tariaha. Bils chi-chetsan ong-aienggipa uni saksa kamkam depante dongachim. Unaba ua dakgrikani gandingko tarie, jaksamsachi tonual aro jaksamsachi chriko ra-e. mongmani kosako gakate sipaurangko dilna a-bacheng-aha.

Pitak sipairangan chinongtokaluaa ua mongmani kosako donge ka-dougani katarangko sipaurangna agaua uamang-ko ka-dongbatataha. Gureo gakatgipa sipairang sak hajalchet aro jaachi re-e dakgrikgipa sipairang sak hajalsa utehabonga aro mongmarangko rimbite uamang Mogul sipaurangko warachakna reangsoaba.

Skanggipa dakgrikao Mogulrang katpilua uangaha. Durgabati katpilanggipa Mongulrangko ja-rikauaba. Indake sal sa salginik re-angaba. Sal napabaoa walo neng-takna uni sipairang mol-molchae Durgabatiko duk on-aha. Durgabati dikdiksa neng takarin, walo Mogul sipairangko rikangkuna sikachim, indiba uni sipairang indake dakna jechakaha. Iai Mogulrangna nana chol ong-aha. Uamang an-pile nioa, ki sangchi Durgabatiko nikaba. Wal seng-kujaon Mogulrang Durgabatini dolko rim-na tik karaha. Iachi Durgabati ni sipairangde ja-jrengmangija tusie neng-takengachim. Mogulrang pingwalui uamang-ona cha-baaha. Durgabati kenjaba. Mogulrang sepangbeahani gimin uamang baksa mikkang chakgrike dakgrikode amjawa ine nike Durgabati abri detuini gisepriko donggipa apchongipa a-gitcko uni sipairangko dongdile Mogulrangko nisoaha. Indiba Mogulrangni goa guli i arsel uamang ua biapo dongchana man-jaha. Del-gipa biap dainsao namen bilonge dakgrikani ong-aha. Durgabatini mikkango uni saksa kamkam depante guli nangako man'e guretangoni ga-akaha. Dukko chanchie, somoiko gimaatode kam chu-sokjawachim; uni gimin Durgabati depanteko gipin biapchi jitangchina ge-ete dak-

grikangkuaaha. Saksani jamano saksani sipairang siangtokna abachengaha. Sakritelugitam jacheli re'e dakgrik-gipa sipairangko rimari na dakgrikna abachengaha. Uno chacha bra pongsa Durgabatini mikrono buaha. Durgabati brako saloke galna manjaha; maina bra uni mikrono bukane dongachim. Uni jamano bra ponggipin uni gitoko buaha. aro uni be'en gimikon an-chieli aua gita ong-pilaha. Unon ua niwilwile nioa, uni sipairang korniangsrangaha ine nikaha, aro ua dakgrikano amna kardongani dongjaha. Mogulrang ruutgijan uko rim-gittanggen aro uni asong be'gnok ine ua nikaha.

Kratcha'ako manana bate. sian nambata ine chaneluc Durgabati chri pongsakos ra'e antangni kabako kinikim suraha. Je biapo Durgabati janggi galachim, ua biapko mande-rang da'alona kingkingba mesokenga, aro poido segiparang bang'a ki-taprangko uani gimin sea aro git ring'a.

## JEHANGIR

Akbarni simano uni depante Salim raja ong-achim. Ua antangko Jehangir, ba Agilsakko Ragipa, ine mingjitala. Uni magipa Rajput ong-ani gimin ua adha Rajput ong-achim. Ua uni pagipa gitan bang'a Rajput me'chikrangko kimaha. Uamang-oni saksara Prince Khurramni magipa ong-achim, jean jamano raja ong-achim. Jehangir antangni raja ong-ani dokgipa bilsio saksani Persiani me'chik. Nur Jehan minggipako bia kabaha. Uan Indiani ranirangni gisepo mingsingbatgipa rani ong-achim.

Nur Jehanni pagipa Turkestan asongo donggipa mande ong-achim, jean kangal ong-beani gimin India asongona brangbaaha. Lahoreo ua antangni ripeng gitcam saksako gronge uni dakchakachi Akbarni kachario kamko man-pa-aha. Ua changgipa ong-ani gimin rang-san kam dororoang-aha, aro jamani kitiko uan rajani gamni pamong dal-gipa ong-achim. Uni demechik saksani mangmanga namon nitobegipa me'chik ong-achim, aro ua jekai nitogipa ong-a mandaken ua changbegipaba ong-achim. Uni pagipa uko

Sher Afghan minggipa Persiani pamong pante saksa baksa bia ka'e onna ine tik ka'aha. Sher Afghana Bengalni Bardwan a-songni Governor ong'achim.

Nur Jehanni bia ka'na skang sal sao Salim uko niking namon mikchabeaha aro una ka'saaha, indiba Nur Jehanni pagipa Sher Afgauna ku-rachakako pe'na sikjah,uni gimin uko Salimna on'na jechakaha. Salim an-tangni pagipana re'ange uni dakchakaniko braha, indiba uni pagipaba jechakaha. Uni gimin Sher Afganko bia ka'mano Nur Jehan Bengalchi re'angaha.

Pagipani siani ja'mano Salim raja ong-rikemung an-tangni ska gita dakna man'ahaoa, ua mandeko watatemung Sher Afganko so'otate uni jikgipa Nur Jehanko an-tangni nokona rim-baataha. Salim uni bimungko Nur Mahal, chong-motan Rajani Nokni Seng'a, ine mingjitskaaha. Indiba na gisik gnanggipa me'chik aro setangna ka-sagipa me'chik ong'achim, aro an-tangni segipako so'otatani gimin namon dukko man-bee ka-onangbeaha aro adita bilsina king-king rajani mikkangko nian nijaha. Bils dok badeangman-ahaoa, ua chu'onge kalimaha ine chanchie rajako bia ka'na ku-rachakaha.

Nur Mahalni an-tangko bia ka'na ku-rachakahaoa, raja namon kusi ong-beaha, aro uni bimungko Nur Jehan, chong-motan Agilsakni Seng'a ine mingjittaiaha. Aro ua sal intal uni jakon pilak bilrang ong'aha, aro uan a-songko sason ka'na Jehangir uni jakon pilak bilko on-srangaha, aro uan rajani pilak hukumrangko soi ka'aha. Ua an-tangni pagipako dalbatgipa montri dakaha aro an-tangni adatangko rajani kachario skanggipa dal-gipa mande dakaha. Uni ja'mano bils chi-dokna kingking ua sason ka'aha. Jehangirni sason ka'na chong-motde Nur Jehanni sason ka'anisan ong-aiaha. Cha na-ringna namnama aro chu'sokakosa angade nangaia ine Jehangir aganrongachim. Ranian an-tangna bame nambate sason ka'na changbatani gimin ua uui daka kamrango mamungba jakdaugdikpajachim.

Jehangirma aro Hindustanna ian namgni ong'a, muina rani gisik gnange aro namedake sason ka'aha. Jehangir an-tangni pagipa Akbar gita gisik gnanggipa, namgipa, aro

sapgipa ong-jachim. Ua au-tangko kusi ong-atanina agre mamungkoba chanchijachim. Mugul rajarangni gisepo uan chu ring-rakbatgipa aro ma-manti kusi ong-anirangko namuikbatgipa ongachim.

Bilsì 1614 Englandni raja James I Europeo dal-gipa Mogul ine mingako man-gipa Jehangirona an-tangni a-songni English hadinggiparangna hadingani biapko on-china bi-na ine saksa dal-gipa English mande Sir Thomas Roe minggipa-ko Indiaona watataha. Unochacha uamang-ni badingani bosturangko chimonge donani nok salaramni sagal rikam Surat minggipa biapo dongachim. Sir Thomas Roe Jehangirmi noko bilsì gitamna kingking dongpaaha, aro ua Indiao jeko nikaha aro knsaha uarangni gimin namen tale serikaha. Akbarni somoio gita sason ka-anirang namjaha, bang'a biapni sason ka-gipa Governorang manderangko duk on-bee sason ka-aha, a-song gimikon arseke ragiparangan gapaha, aro bilakgipa dal-gipa manderang gride rama re-nan man-ja ine ua serikaha.

Sir Thomas Roe bilsì gitamna kingking Jehangirmi noko dongpae badingani hukumko bi-na gita salsa sik chu pekgija uni miksele dongani salko am-ahaoba ua man-jaha. Jarman kitiko ua hukumko bi-e niabaoa, Ranichi re-angbo, angade mamungba uija inesan aganchakaiaha. Uni gimin raniona re-ange hukumko bi-esu man-angaba.

Jehangirmi sason ka-ani bon-achihara uni degipa Khurram una dukko on-beaba. Ua songnokko man-rikna seng-time neng-nikaha, aro uni pagipa una Shah Jehan ine mande ra-ani bimungko on-dapahaoa, ua raja ong-ani bilkoba an-tangna ra-seksrangna joton ka-aha. Nur Jehan, Mahabat Khan minggipa, bilakbegipa, ka-donggipa pamong saksako rajako rakichina donaha. Mahabat Khan bakhakan Shah Jehanko Deccanchina a-rikataha. Indiba Mahabat Khan an-tangan raja ong-na joton ka-pilskanaba donga ine Nur Jehan kenchakbeaha. Uni gimin ua uko so-otna man-na gita uko rajani nokona okamataha. Mahabat Khan bilakbegipa Rajputni kotokrangko rime re-baaha, aro Jehangirko tambao nikemung uko rim-aha. Ua dukko man-ahaoba, uni kosako mamung duk on-nade mangsongjachim, indiba

an-tangni janggiko jokatna gitasan ua uko watgija dake donaha aro ua uni kosako namen mandera-beaniko mesok-aha.

Aditani ja-mano Jehangir maibakai jokangaha aro Nur Jehan baksa nangrimeaha. Mahabat Khan an-tangni janggina kenchakani gngangaha ine nike Deccanchina katange Shah Jehan baksa nangrimeaha. Shah Jehanba uko man-sona kusi ong-beha.

Bilsi 1627-o Jehangir siaha aro Shah Jehan singhasono gakatrikskaaha. Nur Jehanna bang'a pensionko on-aha. Ua uni ja-manoba bilsi kolgrikmangna tangkuaha, indiba sason karani kamrango ua mamungkoba dakpana man-jachim.

## NUR JEHAN

Shah Jehanni katako na-simang knamanaha. Uni Dordeni Singhason aro Taj Mahalni katarangko na-simang gisik ra-gen. Shah Jehanni ma-detang saksani katako anga na-simangna agangen. Uni katako knaode na-simang aiao inmangen.

Asiani mapo na-simang Persia a-songko nika. Teheran, ua a-songni ning-o donggipa skotonggipa songjinma ong-a. Geasbeg Edmad Udula, Teheran songjinmani, chu-gipa ma-chongni mande saksu ong-achim. Ja-mano ua kangal ong-roroangna a-bachengaha. Cha-na, ringna korosrangko chur-onga gita man-jahani gimin ua a-songtangko wate India-china songreangna re-chakataha. Uni songreangmitingo uni jikgipa un baksa gngangchim. Ramarango uamang-ni dukan matchotjachim. Uamang-ni ra-bita cha-anirangba bang-jachim. Uamang bang'a salrangon, bolni biterang aro ja-dilrangko cha-esa salrangko re-ataiachim.

Uamang indake songreangmitingo biap damsao Geasbegni jikgipa demechik saksako jako man-aha. Demechik bi-sako aldumittangani mamung chol donggijako nike, Geasbeg mikrontangni mikchirangko u-site demechik bi-sako

bolni ja-pango tuate uni kosako bolni bijakrangko pindape, uko gale re-angaha. Uoni chel-e re-angkujaon bi-sani ma-gipa, ua bi-sana namen ka-pakbeaha. Uni gimin Geasbeg ua bi-sako ra-epilna ine ua bolni ja-pangona re-angpilaha. Uona sokon, ua dal-begipa chipuni ua bi-sako minokna-siengako nikaha.

Geasbeg, chipuko a-rikate, ua bi-sako ra-bapile ma-ani jako uko on-aha. Ua apsan somoio adita badinggipa mande-rang ua rama gita re-baengachim. Uamang, Geasbeg aro uni jikgipana ka-sachake cha-aniko on-aha aro uamang ua badinggiparang baksa India a-songona sokangpaaha.

Uochacha Akbar Delhini Maharaja ong-engachim. Akbarni katako na-simang gisik ra-enggen.

Geasbeg daro kangalgipa mande ong-aha beben; indiba ua gisik gnanggipa mande ong-achim. Akbar gisik seng-gipa mandeko pangnan namnikachim. Uni gimin Geasbeg Akbarni ningo ruutgijan mingsa dal-gipa kamko maraha. Geasbeg uni demechikni bimungko Meherunnessa ine ming-aha. Meherunnessa gita nitogipa me-chikko a-gilsako nik-rongbrejachim. Ua pagipani jako adita leka porako skiaha. Ua Begumrang, chong-motan Musalman rajani jikgiparang baksa rona chol mar-rongachim. Akbarni depante Salim jeko ja-mano Jehangir mingachim, Meherunnessako bia ka-na sikbeachim. Indiba, Meherunnessako Sher Afghan ming-gipa mingsinggipa dakgrikraggipa mande saksu baksa bia ka-atna tik ka-manahani gimin Akbar, Jeangirni skako chur-sokatna man-jaha. Jehangir, pagipana kenani gimin mamungkoba dakdrana pa-sokjaha, indiba gisiktango Sher Afghanni kosako ka-onangako rakiaha.

Akbarni siani ja-mano Jehangir pagipani pal raja ong-rikaha. Ua rokom rokom cholchi Sher Afghan baksa kajiako dakna abachengaha. Jehangir mamanti cholrangchi Sher Afghanko so-otna joton ka-aha. Changsao Jehangirni wat-atako mar-gipa mande saksu. Sher Afghanni mikkangona mongma pagla mangsako watataha. Sher uua on-tisaba kengija, batesa tonualko suile apsa den-achi ua mongmani sundulko chotataha. Uonon ua mongma kene kat ngaha.

Sher, Bardwan songni sason ka-gipa ong-achim. Changsao-Jehangir Sherni kamni gimin sing-rikkie nichia antangni ning-o kam ka-gipa mande saksako watataha. Sher ua mandekoba apsa den achi so-otaha. Unon samitang-tangchini manderang pilakan uni kosako chakataha. Sher uamang baksa dakgrikaha aro uamang-ni giseponiko bang-akon so-otaha. Indiba ja-man ki-tiko antangni janggiko gimaatnasiaha ine uie, ua jakkepsa a-dimuko ra-e uni skoni kosako donaha. Unikoa ua Mecca songjinmachipakna mikkangaha Musalmanrang olakimitingo maibakai chiko man-jacde a-dimuchi ja-su miksuringa. Uni indakmitingo gitap gitap slai goani guli rongbri uni be-eno napaha. Sher a'ao ga-ake siaha.

Sherni siani ja-mano Jehangirni manderang Meherunnessako Delhiona rimangaha. Delhio Meherunnessako mande ra-ani bon-changani griaha. Jehangir-uko bia ka-na skaha, indiba Meherunnessa setangko so-otgipa mandeko bia ka-na sijaha aro una ku-rachakjaha. Uandake Delhini Maharajani nokni ning-o Meherunnessa adita bilsirangko re-ataha. Jehangir ka-sne ka-sne una ka-sae, mande fae mesokrorona a-bachengaha. Ja-man ki-tiko Meherunnessa Jehangirko bia ka-na ku-rachaksrangaha. 1611 bilsio uamang sakgni bia ka-aha.

Meherunnessa da-ode rani ong-aha. Jehangir uni mungko Nur Jehan ine mingjeaha. Nur Jehan katani orto Agilsakni Seng-a ong-a. Nur Jehan rani ong-manoa maha maha dake sukko man-e salrangko re-ataijaha. Ua gisik gnangbegipa ong-achim.

Jehangirni dakbewalrango bang-a gualanirang gnang-achim. Ua gualanirangko Nur Jehanni joton ka-achi bang-a namataha.

Ua a-songko sason karani namnama niamrangko bikot-aha. Bang-a salon manderang Maharajako grongna re-baon cholko man-jac re-apgpilrongachim. Antangko grongna mande re-baachim ine Maharaja uian uijachim. Nur Jehan cholgugao konta ge-sako kadee donaha. Rajako grongna re-bagipa mande ua kontako dokode raja uko grongna ong-katrongachim.

Agana gnan, Nur Jehan rokom rokom gana chinaniko bikotrongachim. Ua golap bibaloniko simalgipa to, Attar of Roses minggipako bikotachim. Uororo uni dam tolaprako gongsetchet ongachim.

Janapbagimin gita Nur Jehan lcka pora mangipa, skia mangipa mechik ongachim. Ua ku-sikarichin poidoko banaina manachim. Nur Jehan inditan gisik gnanngipa ongani gimin Jehangir uni kupatianiko ragija mamung kamkoba dakjachim.

Changsao Jehangir aro uni ning-o donggipa sipaini pamongni gisepo nangrimgrikijani ong-kataha. Indake ongani salrangni gisepo changsao NurJehan aro Jehangir Kabulchi re-augengachim. Unomitingchachao ua sipaini pamong Jehangirko rim-gittangaha. Nur Jehan ua sipaini pamong baksa dakgrikaha, indiba ua dakgrikanio Nur Jehan amako man'e uaba rim-gittangako man'aha. Nur Jehanni budi dakachisa iaupako Jehangir janggi jokaha. Nur Jehan aro Jehangirni ning-o da-o sipai saksaba grichim. Nur Jehanni ku-patia gita Jehangir ua sipaini pamong baksa nangrimgrikpilaha aro bang'a salon Jehangir ska gita rororona man'aha. Sal sao ua re-joioe romitin'o uni sipairangko grongaha aro uamang Jehangirko uie una bampilna aro uni ska gita chu-sokatna tariaha. Unikoa Jehangir ua sipaini pamongko rim-gittangskaaha. Jehangir u'o a jak sokskajaha, indiba uko kema ka'aha.

1627 bilsio Jehangir siaha. Uni ja-mano Nur Jehan bilsio kolgrikman'na tangkuaha. Shah Jehan una bilsiprako lakkolgrik bunga tangko on-rongachim. Nur Jehan ia bilsio kolgrikni gisepo a-songko sa o'i ka'ani kamko jakdungdikjaha. Ua nitoatna ganding chindingko tarjahaha. Segrini ganding chinding bara gipokkosan ganajaha. Ua nama cha-anirangkoba cha'na gisik on-jaha, batesa me surarakosan cha'e salrangko re'ataha.

## AHALYA BAI

Sivaji aro Mahrattarangni katako na-simang gisik ra-enggen. Mahrathi rani saksani bimung Ahalya Bai ongachim.



Indiani maponiko bijatchi joloniko am-e niode nasinang Indore minggipa a-song damsako nikgen. Ua asongni rajarangni upadhi ba mande rani mingani Holkar ong-a.

Malhar Rao Indoreni raja saksa ong-achim. Uan Ahalya Bainsi o-bitegipa ong-aha. Ahalya Bainsi pagipaba raja ong-achim iue nasimang chanchinabe.

Ahalya Bai kangal mande saksani nokoni me-chik bi-sa saksa ong-achim. Changsao Malhar Rao gitim damsako nina re-angaha. Ahalya Bai ua gitimni schoolo poraigipa bi-sa saksa ong-achim.

Malhar Rao ua schoolko nina mangsonge re-angmitingo, ua schoolni skigipa baksa uni agangrikmitingchachao ua me-chik bi-sa re-bae uamang-ni sepango chadengaha. Ua me-chik bi-sa bimang daknangbegipa ba nitobegipade ong-jachim, indiba uni mikkango dingtangmancha rasongni chinchinitoani gnanngchim. Ua me-chik bi-sa sawa ong-achim ine Maharajani sing-on ua skigipa aganchakaha. Ua ia gitimonin angni ripeng saksani demechik ong-a. Uni magipani noko mite me-chik saksa uni demechik ong-e atchigen ine jumangko nikaha. Ia me-chik bi-sa namen gisik gnannggipa ong-a, ua dikdiksani gisepon bangani gimin skie ra-aha.

Uochachan Malhar Rao gisiktango chanchiaha, Ia Ahalya Bai uni nokonan re-anggen. Ja-mano ua uni depante Kondo Rao baksa Ahalya Baiko bia ka-ataha. Ahalya Bai da-ode rajani namchiktang ong-aha. Rajani noko bang-bea me-a aro me-chik nokolrang gnanngchim, indiba kangalni demechik Ahalya Bai, kangalni noko gitachacha, an-tangni jaktangchi nokni pilak kamrangko ka-paaha aro notangko mande ra-e una dangdike on-aha. Pringwalengpition pilakna skang chakate ua kamko a-bachengrongachim aro salgimik bimchipe kamko ka-e salko re-atrongachim. Walo nokoni pilak manderangna cha-aniko tarimanosa ua an-tangan tusirongachim. Malhar Rao, Ahalya Bainsi nama kamrangna kusi ong-beachim, ua uni saani salrangong Ahalya Bainsi agre pilakba una samrangko kanna man-jachim. Bisamitingui salrang intal Ahalya Bai toromna gisik nanggipa ong-achim. Ua paugnan niam gita sriksrik olakirongaha.

Indake ua bilsu sku salrangko re-ataha. Ahalya Bai depante saksu aro demechik saksako baraha. Changsao namangni songo dakgrikani ong-kataha aro ua dakgrikao rangsan gitikgitak Ahalya Bainsi segipa so-otako maraha. Ahalya Bai setang baksa sipana taraha, indiba uni o-bite, chongipa bi-sa gitachacha Ahalya Bainsi ja-o bangope, grape inaha, Ama, nara angko gale bachi re-naka! Na-a angni degipana baten gamchatbata. Na-a ang baksa dongpae kamrangko dakchakho. Indake o-bitetang mol-molbeani gimin, Ahalya Bai segipa baksa sipaoniko an-tangko rakirikaha.

Unomiting Ahalya Bainsi bilsu bilsu chi-chet ong-aieng-pitichim. Uan rajani okni skotonggipa nokmechik ong-aha. Malhar Rao pilak kamon Ahalya Bainsi kupatia gita dakrongachim. Ahalya Bai namen g'sik gnangbegipa mechik ong-achim; uni gimin uni kupatia gita a-songko sason ka-ode songnokna bang'a namgni ong-achim. Malhar Rao song gipinchi songreangode Ahalya Bainsi jakon a-songko sason ka-ani balko gatangrongachim.

1765 bilsio Ahalya Bainsi o-biteba siangaha. Uni jamano Ahalya Bainsi depante raja ong-rikaha. Uni kam aro cholon namen namgijagipa ong-achim. Ua chu ringe chupeke an-tangni ning-o kam ka-gipa manderangko dokrongachim. Ahalya Bai salanti Brahminrangna dangdike onrongachim, indiba uni depante uamangna ka-saninggija dakbeachim. Ua tangka donram basingni ning-o chipu tangako chipu ua basingoniko tangkako dangknoke ra-china uamangko gegetrongachim, uandake bang'a Brahminrang chipu sue sirongachim. Uni gimin Ahalya Bai namen duk man-beaha aro ua dukrangni a-sel ua grape salrangko re-ataha. Indakgipa depante dongana bate ua dongjaon nambata ine chanchie, Ahalya Bai, Ua sichina ine miteo bi-rong-aha. Bean bebe, raja ong-ani bilsu bilsu chikung ong-on Ahalya Bainsi depante siaha. Unon Ahalya Bai dapanteni pal a-songko sason ka-ani balko an-tangan ripeaha. Unon a-songni mongsongbatgipa bilsu ruutbatgipa montri uko chakchikna man-jaha. Ahalya Bai inditan gisik gnanggipa ong-ani gimin uni jako pilakkon pakwatode montrini mamung bil dongjawa ine ua kenaha. Uni gimin ua Ahalya Balko chel-atina melaprudilaha. Peshwa minggipa gipin

Mahratta ma-chongko Ahalya Bains songnokko ra-seke ra-china ua sriksrik didiaha. Ahalya Bai una kenjaha. Uaba gipin gipin Mahratta ma-chongrang baksa ku-monggrikskar antangan mongmani kosako gakate dakgrikna re-ongkataha. Ahalya Bains sipairang Shiprah minggipa chubimani rikamo tom-aha. Ua kene katpilaigen ine Ahalya Bains bobilrang chanchiachim. Ahalya Bains dakgrikani ganding chindingko uike uni bobil montrini gisikoni indaka chanchiani chel-angaha, aro ua antangan kenpilaha. Ua Ahalya Bains sipaini pamongna indine see watataha, Anga dakgrikna mangsonge re-baja; Ahalya Bai uni depante siana kalimenga uko ka-dimeatnasa anga re-bara. Unon Ahalya Bai bobil-tangko antangni songjinmani ning-china rimnapange uamang-ko mande ra'e sokgipa chakaha. Jerangan Ahalya Baiko dakchakna re-baahachim uamang-na boksirangko on-e aro uni ma-manti nama kamrangchi kusi ong-ate watataha.

Ahalya Bai bilsu kolatchina kingking sason karaha. Uni sason ka-mitingo uni ning-o donggipa manderang pilakau kusi ong-achim. Ahalya Bai somoiko indin re-atrongjaha. Ua salantin konta dokmang miteko olakirongachim aro konta skumangna songnokko sason ka-ani kamrangko nirokaha. Pringwalengpition chakate ua mitena on-aniko on-rongaha aro uni ja-mano Ramayana aro Mahabharatko knatimrong-aha. Uororo ua a-songo bi-ame cha-giparang bang-beachini. Ahalya Bai ki-tap poraiako knatimmanode, antangni jaktangchi ua bi-amgiparangna on-aniko on-rongachim. Nokoni sokgiparangna alchengesa ua antang cha-ani me-suariko cha-rongaha. Cha-mano dikdiksa neng-take ka-chariona re-ange bichal ka-ani kamo aro ma-manti gipin kamrangko dakchakaha. Atamna skaug konta gitammang ua olakiao somoiko re-ataha. Iudake kamrangko matchot-man-osa wal chisa bajimango turongaha. Ua ka-saninggipa aro kakketgipa ong-achim. Uni kakket ong-anini gimni bang'a mesokanirang gnaug. Uarangoni mitamko ka-mao janapenga.

Saksa manre cha-begipa kalasini de saksaba grichim. Uni siani ja-mano uni jikgipa me-a bi-sa saksako deragataha. Ahalya Bains ning-o kam ka-gipa mikbokgipa saksa uko

kenate inaha, Na'a angna tangka lakgitamko on-jaode rani nang-ni deragatgipa bi-sako ra-chakjachina gita anga cholko dakgen. Ua badinggipa kalasini jikgipa Ahalya Baiui kakket dakani aro ka-sae dakanirangni gimin knaahaachim. Ua an-tangni deragatgimin bi-sako jako rime Ahalya Baiui kachariona re-baaha aro uni pilak obostarangko ranina tale aganaha. Ahalya Bai pilak katarangko knae ua bi-sako jako rime uni ma'ana aganaha, Ama na'a mamungnaba kenna nangja. Nang-ni segipani pilak gamkon nang-ni deragatgimin bi-sa man-rikgen. Anga ua ka-mikkenatgipa angni ning-o kam ka-gipako nanga gita sasti on-gen. Indi e agane rani uko kamoniko bakkaban a-rikataha.

Biap damgipino adasa sakgri bang'a gamko wate siang-aha. Uamang-ni gisepo adatang dal-gipani jikgipa pilakkoba deragatgija uamang-ni pilak gamrangko Ahalya Baiui jako pakwatna ine re-baaha. Ahalya Bai una inaba, nang-ni segipani gamrangko na'an man-na nanga; anga maina uko ra-gen?

Segri me-chik inaha, Ama rani, anga segri me-chik indita gamko mai dakgen. Nara rani onga, nara ia gamko ra-e maiba nama kamna jakkalbo.

Ahalya Bai una aganchakaha, Na'aba nama kamko dakna man-a; na'a jaktangchi ua gamko nama kamna koros ka-bo.

Unon ua me-chik re-angpile ua gamko nama kamrang-na jakalaha.

Ahalya Baiui ka-sae dakani kamrang agane boratua amjawachim. Ua songreani ramarangni rikamrango pok-kirang, chiakolrang aro donggerangko kitataha. Songregiparang jedakode salakimo asenge biterangko cha-na man-gen, indake ramani santangtangchi ramgipa biterangni holrangko ge-aha. Mathurungrang aro do-drang ringchina gita uni manderang jakrang chiui basingrangko ra-e a-barangni santangtangchi re-toreachim. Do-drang ma-bake chachina mi misian gapgipa a-barangko indin donaiachim. Na-tokrang chachina Nabada chibimao chatu aro gom-rangko galachim.

Ahalya Bai mamung saloba an-tangko mitelako knana namnikjachim. Changsao Brahmin saksu Ahalya Baike mitele adita katarangko poido dake see Ahalya Bainsi mik-kango uarangko mingaha. Ahalya Bai uarangko namnik-jabeesa knatimaha aro ja-mano uarangko segimin lekarangko Narbada chibimo galataha aro ua Brahminna mamung boksisko on-jaha.

Ahalya Bai jedlake ka-sanninggipa ong-achim indaken r-ake sasen ka-gipaba ong-achim. Changsao uni songnokni nung-o donggipa Bil jaini manderang uni raiotrangko duk on-na a-bachengaha. Bilrang a-brini manderang ong-a. Uamang-ko pilukba altue duk on-skana man-jachim. Ahalya Bai uamang-ko ka-sina katarangchi mol-mole namatchengna joton ka-aha, indiba amjaha. Ja-mano uamang-ni kosakona ua bilakgipa sipaini dolko watate uamang-ko namen sasti on-aha. Untaltal Bilrang tom-tombegipa ong-aha.

Indake bilsu kolatchina kingking songnoktaungko sasen kare Ahalya Bai agilsakko watangaha.

### HAZI MUHAMMUD MOHASIN

Governor General Hastingsni somolo dalgipa Musalman mande saksu, ia India a-songni Hindu, Musalman aro indak-gipa pilak jatrangna badita namgniko dakaha, uani gimina anga na-simangna segen. Uni bimung Muhammad Mohasin. Ua 1732 bilsio Hugli songjiumao atchihaha. Da-ororo Calcutta songjiuma dal-gip: ong-a, indiba uororode Huglian dal-batgipa songjima ong-achim, aro Calcuttade chongipa songsa ong-aicngpitichim. Maulavi Musalmanrangni toromko skigipa saksu una Arabic aro Parsi ku-sikko skihaha. Ua Maulavi ma-manti a-songni katarangko aro rokom rokom golporangko agarongachim. Mohasin jerangko changsa knaaha, uarangko pangnaba gualjachim. Uani gimini indine knana man-a ua je katarangko aro golporangko knaaha uarangko pilakkon mukostó man-tokachim.

Adita bilsirangni gisepon ua Arabic aro Parsi ku-sikk uibegipa saksu ong-aha. Uni jakni sea namen nitobeachim

Ua an-tangan jaktangchi Koran Musalmanrangni Sastro ki-tap kingsako seaha. Ua Koran da-ona kingking Hugli Collegeo dongengpiti. Bi-sa, intal ua kangal duk man-giparangko dakchakna joton ka-begipa ong-achim. Uno tangka ba gam dongpajachim, mai choichi dakchakgen? Agana gnang, ua basakoba basakoba Koranni mitam mitam bakko seskae bi-angiparangna on-rongachim aro uamang ua lekarangko mesoke bang-a tangkarangko man-rongachim.

Uni chasongska Musalman panterang ma-manti kusi ong-anirangko dakarango bang-a tangkarangko koros ka-rongachim; indiba Muhammad Mohasin namgijagipa rip-engrang baksa pangnan melirongjachim. Ua namnarngipa ki-taprangko poraiesa somoiko re-atrongachim aro Koranni niamko ja-rikrongachim. Iarangni a-sel ua be-entangni gimin simsakjaenggen ine na-simang chanchinabe. Ua salanti be-enko ranta ka-rongachim; gureo gakate dabrai-rongachim aro tonual ka-anikoba skirongachim Uni gimin uni be-en an-senggipa aro bilakgipa ong-achim. Ua neng-takgija mail kolgrik bunga ba kolatchi dake re-na man-a-chim aro ua uko on-tisaba neng-nikjachim.

Ua gitko namnikbegipa ong-achim aro salantin atamo aro pringo toromni gitko knatimrongachim. Mohasin leka paraiani matchotoa ua songrangchi re-jojona a-bachengaha. Bi-samitingo Maulavini ku-sikoniko ma-manti a songrangni golporangko knaenba ua a-songko nikna ska uni gisiko naaha. Pilakna skang ua Indiani mingsingbatgipa songjin-marangni niani aro nikanirangko niro-rochengaha. Ua ja-mano Persia, Arabia, Turkey aro Egypt a-songrangchi bang-a bilsirangna re-jojoangaha. Mecca songjinmachi re-angani ja-mano-uko Hazi ine mingsingaha. Na-simang ia pilak a-songrangko maponiko niode nikgen.

Muhammad Muhasinni nogipa Mannuja Katuno bang-a Zamindaria ara gnangcim. Uni de sa-a grichim; uni gimin uni segipa sion ua antangan indita dal-a aro bang-a Zamindariko chalaina amsokjawa ine jabape, re-bae ua a-rangko nirokechina, songtangoua re-bapilechina Mohasinko okame chitiko seaha.

Uni bilsa bilsa sotbonga ong-on Mohasin songtung-ona re-bapilaha. Mannuja Katun adatangna antangni kamko pakwataha. Dae Mohasin bangna gamko maraha. Indiba ua skang gitan, soinas gita janggi tange sako re-ataha. Ua pk kimjaha. Ua pangnan poraianio aro toronko chanchianio salrangko re-ataha. Bi-sa intalan na sakgipinko dakchakna sikbegipa ong-achim, indiba indita salrangna na antangni obostan chol gnanggipa ong-achim. Uni gimin na mai cholchi sakgipinrangko dakchakna mangen? Uko chanchirongaha. Dae ua uni skako chusokatna maraha. Kangal duk mangiparangko nikode na jakrame kasae on-rongachim. Pilakba unona re-baode jakari pil-angjachim. Indiba ua bimug ming-ako man-na ba mingsingako man-nade pangnaba kasae on-angrangko dakrongachim. Uni kasae onaniko bang-an uijachim. Ua jena dakchakachim, ua manderangba, basakobade sawa una dakchakaniko on-aha, uko uijachim.

Ua Walo re-jojoe duk mangiparangni dukrangko chel-atna joton ka-rongachim. Agana gnang, ua chang-sao indake re-jojoe romitingo bi-sa saksani grapani kurangko knae, santangtangchiko ame sandioa uko ukilni nok suri noksao, duk mangipa me-chik saksa baksa uni adita bi-sarangko nikaha. Bi-sarang maiko cha-gen ine graptokengachim. Noko mamungba cha-ani dongjachim. Uni gimin mangipa uamang-ni mikkang-rangko nitatarisa mikchi ong-engachim. Iani jamano Mohasinni kasae dakachi uamang dukko man-angcha-jaha.

Changsao me-chik saksa antangni mikgrigipa segipako mamanti katarangchi saiengachim. Mohasin uko knadikaha aro uamang-ni nokni kelki gita, megaprangni kosakona tangkako goataha. Mohasinna agre indake kasae dakgipa ong-jaengwa ine na mikgri uiaha.

Mohasin antangni chakkol me-asa aro me-chik-rangnaba kasae dakgipa aro uamang-ko name jakkalgipa ong-achim. Gazi minggipa me-a bi-sa saksa Mohasinni ning-o kam ka-achim. Sal sao Gazini abitang saaha,

Unon Gazi adita salrangna kamoniko chuti bi-aha. Mohasin una chutiko on-aha aro jolongga ge-sako are una agunaha, Iani ning-o je sam gnang uko kanbo. Gazi nokona sokange ua jolongga ning-o sam baksa adita tangkarangko nikaha.

Manderang jedakode leka pora skiani cholko man-gen Mohasin unaba bang-en joton ka-aha. Hindu aro Musalman me-a bisarangna ua school ge-sako dakaha. Hugli Collegeko uni tangkachin dakchengaha.

1812 bilsio Hazi Mahammud Mohasin siangaha. Siangmitingo uni bilsio bilsio sotchot ong-achim. Ua uni pilak tangkarangko aro Zamindariko Isolni kamua ine pakwatangaha. Uni gamrangko da-o sorkari an-tangni jako ra-e Mohasinni ska gita koros ka-enga. Ua tangkarangchin bang-a Training Schoolrang aro Boarding-rangko dakenga. Musalman panterangua unonikon schoolarshipko on-enga. Ua tangkarangko man-jaode bang-a Musalman bi-sarang leka porako skina chol ong-jawachim. Hugli songjinmao Imambara miunggipa nok te-sa donga. Ua biapo sagiparangna dam gri samko suala. Indaken ma-manti nama kamrang aro ma-manti ka-sae dakanirangni gimin Mohasinni bimungko jringjrotua kiungking gisik ra-gen.

## RAJA RAMMOHUN ROY

Governor General Bentinck an-ebing a-songni manderangna hadita nama kamrangko dakaha uko pilakan uia. India a-songoni saksu maudeba uko maiba maiba kamrango dakelakpaaha. Ua mandeni gimin da-o segen. Brahmo dolot giinin nasimang knaaha. Je dal-gipa mande uo Brahmo dolko bikotchengaha uni bimung Raja Rammohun Roy ong-achim.

1774 bilsio Hugli songjinmao Madbanagar miunggipa songo Rammohun Roy atchiaha. Rammohun Royni magipuko pilakan Pul Thakurani me miugachim; ua namen gisik gnanggipa aro toromigipa ong-achim. Uni giminan



darangan uko manderaaha. Ua namung oniako chak-chikni amiachim. ua Hindu toromo behera-strangachim. Rammohun Hindu toromo name behera-brejani gimin uni mara piluipil uko nokoniko arikataha. Uani gimin golpo minga grang:—

Changsao Pul Thakurani Rammohunko rimbite uni pagipana re angaha. Atchutang Rammohunna puja kaani selpri bijakko onaha. Unomiting Rammohun chongpitichim: ua selpri bijakko chobaie rona a-ba-chengaha. Unon Rammohunni ma-gipa toromko chon-nikani ong-aha ine chanchie uni ku-sikoniko selpri bijakko galate aganaha, Aiao na'a maina Rammohunna tulusi bijakko ong-gija selpri bijakkosa on-a!

Rammohunni paani ma-chong Vaisnibrang aro ma-ani ma-chong Saktorang ong-achim. Vaisnibrang uamangni pujana tulusi bijakko aro Saktorang selpri bijakko jak-kulrongachim. Pul Thakuranini pagipa gisiko namnikiae inaha, Na'a namen senga daksranga; na'a ia bi-sako rime kusi ong-na man-jawa; ia nang-ni bisa torom gri ong-anggen, chong-motau Hinduni toromo dongkamjawa.

Unon Pul Thakurani kenaha. Ua pagipani ja'ao ga'ake grapna a-bachengaha. Unon ua aganaha, Anga jeko aganaha, ua kata mamung dakeba dingtang ong-jawa. Indiba ian nang-ni bi-sa torom dingtangko maniangoba, ua dal-gipa mande saksa ong-gen, aro raja saksa gita mande ra'ako mangen.

Uni jamao Pul Thakurani. Hindu toromko nam-nikbatatia gita Rammohunna Hindu toromni gimin skina a-bachengaha. Rammohunba bi-samitingode Vaisnob toromko mandera'e namnikachim. Ua Bhangbed minggipa Vaisnibrangni torom ki-tapko poraichenggija-de, pangnaba charaniko dangtapjachim ine agamui gnang.

Rammohun songni schoolo poraichengaha. Da-ororo archingni songo pilak sason ka-anirang aro Sorkarini kamrang English kursikhi cholia; indiba uororo Parsi aro Arabic kursikranga choliachim. Uni gimin uni bilai

bilsi chi-gni ong-on ua Patnaona re-angaha. Na-simang Patnako mapo nikua man'a. Da-ororo Calcuttaoni Patnaona rail gario walsanon sokangna man'a, indiba unomiting rail gari dongkujachim. Rail garini salsani ramako, jarachi re-na jasamang nanggenchim. Ramao badita dukko man'na nangachim indiba bilsi chi-gni ong-engon Rammohun indita chel'a songchi re-angaha.

Ua ruutgijan Parsi aro Arabic kusi-krangko skiaha, ua arabic ku-siko Koran aro Geometryko poraiaha. Uan ja-mano ua Benareschi re-ange Sanskritko skie, Sanskrit ku-siko segimin Hindu sastroko poraiaha. Hindu sastroni ja-pang chong-motko poraie, Hindurang jerangko torom niam ine mania, chongmotan; mite dake olakia, sotiko so-a, chong-motan segipani sion uni jikgipako un baksa so-chap-i; bilsi dambedugaengao bia ka-rata; me-asarang bang-e jik kima, iarang mitam Sastroni skiani ong-ja aro mitam namgija bebe ra-baianirangsa ine ua gisiktango chanchiaha. Ka-sne ka-sne toromni gimin uni gisiko chanchiani dingtangrorobaaha. Bilsi chi-dok ong-on ua mite olakianiko jechake ki-tap kingsako seaha. Uani a-selan uni ma-gipa uko nokoniko a-rikataha. Uni bilsi chonengoba Rammohun kenjaha. Unade namasa namachim, maina ua da-o ma-manti gipin gipin biaprangchi re-jojoe, ma-mantirangni gimin uidape ra-na maraha. Pilakna skangba ua Himalaya a-briko bate Tibet a-songchi re-angaha. Tibet a-songo namen sin-bea aro unona re-angna namen neng-ani onga; indimangba Rammohun Buddhist toromko uina gita uchina re-ang-aha. Tibetni manderang gipin a-songni mandeko nik-ode uko so-ote gala. Rammohunba janggi galnasia-hachim; indiba adita Tibetni me-chikrangni ka-sachak-achi uni janggi jokaha. Untaltal ua ia a-songni me-chikrangni obostako nambatatna ska uni gisiko naaha. Bilsi kolgrikni ong-osa ua songtangona re-bapilaha: langal-uni nara pa- uko noko riannapsoba.

Iampako Rammohun English kusi-kehi skina aro English baksa nangrim melina a-bachengaha. Indita bilsi briosa, ua English kusi-kehi skina a-bachengahaoba, na English

ku-sikko namedaken man-aha. Na-simangde schoolo bang-a dakchakaniko man-a, indiba Rammohunde indake dakchakaniko man-pajachim. Indimangba ua Sanskrit, Bengali, English, Parsi, Urdu, Hindi, Greek aro Latin, ia pilak ku-sikrangkon man-achim. Hindurangni mite olakiao ua bebe ra-jachim. Badia toromo mai skiani gnangchong-mot, uni ja-pangrangko poraie ninamanchan ua indita ku-sikrangko skina gisik nangaha. Poraianio ua namen gisik nangbegipa ong-achim, sal sao ua mamungkoba cha-gija biap damsano asonge Ramayana ki-tapko gimikko poraiahachim. Da-ororo bang-a Bengali ki-taprang poido ong-gija searangko nikna man-a; indiba uororo indakgiparang dongjachim, pilakan poido sea ki-taprarasachim. Rammohunsa poido ong-gija seani niamko skichengaha.

Ua an-tangsan skia man-gipa ong'e chu-ongnike dong-aijaha. A-songtangni manderang jedakode skia man-gipa ong-gen uandakeba ua joton ka-beaha. Ua an-tangni school damsas gnangchim aro ki-taprangko chapa ka-atna man-na gita chapa ka-ani kolba gnangchim.

Ia a-songni manderang jedakode name Englishko skina man-gen uandake nama cholko dakchina ua Governor Generalna bakroe chiti kingsako seaha. Ia songo bang-a nangija dakbewalrang gnang. Uarangni gisepo sotiko mania mingsa ong-a. Segipa siode uni jikgipa ching-enggipa ganchio segipa baksa so chapako man-e siparong-achim. Bang-a salrango manderang, segirangko draen so-chaprongachim. Ia sotiko maniani bewalko champengchina ua Governor Generalna bakroe mol-molani chitiko seaha aro ma-manti cholchi namatna joton ka-aha. Ja-mano Sorkari ua sotini bewalko champengaha.

Da-ororo badita manderang England a-sougchi re-angenga; indiba skangode uchi re-anggiparangde songtangona re-bapile meliena man-jachim; maina Englandoni re-angahaode jat re-aha ine uamang bebe ra-achim. Indiani manderangni gisepo Rammohun Englandchi re-angchenggipa ong-a.

## RANJIT SINGH

Governor Generalrang Bentinck aro Dalhousieni somoirango Englishrang aro Sikh minggipa jattrangni gisepo bang'a aro dal'a dakgrikanirang ong'ahachim. Sikh jat aro namang'ni dal'batgipa rajani gimin da'o agangen. Indiani maponiko salgro saliramchipak donggipa noksikoniko Punjab a'songko nibo. Ia Punjab a'songko Nanak minggipa dal'gipa mande saksa atchiaha.

Chaitanyani gimin na'simang uia. 'Nanak Chaitanyani janggi tangmiting apsan chasongon uni janggi tangani salrang ong'achim, chong'motan ua bils 400 A.D. na skang atchiaha. A'songni manderangni toromko olakianio bang'a namgija dakbewalrang g'uangchim. Uaranko nika Nanak songjinma damantichi re'roroe toromko prochar ka'na a.bachengaha. Ua manderangna indine skirongaha, Na'simang Isolkosan olakiaibo; miteko olakianiko aro namgija maniani bewalrangko watgalbo. Nanakni sninggiparang aro uko ja'rikgiparang bang'en ong'kataha, aro ua uko ja'rikgiparangko Sikh ine bimung mingaha. Nanak Hindu aro Musalman dolgnikon dolsan ong'ate nangrimatna skachim. Iani a'selan Musalman rajarang Sikhrangko namen duk on'rongaha; aro mamung dos griba uamang'ko so'ote galrongachim.

Changsao Mogul Maharaja, Tegh Bahadur minggipa Sikh saksako rim'e ra'angaha. Uan Sikhrangni skigipa saksa ong'achim. Ua uko Musalman pil-china ge'etaha aro ma'manti dake uko duk on'aha. Tegh Bahadur Musalman pil'na jechakbeaha. Maharaja uko inaba; Na'a maiba aiao inmananiko dake mesokna man'ode nang'ni janggiko jokatgen.

Tegh Bahadur aganaha, Anga mamung aiao inmanani kamko dakna changja, indiba, angni gitoko indakgipa sam rokomsako gane anga kae sigen, unoni aiao inmangipa kam mingsa ong'katgen. Iako agane ua leka jaksao maiba montroko seenba uko gitoko kae, gitoktangko snilataha. Apsa 'soton uni sko a'ona ga'akaha. Unon ua tom'ani

manderang ua montroko poraie niaha. Uno indine sea gnangchim, Skokode on-jok indiba toromkode on-jajok.

Sikhrang skangde dakgrikna namnikgiparang ong-jachim, indiba Musliman rajarangni duk on-ako chakchikna amjae, uamang ja-mano dakgrikna kang-kare kadraaha aro ja-mano dakgrikna changbegiparang ong-baaha. Da-ororo bang-a Sikhi sipairang gnang. Sikhraug Muslimanrangko bang-en duk on-skaaha aro ka-sne ka-sne Punjab a-song gimikkon dakgrike ra-seke ra-srangaha.

Punjab a-songo bang-a chonchongipa rajarang ong-kataha. Ranjit Singh indakgipa raijo damsau raja ong-achim. Ua gipin gipin rajarangkoba an-tangni ning-o bamate adita dal-gipa raijoko dakaha. Ua poraina aro sena changjachim. Gol-plapo chinrangko dakesa, a-song-ni aro an-tangni hisabko tik ka-rongachim. Ua maude chakandikachim. Bi-samiting somoio uri dal-gipa nuaa uni mikron rongsa gimaatako man-aha. Uni mikkang gimikon uri naani chin gnangchim. Indimangba manderang uko Punjabni Singho ine mingrongaha, aro ua singho mangsa gitachacha bilakachim. Indake ong-jaode ua maikai indita dal-gipa raja saksa ong-na amgenchim. Ranjit Singh Punjaboniko Afghanrangko a-rikataha. Ua Multan aro Kashmir a-songrangko ame man-aha. Englishrang gita ua sipai dolko bikotaha. Ua pangnan an-tangni raiotrangko simsake rakiaha. Uni gimin uni raiotrangba uko namnikbeachim.

Ranjit Singh Englishrang baksa ripeng dakbeachim. Ua nangrimaniko pangnaba be-atjaha. Sal sao English kam ka-gipa saksa Punjabona re-baon Pula Singh minggipa Sikh saksa uko rim-aha, indiba English kam ka-gipa uko a-rikataha. Unon Pula Singh tonualko de-e Ranjit Singhona re-ange aganaha, Maharaja, Englishrang an-chingko kratcha-ataha. na-a uamang-ko sasti on-jaode, anga da-on nang-ko aro natg-ni pilak manderangko so-ote galgeni.

Ramram mandeni ku-sikoniko indita raka katarangko knae Ranjit Singh ka-onangjaha. Ua aganaha, Englishrang baksa anga ripeng ong-enga, anga uamangko gimaatna man-ja. Angan skotaugko snile on-enga angni skoko sote

galbo. Pula Singh kratcha-aha aro untaltal Ranjit Singhna bamaha. Ja-man ki-tiko ua mande Ranjit Singhni mongsongbatgipa sipaini pamong ong-aha.

Ranjit Singh mamung kamkoba, mamung saloba dontongrongjachim. Je somoini je kam, uat somoio ua kamko chu-sokratrongachim; aro gong-rake dakronga-chim; indiba kamde namen chu-sokachim.

Changsao Ranjit Singh, Lord Bentinck baksa sipairangko niengachim. Unon chet baji ong-achim. Ranjit Singh pangnan chet bajio cha-rongachim. Uni gimin ua ua somoion cha-na chakate re-angaha aro tiktak somoio cha-a ringa matchotman-o re-bapilaha, aro Lord Bentinck baksa asongepilaha. Ua banga biaprangon dakgrikna nanga-chim, indiba ua tom-tome pilak kamkon chu-sokataha.

Bilsil sotbri sason ka-ani ja-mano Ranjit Singh bilsil 1839-o siangaha. Ranjit Singhni ja-mano Sikhraugni gisepo raja ong-e sason ka-na kragipa mande saksaba grichim. Sipaini pamongrangni gisepoba bamate sason ka-na bil man-gipa saksaba grichim. Uamang mamungba a-sel gri Englishrang baksa dakgrike Sikh rajjoko gimaataha.

### CHUNDRA LELA

Bilsil sotskumang re-angaha, Indiani salgroni ario, Himalaya a-brirangni gisepo, Benares minggipa songo dal-bea kusi ong-aniko dakengachim. Dolni dol nitoe ganat chinatgimin mongmarangko dongdreataha, aro Benares song jeo donga, uona Nepal songni pilak manderang bang-a salna dal-begipa alaona re-batokaha. Iaranga pilakan bilsil snisan ong-aienggipa Benares songni dal-gipa Brahman kamalni demechik Chundra Lelani sakgipin man-e cha-gipa Brahman kamalni depanteko bia ka-engani gimin ong-achim. Ua chonbeengani gimin uko uni segipani nokona rang-san watatjana tik ka-aha. Uni pagipa skia man-begipa ong-a aro mamung kamko dake rona choljoksanga. Unomating chasongo Indiaa me-chik

bi-sarangko schoolchi watrongjaoba Chundra Lelana pagipa sena aro poraina skiaha.

Chundra Lela bilsi sku ong-on, bilsi gnina skang uni bia ka-ani dal-gipa alao dal-bea kusi ong-aniko mari ~~the~~ gita, salsao una dal-hegipa kalnimani sokbaaha. Uni segipa siaha. Segipani siani a-sela jikgipani pap dakani a-sel ong-a; segipa baksa dongmitingo papko dakkujaoba atchiramasao jikgipa pap dakahani gimin ong-a ine Hindurang beberaa. Uni gimin me-chikde kalnimna aro uni kniko rokna nanga ine chanchia, aro jatang ong-gija gitasa uko jakkala. Da-ororoni uigipa Hindurang ia dakbewalrangko gimaatna joton ka-enga, aro segirangko skango gita dakjaha.

Chandra Lela bilsi chi-gni ong-oa uni pagipa siaha. Uni sinasion ua Chandra Lelako okame una chabi chong baksako on-aha. Una on-gimin chabirangna meligip bakosrangko oon ua uni segipaoniko man-rikgipa sonarangk man-gen ine uni pagipa aganangaha.

Bilsi gipino uni pagipani poraina skianggimin rongtalgipa Hindu toromni ki-taprangko poraie ua uni bang-bati somoiko re-ataha. Rongtalgipa biaprangko olakitokodi jeba paponi jokgen ine ki-tapo sea gnangchim. Chundra Lela an-tangko namen papi, ong-jaode uni segipa sikujawachim ine chanchiaha. Uni gimin ua dal-batgipa Hindun mite nok te-briona bi-na re-angna mangsongaha, te-sa Indian salaram bon-chotao, te-sa saliramchipakni ario, te-sa chel-begipa salgipengo aro te-gipin salgrochi chugipa Himalaya a-brio dongachim. Ia mite nok te-briona re-angna Chundra Lela hajalni hajal chel-gipa mailrangke ja-ach re-na nangachim. Indiba ua uni uigijagipa papna kemu ka-ako man-na mamunggitaha nikjaha.

Uni mangsongako uide uni ma-drang uko re-na watjawa ine Chundra Lela uiaha. Uni gimin ua uni ripeng sakku segirangna agre darangnaba uni mangsongako aganjaha. Uamangba un baksa re-pana kusi ong-beaha; aro pring gitam bajio pilakan tusiaoni miterakujamitingoa nokon sriksrik katangtokahu. Chundra Lela pagipani donaggina.

chabirangchi bakosrangko kulie man-gimin sonarangko ro-ro-gipa jengpongrango gape brae sakprakprakan kangkareo wentongtonge gane re-angaha.

Uamang re-angon uni rongtal-gipa ki-taprangoniko skia man-aha gita uni gangipa malako chantaitaaha. Ua rongtal-gipa chibima damantio dongdike uni papko talatna man-na ka-donge auangaha, aro re-pak-gipa mite nok nokantiko mitena aro kamarangna on-anirangko on-e olakiangaha.

Ua bang-a bilisrangna Indiao songrebeaha aro jaman ki-tiko bon-kam-gipa dal-gipa mite nokona soke dakgimin miteri mikkango tugope olakiahaoba ua katchaaniko man-jaha. Unoni joljolan ua me-chikma saks aro fakir saksako grongaha. Ua maidake be-entangko duk on-anichi miterangko namnikatna man-gen uko una aganaha.

Uni aganako re-chake Chundra Lela ding-kario antangni sepango wa-al dambongako so-duule sal-gimik gimik sal-rakao a-sungaha. Sin-kari sakbea ua sin-kari gimik ja-ku ong-e tu-gipa chio gitok mangmangko nastari walgimik gimik asonge uni rongtal-gipa malako chantaitaie dongaha. Indioba tom-tomani uona nabajaha, aro bilisi gitam re-angmanoa ua uni dakna man-a kakketkode daktok-man-aha ine nikaha.

Ua uni bakrobegipa songreaniko matchotmano Midnapuro dongna re-angaha, aro ua biapni dal-dalgipa ma-chongni mitam me-chikrangna rongtal-gipa ki-taprangko dikdikšana skiaha. Bon-kameo ua Hindu toronko, chong-motan antangni bebere-ako gimastaha; aro sal sao uni mite dakarangko re-chimonape ongipa jetri me-chik saksana on-e inaha, Na-a skode iarangko olakina man-a, anga bang-a bilisrangna uarangko indin olakie songraha.

Sal sao Chundra Lela uni ripeng saks baksa rona re-ungoa ripengtangni Kristian ki-taprangko poraiengako nikaaha. Americani skigipa saks uni ripengna ki-taprangko on-aha ine uoa ua uko grongna man-genma ine ua singaha. Rustigjan ua skigipa Chundra Lelako grongna re-angaha aro nestro kingako una on-aha. Uoson manngang Chundra Lela Sastroko nikchengaha. Sal wal Chundra Lela ua



Sastroko poraiaha aro uni chatrirangni Hindu torom ki-tapko poraie on-uko knatimna re-baon ua uamang-na Sastrokosa poraie on-skaaha.

Ia ki-tap gital nambea ine ua uamang-na agunha aro uamang-ba uko namnikpaaha, indiba uamang-ni segiparang knaoa uamang-ko kenataha aro Chundra Lelakoba, ka-mikenataha.

Anga kenja. Na-simang angko rim-na man-jawa aro neng-chaknabe. Na-simang an-tangtangba Kristian ong-ode namachim ine ua uamang-na aganchakaha.

Isol kenatachi ong-ja inliba ka-saachisa sason ka-a aro uni dedrang mamung saloba una kenja nangja ine ua uamang-na tale aganaha.

Jagnimangna ua Sastroko poraibemano Missionaryrangona re-ange napbolatako man-aha.

Unikon joljol uni gnangrangko ra-e songni mondolini pamongni nokona katangaha. Uni Kristianrang baksa dongengako rang-san jangangaha aro uni bang-a ripengrang aro chatrirang uko uamang-ona re-angpilchina mol-molbeaha. Indiba ua Hindurangni skigipa ong-chajawaha maina ua da'o Hindu ong-jajok, Kristiansaha ine uamang-na inaha. Uni katako mangrakatna gita pamongni jikgipako chi pialasa ra-baataha aro uko uamang-ni mikango riuge mesokaha. Hindurangni gisepo Kristianrangni dangtap-gimin ringchakanioniko Hindurang ringode jat re-aha ine chana aro dal-bea papko dakaha ine chanchia. Uni gimin Chundra Lelani ripengrang uko wate katangtokaha.

Napbolmero Chandra Lela Mission Schoolo me-a aro me-chik bi-sarangna skiaha. Ua uni gital janggi tangano kusi ong-beaha aro ua manderangna Sastroko poraina aro skina gisik nangbeaha. Bon-kamao uni runta salna am-enggipa Isolko man-aha, duk ong-gipa Isol ong-ja, inliba Pagipa. Ua an-sengaha aro kakketgipa rangko jeko ua man-aha uko sakgipinrangna skina nanga ine ua uiaha. Jakchakan salo ua uni Sastroko ra-e nokoni re-ange sorok rango bang-a tokni tok manderangna Isolni Nama Katako aganprakaha aro manderang uko dongduule knatim rongaha.

Ua salode salgimikan cha-na mangmangan neng-takjachim; walosa ua uni cha-aniko song-a aro cha-a. Uni gimin missionaryrang uko pilak kamoniko jakgitel ong-ataba aro ua uni janggi tangni katarangko aganatskaaha, chong-motan, maikai ua re-jojoaha aro ka-saninggijagipa Isolna kene an-tangko duk on-aba aro uni namnikako dakjaode mairongpile dal-begipa sastiko una on-gen ine bebera-aba aro bon-kamao maidake bebegipa Isola uni dedrangni Pagipa ong-a aro sakgipinrangko dakchakachi uko dak-chakna aro ka-sanasan nanga ine uiaba.

Chundra Lela buchuma ong-e re-rorona amjahaoba Missionni manderang una uni janggi tangani bangki salrangko dongchake re-atchina nok te-sako rike on-na tik ka-aha.

Uamang una inaha, Nang-ni nokna chingni tik ka-gimin biapko niebo, uan te-gatchu ja-pango, uano na-a tom-tome dongna man-gen. Ia chel-begipa biaposama? Na-simang angna nokko rike on-paode ramasamosa, anga buchuma ong-bee re-na neng-beahaoba re-pakangenggipa manderangna skina man-na gita unosa rikbo.

Uni gimin nokko ramasamo rike on-bebaha aro man-ahaoa ka-sroke rang-spee inaha, Da-ode anga tanga dipet skina man-gnok.

Ua tangenga dipet skiaha aro uni kamko chu-sokate kusi ong-bee siangaha. Chundra Lela an-tangnasan tom-tomaniko ra-aijaha indiba ua bang-a manderangna kakket aro ka-srokao janggi tangani skiaha.

---

## BAK II

### ROMULUS ARO REMUS

Italy a-songo Alba minggipa songjinma damsa donga. Ua songjinmani kosako sason ka-gipa raja saksa dongachim. Uni Adatang namen namjachiin. Ua an-tang jonggipani mukutko ra-sekenba an-tangsa Alba songjinmani kosako raja ong-na skaha. Ia rajoni ning-o namgijagipa ripengrang dolsa dongachim. Uamang Albani rajani kosako dakgrike uni songnokoniko uko a-rikataba. Uamang rajakosan a-rikataijaha, indiba uni demechikni depante jonja sakgnikoba raseke Tiber chibimao uamang-ko galchina sipairangko ge-etaha.

Tiber chibimara chi banengachim. Ua watatako man-gipa manderang bi-sarangko tu-begipa chio galna sijaha maina uamang ua bi-sarangna ka-saaha. Uni gimin uamang tuchakanio bi-sarangko chibimani rikamo donari noktangtangchi re-bapilaha. Ruutgijan ua chibimani chi rookangaha; aro dramrang ran-baoa, tuchakani a-dubek ran-ao skataha.

Unomiting saksa ka-sanninggipa mes nirikgipa ua gita re-pakbaaha. Aro dal-begipa dumbur bolni ja-pango tuenggipa bi-sa sakgniko aro uamang-ni sepango se-el mangsa tuengako ua nikataba. Ua ka-sanninggipa mes nirikgipa se-el bimako a-rikatna ine uchipakna bakbak chaangaba. Mes nirikgipa sepangona sokangahaon se-el bimara bi-sarangko ma-gipa gita alduenga ine nikaha. Indiba se-el bimara mes nirikgipako nikou una kene bolgrimchi katangskaaha.

Unon ua mes nirikgipa bi-sarangko de-tome noktangchi re-angaha. Aro jikgipako ua bi-sarangko namedake niroke alduchuna aganaha. Jikgipaba setanuni agana gita dake uamang-ko alduaha. Uamangko saksako Romulus aro sakgipinko Remus mingaha. Uamang dal-kalabaoa mes nirikgipa uamang-ko mes, do-bok aro matchu jukrangko

nirikna skiala; indiba uamang burungo sikar ka'e ronasa namnikbeachim. Uamang ka-dongbegipa aro bilakbegipa panterang ong-achim aro uamang-ni ka-donga aro bilakani gimin pilakhin mingsingani sokangaha. Uni gimin bang-a manderangan uamangui daka kamrangni gimin bang-bea katarangko knasotokaha.

Adita ruutani ja-mano uamang-ni gimin rokom rokom agananirang a-rikatako man-gipa uamangni atchutangona sokangaha. Ia agananirangko knae uamang-ara an-tangni demechikni depanterang ong-achimkon ine atchutang chanchiaha. Ja-mano bi-sarang an-tangtangba an-tangtangni atchiani katarangko knae, an-tangtanga rajani depanterang ong-achim ine uina man-aha. Unon ua ka-saninggipa mes nirikgipaba ua bi-saranga a-rikatako man-gipa rajani su-giparangsa ong-achim ine uialia.

Ja-mano bi-sarang dala chu-sokahaoa atchutangko a-rikat-gipa ka-saninggijagipa rajako ajak sokna skaha. Indaken uamang adita ripengrangko chimonge ua namgijagipa rajako dakrikna re-ongkataha. Uamang songjinmako ua ka-saninggijagipa rajaoniko ra-seke an-tangtangni atchutangona re-angaha. Da-o an-tangni songnokoniko a-rikatako man-e dongenggipa raja budepa an-tangni songnok gitchamo mai obosta ong-aha uani gimin knasona man-aha. Ua raja an-tangni pilak ripengrangko an-tangona okame maikai una ka-saninggija adatang uko uni songnokoniko a-rikataha aro uasan ong-aia uni depanterang aro su-giparangkoba maikai, uoniko ra-sekaha uarang pilakni gimin uamang-na aganeaha.

Ua uarangko aganon adita panterang dolsa re-bae uamang-ni atchutangan Albani raja ong-taipilgen ine aganaha. Indiba ua adasa an-tangtangni atchutang baksa songdongna sikjachim. Uamang an-tangtangna songjinma damsako dingtang rike dongna mangsongaha. Uamangko jeo mes nirikgipa nikaha ine uamangna aganaha ua bolni sepangosa an-tangtangna songjinma damsako rike dongna skachim. Ua dal-begipa bol da-oba dongengpiti. Ua bolko duule uamang-ni nokrangko rikaha aro dal-dalgipa sorokrangko dakaha. Indiba ian uamang-na dukni, uamangni

ua songjinmako rikmitingo maibakai Remus so-otako man-aba. Uni siani ja-mano manderang Romulusko uamang-ni diligipa dake donrikaba.

Uamang ua nambegipa aro dal-begipa songjinmako rike matchotahaon, uno sason ka-gipa dake Romulusko donaha. Romulus bang-a bilsirangna sason ka-ani ja-mano siangaha. Uan gisik gnanggipa, dal-gipa aro ka-dongbegipa raja saksa ong-achim. Uni siani ja-mano manderang ua songjinmako, uko rikdilgipani bimungchi ma-rape, Rome ine mingaha. Aro manderang ja-mano ukon mite gita chanchiaha aro olakiaha. Aro da-ona kingking ua songjinmako Rome ine mingsingengpiti.

## PERSIANI RAJA KYRUS

An-ching Media a-song aro Mediani manderangni gimin Sastrooniko poraina man-a. Mediani manderang Media a-songo ruutbea chasong intal dongachim aro uamang-ni bon-kamgipa rajara gipin manderangoni dingtang ong-achim. Ua pangnan also inmanpilgipa jumangrangko nikrongachim. Indaken an-tangna maiba a-sel ong-gen ine ua kenbeachim. Uni jumangrangoni mitamranga uni Persiani rajani jikgipa an-tangni demechikni giminan ong-achim. Uni demechik depanteko ba-gen aro uan Persiani raja ong-gen aro Media manderangni singhasonkoba man-gen ine ua wal sao jumang nikaha. An-tangna agre sakgipinko raja ong-atna sikjani gimin ia jumangko ua namnikjabeaha.

Bi-sa atchiahaon demechikni nokchi ua bi-sako ra-echina an-tangni ripeng saksako watataha. Uni ripeng rajani mes aro do-bok jakrangko nirikgipa mandena ua bi-sako on-e. Na-a ia bi-sako burung a-bimanduona ra-ange galebo, maina ian rajani ska ong-a, na-a uko dakjaode, raja nang-ko ka-onanggen ine ua mande aganaha.

Mes nirikgipa bisako noktangchina ra-angaha. Uni jikgipani bi-saba unochacha sisoaha. Unon uni jikgipa uni ba-gimin bi-sako nikarion mikchi ong-e ua bisako jako de-tome ku-dimaha. Ia bi-sako angoniko ra-angnabeaha.

hai an-chin<sup>o</sup> uko an-chingni de gitachacha akluna ine uni jikgipa uko kumongaha. Uni segipaba ka-saminggipa ong-achim. Ra-ange galechina raja hukumko on-jaode, anga ua bi-sako rakina namnikbegenchim, maina anga uko galena sikjasrang ine segipa aganchakaha

Indide an-chingni sigimin bi-sakon a-brichi ra-ange galebo, unon mamung ong-jawaba. Ia tangenggipa namenggipa bi-sako angna on-bo ine jikgipa aganaha. Segipaba indake daknan ebanchiengachim. Ua jikgipana chongipa bi-sako on-aha aro uamang-ni sigimin bi-sani manggisiko ra-e a-brichi galeaha. Unon ua rajani sepangona re-ange bi-sako donegipa biapko aganaha. Aro sal gipino manderang re-ange ua bisako gopeaha aro, A-brichi re-angate galgimin bi-sa siaha aro chinga uko gopaha ine manderang rajana aganaha.

Unon ua bi-sa janggi joke bilakgipa ong-e dal-rorobaaha. Uni bimungko Kyrus mingaha. Ua ka-sachakgipa mande aro uni jikgipa uko aldumittangahani gimin ua bi-saba uamang-ko kusi ong-atgipa ong-e dal-rorobaaba. Kyrus bilsa chikung ong-on salsao song damsao kal-grikengachim. Unon kal-grikrimskagipa bi-saskarang ia kal-grikanio uko raja dake donaha. Bi-sarangoni mitamrang sipai aro mitamrang montri ong-na nangen ine ua bi-sa aganaha Indaken uamang pilakan kusi ong-e kal-griktokaha. Indiba Mes nirikgipani bi-sanade angade bamjawa ine bisa saksas aganaha. Uan Media bi-sa ong-achim, aro uni pagipa ua a-songni dal-gipa mande saksas ong-achim.

Ua indake manijaon uko sasti onchina Kyrus sakgipin bi-sarangko ge-etaha. Unon ua bi-sa ka-onangbee antangni pagipana agana katangaha. Uni pagipa gaoradegipa mande ongani gimin rajachi bakbakan re-ange antangni depanteko duk on-nasigipa bi-sani gimin una aganaha. Indake namgijagipa bisako bakbakan sasti on-genchim ine raja aganaha. Indiba Kyrus antangni demechikni depante ong-a ine ua uijachim. Raja Kyrusko antangona rimbachina mande saksako watataha. Raja Kyrusko nikarion ua bi-sako aro uni ka-donganiko nika uko namnikbeaha. Ia bi-sa sawa? ine ua singaha, maina antangni demechikni mikkang gita daka ine ua uiaha.

Raja pilak manderangko watatmano ua mes nirik-gipako okamataha. Ian sani bi-sa? ine uko singaha. Oh raja, ian angui bi-sa ong-a ine kenbee ua mes nirikgipa aganchakaha. Angua bebeko aganbo ine raja aganaha. Unon mes nirikgipa rajani ja'o bamgope kema ka-china mol-molaha. Ian nang-ni demechikni depante ine ua rajana name aganaha.

Unikoa raja gisik gnangbegipa manderangko okamataha. Uamang Kyrusko banoniko nikaha aro maikai an-tangui nokona uko rimbaaha uni ja-pangko sing-aha. Ua bi-sachi mamung dukkoba man-jawa ine gisik gnangbegipa manderang rajana aganaha. Unon raja Kyrusna ka-sachakaha aro an-tangni demechikchi, chong-motan Persiani ranichi watatpilaha. Uni ma'a paa detangko man-pile kusi ong-beaha.

Kyrus ma'a paani songo dongmitingo ua aratgipa bi-sa ong-jachim aro dongua namnikachim, indiba ka-sagipa, nambegipa mes nirikgipa aro uni jikgipako ua mamung saloba gualna man-jachim. Kyrus dal-gipa mande ong-gen ine pilak manderang uiaha. Aro ja-mano ua raja ong-aha, maina ua Mediarangni namgijagipa raja baksa dukgrike uni songnokko uoniko ra-scke rajako patoko donaha. Indake budepa rajani jumang tik ong-aha. Jihudirangko uamang-ni a-songtangona watatpilgipa raja ia Kyrus ong-achim ine an-ching Sastrooniko poraie uina man-a.

## SOLON

Solon Athensni mande saksa ong-achim aro ua Athensko tom-tomatchenggipa mande ong-achim. Maina uni ja-mano dal-a ma-chongo atchigipa gaorade-gipa aro man-e cha-gipa manderang ongipa kangal manderangni kosako duk on-na man-brejachim. Ua pantemitingo bang-a songrangko re-roroaha aro Athensona re-bapilon uamang-ni bobilrangna bamfachina an-tangni songni manderangko skiaba aro uamang-ko adita chu-sokgipa dakgrikanirangona dilangachi mingsingako man-aha.

Ja-mano dal-gipa manderang aro kangal manderangni gisepo nangrimgrikgijanirang ong-katon, uamang pilaknan namgni ong-na man-na gita maiba niamrangko dakchina dolgnian uko mol-molaha.. Unon ua an-tangni dakgimin niamrangko aro ge-etanirangko bilsu chikungna kingking dintangatgija manigen ine manderangko ku-rachakat-chenge niamrangko dakaha. Unikoa ua bilsu chikungna kingking gipin songchi re-angaha, maina uan songtango dongariode, manderang uni dakgimin. maiba maiba niamrangko dintangatchina an-tangko mol-molgen, indiba songgipinchi katchipe dongode, manderang uni dakgimin niamrangko bilsu chikungna kingking manienba uarangko namnikgen aro galna sikjawa ine Solon uiaha.

Ua re-jojomitingo Lydiani raja Croesusni nokona sokangaha. Croesus raja uo bang'a sing-anirangko singaha aro ua name aganchaktokna man-ani gimin gisik gnangbegipa mande ong'a ine mesokaha, Croesus raja Solonna an-tangni pilak gam aro gamchatgipa bosturangko mesokmano an-tangko kusi ong-batgipa mande ong'a ine Solonni aganchakaniko man-gen ine ka-donge, Agilsako donggipa pilak manderangni gisepo sawa kusi ong-batgipa mande ong'a? ine Solono sing-aha.

Athenso donggipa Tillusan kusi ong-batgipa mande ong'a, maina ua mande ra-ako man-e janggi tangaha aro gisik gnanggipa depanterangko aro nitobegipa demechikrangko ba-aha. Aro jaman ki-tiko ua songtangko amate rasong chae dakgrikani a-baon siaha ine Solon aganchakaha.

Unon Croesus raja minggipinko sing-taiaha, unon Solon indake aganchakaha, Cleobis aro Biton, maina uamang ma-gipana ka-sabeako mesokahani gimin uamangni ma-gipa nambatbegipa patianiko Isolo bi-chakaha aro sal sao uamang sakguian daman siaha. Kusi ong-e sianggipa mande kusi ong-sranggipa mande ong'a, aro pilak mandekoba sikujana kingking kusi ong-gipa ong'a ine mingna man-ja. Croesus raja Solonni aganchakanirangko knae alao inmanbeaha aro Solon gisik gnangbegipa mande ine ua uichongmotaha. Atchiani salna bate siani salan nambata ine Sastroonikoba poraina man-a (Agan. 7: 1)



## SOCRATES

Pericles aro Alexanderui dongani gisepegrik somoio manderangni gisepo uibatgipa mande sakgitam dongachim. Uamang-uu gisepo skanggipa Socrates ong-achim jean Periclesni Athenso mingsinggipa ong-na a-bachengmiting-chachao atchiaha. Saksara Plato, aro gitanggipa Aristotle ong-achim. Uamang pilakan uianiko skie ra-na namnik-giparang ong-achim. Uamang a-gilsakni man-gnirangna bate bebeko aro namako uina sikgiparang aro manderangko chanchiatna dakchakgiparang ong-achim. Aro indake daknara mitam manderangni chanchia gita altuani ong-gija neng-beani kam ong-achim.

Plato aro Aristotle bang-a ki-taprangko seaha. Socratesde mamung ki-tapkoba seade sejaha, indiba an-ching uani gimin uianiko bang-en man-na ama. Maina ua aiao inmanpilbegipa, uko namnikbegipa mande Xenophon minggipa uani gimin ki-tap kingsako seaha, aro Athenso donggipa saks mingsinggipa mande aro ma-manti ka-dingani tamasarangko dake mesokgipa uko ka-ding-stekrongachim aro mande jinmarangkoba ka-dingatpana ine jinmani mikkangoba, uni kamrangko dake mesokrong-achim. Aro una agreba uan maironggipa mande ong-a uko Plato an-chingna tale mesokaha. Maina Plato an-tangni bang-a ki-taprangkon agangrikenga gita dake seaha, indaken Socratesko sakgipin manderangna aganenga gita dake mesokataba.

Plato mamungni gimin manderangna skinasiengoba, ba ua katarangko an-tangoniko aganasiengoba, pangnan uko Socratesoniko skia man-aha ine aganrongachim. Uni gimin an-ching uachiba Socratesni aganani bewalrangara maironggipa ong-enggen uko uina man-a Socrates namgipa aro gisik gnanggipasan ong-aigija chalakba ong-achim, aro uni ripengskarang uko namen namnikbe-achim. Greek manderang pangnan, mikkang nitogiparang ong-ani gimin mikkang nitogijagipa mandede gisik gnanggipa ong-enggen ine bebera-na neng-achim. Socratesni mikkangde nitofachim, indiba uan bilaka aro

mangrakachim. Aro Athensni sipai kotokraung baksa dakgrikna re-angna nangani salode uan namgipa sipai ong-achim. Indiba uan kore chae mamungkoba uigija ong-e sibokrongachim aro mikselode, mamungba onz-kuja gita dake dongaiachim.

Uianiko man-na naungan a-gilsako pilakna bate nangbatgipa ong-a, aro an-tangko uianiara pilakna bate nangbatgipa uiani ong-a ine Socrates chanchiachim. Maina mande baditan an-tangko uia, inditan ua an-tangni uigijako aro an-tangni chanchiao gualaniko nikachim. Ua pangnan manderangni chanchiani ja-pangrangko sing-e uamang-ko chanchiatronga aro uamang-ni chanchiani ja-pangko nikatna joton ka-rongachim.

Indiba mamungba ja-parig gri chanchigiparang uko namnikjaha, aro uamaug-ni nama ine chanchie dakronga-kamrangko namja ine panterangni jena a-bachengon Athensni panterangko Socrates namgijachina dilangenga ine manderang matnangaha. Uni gimin manderangko namgijachina dilangenga ine matnange Socratesko bitchalona rimbaaha, aro uko bitchal ka-e hemlock minggipa bisiko ringe sichina uko ge-etaha. Indiba uni bisiko ringe siangengmitingo uko nirikchina uni ripengrangko on-aha. Aro indaken ua an-tangni jaktangchin bisiko ringe sinasiengmitingo, sianina kengijan kusi ong-bee ua an-tangni sepango donggipa ripengrangna skiaha. Aro uni skiani mangsongara uamang-na dakbakna aro mande donggipa janggi be-enni sioba, sigija ong-aniko an-tang gitachacha uipachinasa ong-achim.

Plato Socratesni sninggipa ong-achim aro uan Socratesni ja-mano an-tangan je skianirangko uoniko man-aha uarangko manderangna skiangaha. Uni sea ki-taprauga gisik gnangbeani ong-a, aro uarangko ma-sie poraigiparang uarangko namnika. Indiba basakoba basakoba uaranga uina namen uong-beani ong-a, maina uni talatna mang-songaranga basakobade gisik gnangbegipa manderangkoba bingbangatani ong-a.

Platoni ja-mano Aristotle ong-katskaaha. Uan Platoni sninggipa aro Alexander the Greatni skigipa ong-achim.

Uaba bang'a ki-taprangko seaha, indiba uni chanchianiranga Platoni chanchianirang gita ong-jachim. Aro uan mong-songde basakobara uianiko namnikgiparang, Plato gita aro basakobara Aristotle gita chanchina namnikani gimin ong-jachim. Uni gimin pilak uianiko namnikgiparangko Platonist ba Aristotelian, chong-motan Plato ba Aristotle, ia sakgnini gisepo saksasikni chanchia gita chanchigiparang ine minga. Platoa pordoko sea gita chanchigipa ong'a, aro Aristotlea scienceni gimin uigipa manderangni chanchia gita chanchigipa ong-jachim.

## HOMER

Changsac Odysseus minggipa bilakbegipa aro chalakigipa mande saksu gnanngchim. Bilsu hajalgitam, re-angaha Greece a-songni mikgrigipa Homer minggipa saksu koidoko segipa Odysseusni gimin ro-gipa boidoko seaha. Odysseus maikai bilsu chikungna re-rotoaba aro uni ja-mano Ithaca chichango donggipa uni songtangona re-bapilaha uko ua ia koidoo agana. Uni re-roromitingo ua bang'a duk sukrangko man-aha. Cyclops minggipa mikron rongprak dongaigipa skalangni a-songo uni dukni gimin anga da-o na-simangna agangen.

Ia namen ka-saninggiagipa skalang chel-bea chichango dongachim. Uamanu bolrang baksa apsan ong-pile changroachim, aro sakprakan mikkingni jatchio tom-betgipa mikron rongpraksan dongaiachim. Uamang mes aro do-bokrangko jilla, jerangko a-barango salgimik cha-amata aro walode antangni dongram rong-kolona mobapilrong-achim.

Wal sao Odysseus aro uni kalasirang uamangni jahaso ia mikron rongpraksangipa skalangni a-songona chobaaha.

Uamang uamangni jahasoni ong-one sengkujana kingking sagalni rikamo tusiaha. Sal gipino Odysseus aro uni kalasirangni sakchigui pringwalni chakate draka bitchilan gapgipa bigilni basing aro cha-anini dokra ge-sako ra-bite Cyclopsni rong-kolona sokjana kingking re-angaha.

Ia Cyclops noktangoni chelao uni mesrangko mirikengachim, unomiting Odysseus aro uni kalasirang uni rongkolo nape matchu soka gapgipa donchakanirangko aro noluingo dongenggipa mes aro do-bok bi-sarangko ukaha. Mes aro do-bok bi-sarangko antangtangni jahasona moerana kalasirang Odysseuso mol-molaha. Indiba ua uamangko iudake dakua on-jaha. maina Cyclops re-bakujana kingking ua rongkolon sengsona ua uamangko ku-mongaha.

Sal napnasiachibara Polyphemus minggipa skal adita am-bol aro boltongrangko ripee rongkolni sambao gam-bee ongaleaha. Dal-begipa, mikron rongsasangipa skalko nika Odysseus aro uni kalasirang namen aao imanbeaha, aro uamang kenbeani gimin ningtubatgipa rongkolo dongnuaha.

Polyphemus antangni do-bok aro mesrangko rongkolona moange dogacholko dal-begipa ro-ongchi donpengaha. Unon ua mes aro do-bok bimarangko sok sepmanoa wa-alko sikaha.

Wa'al ching-beani gimin skal mande agitalrangko nikaha. Na-simanga sawa aro iano maiko dakenga? ine uamang-o sing-aha. Balwa tarakgipa chingni jahasko ia chichangona man-pakbaaha ine Odysseus una aganchakaha.

Skal mamungkoba agangija bilchroke kalasirangoni sakgniko ja-o rim-e gostapaha. Unon ua uamangko ratongtonge cha-ani ja-mano ua doktao tusiaba.

Odysseus aro uni manderang namen kenbeaha. Uamang grape uamangni miterango antangtangko ipkatchina mol-molaha; indiba jokani cholko nikjaha. Odysseus Polyphemusko uni tusimitingo tonualchi jotprote so-otnusiengachim. Indiba rongkolni ku-mango donpenggipa dal-begipa ro-ongko skalna agrede pilakba jitna man-jawa ine gisik ra-e ua uko so-otjaha.

Walgimik Greekrang kenbee sal naako sengsoe tusigija dongaha. Sal rongkolo teng-suchengon Polyphemus

chakate wa'alko sike, uni' do-bokrangko sok sepaha. Unon ua kalasirangoni sakgniko rim'e uamang-ko mepriugna song'e cha-aha.

Mepringko cha-ani ja-mano ua dal-gipa ro-ongni do-gako jite, uni mes aro do-bokrangko rong-koloniko moangaha. Unon ua ro-ongko uni biapo donpilaha aro a-brirangona uni jakrangko moangaha. Unon Odysseus aro uni manderang changgipino uamangooniko badiako cha-gen uko uni dongjamitingo chanchina a-bachengaha.

Polyphemus dongjamitingo Odysseus jokani cholko chanchina joton ka-engachim. Ja-man ki-tiko ua nam-begipa chol mingsako nikaha, ua chol mai ong'a uko da'o nikgen.

Mes nolni sepango ua jahasni maljuri gita dal-gipa manggot ge-sako nikaha. Ia dal-gipa manggotoniko Odysseus go-olko sol'e uko petchokataha. Unon ua uni ku'chotko wa'alo rakate ua go-olko donnuaha, .

Atamo Polyphemus noktangona re-bae uni do-bokrangko sok sepe wa'alko sikahaon, ua kalasirangoni sakgniko rim'e so-ote uni meatamna song'e cha-aha. Unon Odysseus je draka bitchiko jahasoniko ra-baaha uoni mitamko una on-aha aro skal uko ringe ringkuna bi-aha. Ua draka bitchiko inditan namnikaha maikai ua Odysseusna aganaha, Nang-ni bimung mai?

Unon Odysseus aganchakaha, Pilakba ong-ja ian angni bimung ong-a. Atcha, Pilakha Ongja, ian nang-ni boksis ong-gen; anga nang-ko ja-man ki-tiko cha-gen ine skal aganaha.

Unon Polyphemus draka bitchini bangkiko ringe bakau tusiaha. Ua mittale wa-seo tuaha; aro uni tusimitingo Odysseus go-olni petchok dakgipa ku'chotko wa'alo ding-ataha. Pilakkon tariman-o. ua aro uni ripengrang s'aini mikron rongsao ua go-olchi su-aha. Skal mikrake, chi kbee ua go-olko salokaha. Saknani gimin chrikbee ua Odysseus aro uni manderangko rimna joton ka'e rong-kolo chabing-bangaha. Indiba skal da'o mikgri ong-ahani gimin uamang uoni altubee jokna mau-aha. Skal saknani gimin chrikeng-

pitichim aro bakan uni songsulrangko mikrakataha, unon uamang re-bae rong-kolko duule tom-dake chriktokaha, Saswa nang-ko so-otenga?

Pilakba Ong-ja angko so-otenga ine ua chrikaha. Pilakba Ong-ja angko so-otenga ine ua chrikataiha. Pilakba Ong-ja nang-ko so-otengode, na'a maina indita gam-bee golmal dakenga? ine uamang aganaha. Pilakba Ong-ja angko so-otenga ine ua chrikatauiaha. Uan pagla ong-achim ine skalrang uko wate noktangtangchi re-angaha. Unon uamang-ko mdake togina man-rahai gimin Odysseus an-tangan ka-dingpilaha.

Indiba Odysseus aro uni ripengrang da-oba a-seloni jokkuja. Pring gipuo Polyphemus ro-ongko romtomaha aro uamang mesrang baksa ong-katna joton ka-ode uamang-ko rim-na chanchie jakko smile do-gacholo asongaha

Odysseus skal gitan chalakigipa ong-achim. Chanchibemano ua an-tangna aro uni ripengrangna jokani cholko nikaha. Ua Polyphemusni palangko dakgipa olmakrangko adita ra'e, dal-gipa mes biparangko manggitam gitam dake ka-aha. Aro ia manggitam mesrangni jatchio donggipa mes bipani ka-bako ua an-tangni manderangoni saksako ka-aha. Ua an-tanga jakni nambatgipa mes bipani dikgipa kimilo uni jak aro ja-arangko wenstipaha aro uni ka-bako kon-e tue sal najana kingking sengsoaha.

Sal naahaon mesrang gam-e mikoe cha-amna ong-katangaha. Polyphemus da-oba sabeengpitioba, mesrangni re-angahaon uarangni janggilrangko dangtape nirikaha.

Odysseus aro uni manderang mesrangni janggilo gakatama gakatja uko skal uina sikchongmotahachim. Uamang an-tangtangko mes biparangni ka-bako kaaha ine skal on-tisaba uijachim. Odysseusko ra-anggipa dal-gipa aro nitogipa mes bipa ja-man ong-katangaha. Odysseus skalko ba ion an-tangko aro uni ripengrangko mesrangni ka-bakungoniko engana.

Greekrang mesrangko jahasona moange bakbakan gataba. Unon uamang bolitarangko ra'e jahasko a-aoni on-tisa chel-aona choangaha. Chochakatna skang Odysseus skalna

inwataha aro miterang uni namgija dakanirangni gimin una sastiko on-aha ine una aganataha. Ian skalke ka-onangget-beaba. Ua chugipa a-brini kurchotko pe-e jahasko gotataha. Uan jahasni milkango ga-ake dal-begipa chipakkoreko ong-ataha jean jahasko sagalni rikamona tang-bapilataha.

Unon Odysseus ro-gipa go-olku ra-e jahasko a-souiko sipakaha. Uamang-ni bil ama dipet manderang boitar-angchi choaha aro bukan jahas kenani grio ong-e uamang jokaha.

Aro changsa Odysseus skalna inwataha; Sawa nang-ni mikronko otaha ine saoba nang-o sing-ode, uan Odysseus ong-achim ine aganbo. Polyphemus iako knaahaon rikamona re-bapilchina Odysseusko mol-molaha maikai una ka-saako mesoke dakna man-gen. Indiba Odysseus ka-dingaiaha. Unon ka-onanggipa skal dal-begipa rong-brakchi jahasko gotattaiaha. Uan jahasni ki-meni sepango ga-akaha aro jahasko gong-rakbate gitchoangna dakchakani ong-aha. Greekrang rake choangaha aro uamangni jahas ching-chetgipa chipakkorerangni kosako gitchoangaha. Cyclopsni chichang chel-ao nikgija ong-batroraaha aro ja-man ki-ko nikjasrangaha.

## SOLOMON

Solomon an-tangni pagipa Daudni pal raja ong-e singhasono gakaton dambepitchim. Uni pagipani gipin jikgipani depante Adonija minggipa raja ong-na skachim. Aro pagipani ge-etaniko mang-gijan ua an-tangko raja ine aganprakaha. Indiba jensalo, Solomon Daud rajani pal ong-skaaha ine inchroani, katchae ring-ani aro singga sikanirangko knaaha, uni adatang Adonija Solomonna kenbee kemako bi-oa uko kema ka-aha. Unikoa chalaki dake Daud rajako sangipa Abishag minggipa nitobegipa me chikko kimachi a-songko man-pana ine Solomonu uko kimna on-china bi-aha, Unon Solomon uni denggu daknirangko niksamoenba, aro pil-nipil an-tangko dekho on-gen ine uie, uko so-otsrangchina ge-ete, uko so-otaha. Una agreba Daudni senapot: aro kamalko uni pagipani tangmitingo so-otchina aganahani gimin mangkimaattokaha.

Unikoa ua Gibeonchi homko on-na re-angaha, aro bang-a manderang un baksa re-angpeaha. Ua homko ormane walo tusmittingo Jihova una mikjumango mikkang pa-e jeko ua nanga uko bichina aganon, Solomon Jihova channa ampilgija bang-bea manderangko bichal ka-na bil chu-ongjani gimin ua uiani gisikko bi-aha. Unon Solomon gimagnigipa aro an-tangnasan ong-algipako bi-gija ulaniko blahani gimin Jihova uko namnike una pilakkon on-dapgen ine ku-rachakaha. Aroba ua uni pagipa Daud gita bebe ong-e kakketo re-ruraode, uni songnok pangnan baigipa ong-gen ine ku-rachakaha.

Unikoa ua Jerusalemona pil-bae dikdiksa dongaion uni gisikko niani gita sakgni dari me-chikrang saksa tanggipa aro saggipin sigimin, bi-sako ra-baaha. Uamang indake ong-achim. Uamang apean noko dongengachim. Walo saksani bi-sa siaha, unon sigipani ma-gipa saggipinni deni tangengako nike uko cha-uaha. Pringoa uamang-ni gisepo, Tanggipasa angni de sigipade nang-ni de ine jegrikani ong-aha. Uamang Solomonona re-angon sakgnian aganaha. Badian tangenggipa bi-sani ma-gipa ukon uijaha aro uiani cholba grichim. Unon Solomon dikdiksa chanchie saksa nokolna aganaha. Tanggipa bi-sako tonualchi jatchio stonge uamang-na suale on-atbo. Uko knaon saksade rajani ge-eta gita dakchina namnikaha, indiba saggipin ua bi-sako so-otgija ua me-chiknan on-atstrangchina aganaha. Iako knaon ua bi-sani siako namnikgijagipa bi-sani ma-gipachongmot, ong-a ine uie una ua bi-sako on-atchina ge-etaha. Ia bichal ka-aniko knaoa gipin manderang aiao inmane, una homko on-mitingo Jihova mikkang pa-e una patiaha ine uiaha.

Da-o uni a-song tom-tom ong-e pilakchin bilding bildang ong-ani dongjaha. Indake ong-aniko nikon Solomon an-tangni pagipani Jihovana rikna mangsonggipa Torom Nokko rikna mangsongaha. Ua pagipani ripeng Sorni raja Hiramona watate ro-ong aro gamchatgipa aro namnangipa bolrangko on-china mol-molahaon, an-tangni ripeng Daudni depanteni an-tang baksa ripeng ong-na am-aniko nike kusi ong-bee ua uni bi-aniko on-na ku-rachakaha.



Solomon ro-ongko sol-na aro bolko den-na changgipa manderangkoba on-pachina aro antangan cha-ani aro dormahakode on-skagen ine Hiram rajako mol-molon ua on-na ku-rachakaha. Solomon bang-bea Israel mander-angko, kam ka-gipa manderangko, nitimchina Sorona watataha. Ro-ong aro bolrangko a-brion tiktak solaha aro tarigimirangko sagal gita, Joppa gita, Jerusalemona ra-baaha. Pilak sona gamchatgipa ro-ong aro bolrangko chu-soke chimongman-aha. Moseni Niamo sea gita Torom Nokko rikna a-bachengaha. Uko rikmitingon mamung atte aro ruani gam-ani birangko knajachim. Sonani, pitol aro pilak silni kamrangko Hiram minggipa Sorni mande saksu ka-achim. Torom Nokni do-gachol-rangko gongbinge dakachim. Pilak do-garango pul daka-rango sonarangko kipachim aro ganchikoba pitolniko rikachim. Sonani danilrangko aro chri goani nisanrangko aro bang-bea bosturangkon dakaha.

Uko rika matchotahaon, Jihovani Niam Sundukko ra-napbaaha. Unon Gitelni rasong gapachim aro kamalrang dangdike on-nan man-piljahachim. Aro Solomon antangni jakko de-doe Isolo bi-aha. Sal snina kingking manderang kusi ong-e Jihovako mitelaha aro uni-ja-mano songtangtangchi re-angpiltokaha.

Solomon antangna rajani nokko aro antangni jikgipa Pharaoni demechikna nokko rikaha. Ia pilak kamrangna ua a-songni manderangko drae kamko ka-ataha. Achik songo Soikarini manderang pelgni pelgitamna drae begal rim-a gita, Solomon Israel manderangoniko ia pilak kamrangko ka-draatani gimin aro pilak namgipa bosturangko ra-draani gimin a-songni raiotrangna kusi ong-beani ong-jachim. Ua man-e cha-gipa raja ong-a; gamchatgipa bosturangko gipin a-songrangoniko man-aha; antango jahasba dongani gimin sonako Opironiko ra-baachim; tangkani aro sonani silrangba ro-ong gita bang-achim. Uo gure nolrang aro sipai kotokrang bang-beachim. Uno chakol bang-dugaani gimin sal sao matchu chara mangrit-chagniko doke cha-rongachim. Ua gis-k gnanbe-gipa aro bang-bea aganme-apanirangko aganna changgipa ong-achim.

Uni man'e cha'ani aro gisik seng-aniko pilakchin knaangaha aro bang'a biaprangoni manderang re-bae niaba. Shebani raniba re-bae nieaba aro knaana bate bataniko nika ua alao inmanpilaha. Ua bang'a gamchatgipa mosla, ro'ong aro gipin gipin boksirangko ra-bae Solomon on-aha. Ua Solomon rajako mitele Jihovana rasongko on-aha.

Solomon jik sakhajalsa kimachim aro budepachibara uni jikgiparang uni gisikko 'salange ua uamang'ni olakigipa mite dakanirangko olakipaaha. Ia pilak kamrangara Jihovani nikanio-namnikgijani ong-aha. Uni gimin Jihova katchinikgipa saksako watate Jerusalemni a-palo rajani kam ka'atgipa manderangko nitimgipa Jeroboamko rim'e uni ba-rako chitchigni chite chitchikungko una on'e aganataha, Jihova Isol ma-chong chikungni raja ong-china nang-na on-aha. Ia katako knaon Solomon raja Jeroboamko so'otna am'oa, ua Egyptchi katange Solomonni sikujana kingking uano dongaha. Solomon rajani sason ka'ani a-song man'e cha'a ong'oba, aro tom-tomgipa ong'oba, manderangni an-sengani bang-jachim aro uamang chu-ongnikjachim.

## GUN GNANGGIPA

Gun gnanggipa me-chikko sawa man'a amgen?  
Maina uni dam muktana bate gamchatbatbea.  
Uni segipani ka-tong uo ka'donga,  
Aro segipao man-dapani gri ong jawa.  
Ua an-tangni janggi tanga dipet,  
Segipana nangijako daggija namako daka.  
Ua mes kimil aro mosinako am'e  
An-tangni jakrangchi namnike kam ka a.  
Ua badingani jahasrang gita;  
Ua chel-aoniko an-tangni cha-aniko ra-baa.  
Aro ua walengpition chakate,  
Noktangni manderangna cha-aniko,  
Aro an-tangni nokol me-chikrangna dakna nanga  
kamko on'a.

Ua badiaba a-bako chanchie uko breu;  
 Jaktangni bitechi ua draka bariko ge-a.  
 Ua an-tangni kang-kareko bilchi kaa,  
 Aro an-tangni jakpongrangko bilakata.  
 An-tangni badingani lab nama ine ua nie uia,  
 Walo uni toehri sija.  
 Jaktangrangko charanggaona ua snila.  
 Aro takkuriko jaktangchi rim-a.  
 Ua duk mang-giparangna an-tangni jakpako badala,  
 Ua kangalgiparangna an-tangni jakrangko snila.  
 An-tangni nokni manderangni gimin suurina ua kenja  
 Maina uni nokni mande gimikkon  
 Ba-ra gitchakchi ganata.  
 Ua an-tangna andapanirangko daka;  
 Uni gana chinani se-engipa mosina aro gitchakmrang  
 ong-a.  
 A-songni meaparangni gisepo asongon,  
 Uni segipako cholgugarango mingsinga.  
 Ua seenchipchip mosinani ba-rarangko dake pala,  
 Aro kang-kare kaanirangko badinggipana on-ata.  
 Bil aro mikkiman uni ganani;  
 Aro re-bagnigipa salna ua ka-dinga.  
 Ua gisik gnange ku-anga,  
 Aro uni sreog ka-saani niam gnang.  
 Ua an-tangni nokni manderangni ong-anirangko  
 namedake niroka;  
 Aro aratari cha-aniko cha-ja.  
 Uni dedrang chakate uko namgipa ine ina.  
 Bang-a demechikrang gun gnange dakaha.  
 Indiba na-a uamang pilaknan bata.  
 Bimang dakanagara tol-pinikanisan, aro nitoara ong-  
 gramaia;  
 Jihovana kengipa me-chiksa de-mitelko mangen.  
 An-tangni jakrangni biteko una on-bo;  
 Aro uni kamrang cholgugarango uko de-mitelchina.

## CHAUCER

Da'ororo biap damsaoni damsaona motor garichi ba matchu garichi ba reil garichi ba jahaschi altue re'na man'a. Maiba kam ghangode ba chutiko man'e rona skode altue songrena man'a.

Skango je chutini salrangko maniaha mondolini maiba rongtalgipa salrang ong'achim. Ua somoio manderang gureo gakate ba ja'achi re'e maiba rongtalgipa biapchi ba mondolini pagitchamrangoni saksani gopranchi re'achim. Mitam Palestine a-songchi inditan chel'e re'aha.

England a-songni manderang indake songreaha aro Saint Thomas a Becket minggipa mandeni gopranchi re-rongaha. Uan mondolini Archbishop ba Pamong ong'achim jena manderang uni rongtalgipa janggini gimin aro kangalrangna ka'sae dakanini gimin ka'sabeaba. Ua Isolni skako rajani skana bate dakna sikbatani gimin so-otako man'aha. Bilsianti Canterburyni dal-gipa gilja nokchi re-giparang bang'achim. Uo uamang Thomas a Becket gita ka-dong-giparang aro namgijako dakna kengiparangko ong'atna ine uamang Isolo bi'aha.

Geoffery Chaucer minggipa Englandni skanggipa dal-gipa poido serikgipa saksia ia songreanini gimin an-chingna seaha. Uko Canterbury Tales ine minga. Bilsia 1387-o April jani pring sao London songjinmani Tabard Inn minggipa alda ge-sao adita bang'a manderang tom'aha. Uamang Canterburychi Thomas a Becketni gopranchi nina aro uano isolu bi'na re'na mangsongaha.

Ia manderang kangalgiparara ba man'e cha-gipararaba ong'achim. Rajani depanteba saksia dongachim aro uan ka-dongbegipa ong'achim. Uno rikken rikken dake kni ro-begipa pante saksia dongachim. Ua gitcangkipa pulrangko de-gipa cholako krue re-angpaaha. Ua gitrangko dake ramao uarango ring'ataha. Chola tangsek ghanggipa mes nirikgipa saksia dongachim. Uo do-deni brarang dongachim. Oxford Universityoni saksia, kamal saksia,

hadinggipa saksa, a'a ganggipa saksa, aro mitam me-  
chikrangba re-angpaaha. Aro manderang sakprakprakani  
re-angmitingo golpo mingsako aganode aro re-bapilmitingo  
sakprakprak minggipunko aganode pilakan kusi onge  
sonoiko re-atgen aro biapchi name neng-gija sokgen ine  
aldako rakigipa janapaha. Re-anggiparang gimik Chaucerko  
chanchape sakkolatchi gitam dongachim. Sakprakprak  
golpo minggnigunko agane mingsotdokdok gimikgimang  
ong-achim. Indiba Chaucer uarangoni mingkolgrikbrikosan  
serikaha. Jean nambatgipa golpoko aganaha una uni  
ripengrang boksisi gita uamang aldaona sokbapilon meatamko  
on gen ine pilakan aldako rakigipa baksa tik ka-ataha.

Uamangni agangimin golporangoni mitamko segen.

## PERU ARO DO-BIPA

(Ian kamalni agangimin golpo)

Changsao kangalgipa segri saksa gnangchim. Uni sarao  
Chanticleer minggipa nambegipa do-bipa mangsa dong-  
achim. Pring sao ua kenani gimim mikrake uni jikgipana  
uni jumango nikaniko aganaha. Achak gita dakgipa maiha  
matburung uko ka-mikkenatengachim. Uni jikgipa, Pertelot  
minggipa uni kenanina ka-dingstekaha. Indiba Chanticleer  
skango je jumangrang bebe ong-baahachim indakgipa  
bang-a jumangrangko una aganaha.

Uarang kusi ong-batgipa ong-anirangni gimin aganode  
nambatgengchim ine ua aganaha. Sal naaha, seng-gnang  
Chanticleer sarao re-roroe me-rakkuko am-aha aro rongsako  
man-on kusi ong-bee uni jumangko gualaha.

Indiba sal sao ua gaorade-e re-roroe gisikmitingon ua  
walmitingo napbae, boldimrangni gisepo dongnuenggina  
peru mangsako nikaha.

Unon Chanticleer uni jumangko gisik ra-e katanggen-  
ahachim indiba peru una agane inaha; Na-a maina lat-  
nakenga? Angna kennabe; anga nang-ni ripeng ong-a.  
Anga nang-ni git ring-aniko knanasa re-baaha. Nang-ma

nang-pa angni nokon dongahachim. Nang-ni pagipa gita indita name git ring-gipako anga kuakuja. Na-a nang-ni paa gita ring-na man-ama? Ring-e niboching.

Chanticioeri chalagipapa peruui mitelnikako kuae chang-chrae uni gitokko roate, uni mikrourangko mikchipe gam'e gisikna a-bachengaha. Unon peru bildape uko gitoko bale bolgrimchi kataingaha.

Jikjakbeani gimin segi aro uni demechikrang nokoni ong-kate mai ong-a uko nike songsulrangko okame peruko rikangtokaha. Do-bipade kenbee peruui janggilo tunningo maiko dakgen uko chanchiaha.

Ka-sagipa Hujur ine ua an-tangko rim-gipana aganaha, Angara na-a ong-pagenchimode da-o anga bolgrimni sepang donga, do-bipara ianon dongkamgen uni gimin anga angni skan salosa uko cha-aigen ine an-pile rikgiparangna agangenchim.

Beben, anga uko agangen ine peru aganaha.

Indiba aganmitingo do-bipa uni ku-sikoni ga-ake bolni cheksiona gong-rake bildoaha. Do-bipako kenatani gimin, anga duk man-a ine peru mikoaha. Nangijako mang-songgijasa dakahachim aro ua bilongenode maina indake dakaha uko una agangenchim ine ua inaha.

Indiba anga changsa togiako man-aha aro man-tai-jawaha ine do-bipa aganaha. Indaken peru chalaki dakako man-skaaha.

## GRISELDANI CHAKCHIKANI

(lan poraigipani agangimin golpo)

Walter minggipa dal-gipa mande saksu Italyni Saluceso dongachim. Uni dal-a chu-sokahaoa uni raiotrang uko jik kimchina mol-molaha maikai uni man-rikgnigipa donggenschim. Uochacha rajani dongramni sepango chonbegipa gitim damsang dongachim aro raja pante ua gitimkon sikar ka-na re-ango re-pakangrongachim.

Ua gitino donggipa manderangni gisepo Janicula minggipa kangalgipa mande saksaba songdougpaengachim. Uno demechik saksu donga aro uan a-gilsako nitob:it-sranggipa. sontolbatsranggipa aro bimchipbatsranggipa me chik bi-sa ong-achim. Ua me-chik bi-sani bimung Griselda ong-achim. Uni nitogipa ong-ani kri ua gun nganggipaba ong-baaha Jensalo raja sikar ka-na re-anga, ua pangnan Griseldako niangrongachim. Aro augni manderangni namnika gita bia ka-ahaon ua me-chik bi saan angni jikgipa ong-gen ine ua gisiktango mangsongaha.

Unon ua an-tangni manderangni namnika gita an-tangna bia ka-ani salko tik ka-ataha. Da'o raja bia ka-ani salko tik ka-atahaoba, sawa uni jikgipa ong-genchim uko pilakba uijachim.

Raja bia ka-ani alanina pilakkon tariaha aro an-tangni jikgipana nitogipa gamchatgipa ganani chinanirangko tariataha. Aro bia ka-ani alaniona bang-bea mingsinggipa dal-dalgipa manderangko okamataha. Unon raja bang bea manderangko rimbite jikgipako rimena re-chakatangaha. Re-angon raja somajinmani gitim damsachisa an-tangni manderangko dilangaha. Unomiting Griselda chonbegipa noko nokni kamrangko ka-engachim. Unon ua bia ka-anina tarie re-bagipa mande jinmako nike do-gacholo chadenge nisoaha. Unikoa Griselda chi ko-na re-angaha. Uko nike raja mande jinmarangko dongdikataha. Raja Griseldako bimung minge uni pagipani gimin uo sing-aha. Apa nokningo donga ine Griselda aganchake pagipako a-palona rimbaaha. Pagipa baksa agangrikbeani ja-mano Griselda angko bia ka-na namnikgenchimma? Ine raja sing-aha.

Griselda indita dal-gipa rajako bia ka-na an-tangko namen kangalgipa me-chik bi-sasan ong-a ine chanchie jechakbeaba. Indiba' raja uko ma-manti katarangchi mol-molbeahani gimin ja-man ki-tiko uko bia ka-gen ine ku-rachakaha. Unon ua bi-sako raja jako rim-e uko hok bi-saoniko rimongkataha. Indake raja an-tangni mande-rangna na me-chik bi-sako mesoke aganaha. Na-simang

angko jekai manderara aro na simang angna je'ai ka-saachim ianaba ka-sabo.

Unon raja nitogipa bia ka-anu gandung chindungko Griseldako ganatchinataha aro da'o ua skango nitonua bate nitobatsrangahachim. Unon uamang uko nitobegipa gureo gakatale rajani dongramona rimangaha. Uano banga manderang uamangko nisoengachim Aro ua salo dala alaniko dake bia ka ataha Manderang Griseldako namni kaha aro una ka-saaha maina ua namgipa aro ka-sanungipa me-chik ong'achim. Indiba mitam manderang kangalbegipa me-chik bisasa ong-anu gimin rajani jik ong-na kraja me chanchie uko namnikjaha

Indake uamang bia ka-anu jamanu adita salanua kusi ong'e dongangaha. Aro uamang nitobegipa depante saksako manaha. Griselda segipana inditan ka-saaha aro uko manisrangachim. Uni gimin segipa, uni ka-saa aro maniara baditana kingking ong-chongmota uko nina skaha. Raja salsao jikgipana indake aganaha. Nara inditan kangalgipa me-chik ong'a, uni gimin an-ching je nitobegipa depanteko manaha ua man-rikgipa ong-na krajava aro manderang uko chonnikaigen. Uko mande so-otgipana on-atode nambatgen. Griselda manibegipa jikgipa ong'ani gimin segipani aganako dakna duk ong'oba, dukni chinko ba mamung namnikgijaniko mesokgijan an-tangni nitobegipa depanteko on-ataha. Iani adita somoirang re-angmano uamango nitobegipa demechik atchiaha. Ukoba raja apsan adatangko gita dakaha. Iano raja Griseldani mamung dosko nikjaha.

Iarango dakmanahaoba raja chu-onguiklujachim. Baditana kingking chakehika uko nangtaikuna skaha. Jamanu ua Griseldako okame aganaha Griselda anga nang-ko bia ka-aha, oe indiba nang-ko bia ka-anu angni manderang kusi ong-ja aro angnaba mamung namgni dongja maina na'a kangalsa ong'ani gimin nangni dedrangko manderajava. Uni gimin da'o na'a janihi gaudlingko oke nangni ma'a paani dongi nokona re-angpilbo. Anga an-tangna kragipa rani me-trako nangni pal rimbagen, uasa angni rani chong-mot ong-gen.



Uko knae Griselda aganaha, Atcha, iako dakna angna mamung ueng-ani dongja. Anga skango jedake dongja indaken da-oba donggen. Iako agane Griselda raniui ganding chindingko oke gana suriko ganskae pagip-ani nokchi re-angpilaha.

Un ja-mano raja Griseldara baditana chakchikgipa ong-chongmota uko niangtaikuna skaha. Indaken sal sao antangni jik gitalko bia ka-taiani salo uko rimchaksona aro salam ka-sona gita Griseldako okamaha. Una agreba bia ka-ani alanio okangimin manderangna song-e sachie onchinaba okamataha. Rajani okamatako man-e Griselda rajani bia ka-ani alaniona bara suriko gane re-baaha. Alaona re-bagipa manderang uni gana chinanirangko nioke mitamrang uko chonnikaha aro ka-dingstekahachim. Rani gital sokbaahaoa raja Griseldako antangni jik gitalko salam ka-china aganaha. Ua rani gital baksa uni adatangba re-baahachim. Mitam alaniona re-bagipa manderang rajani Griseldako indake ka-saninggija jakkalanini gimin aiao inmanaha aro mitamrang rajako ka-onangaha. Bia ka-anina tiktak tarimane manderangni alaniko cha-mitingo raja Griseldako okame singaha. Griselda, ia rani gitalara angni jik ong-na kraahama? Iara nang-na bate nitobatama?

Griselda mamung mknengani chinko mesokgijan, Oe, angni Gitel. Uasa bebe nang-ni jikna, nang-ni rani ong-na krabebejok iue aganchakaha. Aro Griselda rajana aganaha, Oh Gitel, anga nang-ko mol-mola, ia nitobegipa raniko na'a angko jedake jakkalaha uko indake jakkalnabe, maina uan ang gita duk man-gipa, kangalgipa ong-pajani gimin ang gita dukko chakchikua man-janaba donga. Uni ia aganani rangko knagipa manderang uni inditan chakchikanini gimin aiao inmanpilaha aro raja antangba aiao inmanpilaha.

Iani ja-mano raja mande jimmachiko nie Griseldana aganaha, Chu-ongaha, angni ka-sara jik, da-ode anga nang-ni ka-dongani, bebe ong-ani aro chakchikaniko nikmanaha. Unon raja Griseldani jako rime antangni

on·gimin dukranganiko uko ka·dimeataha. Ia rani gital uan an·chingni demechikaa aro ian uui adatang an·chingni depante dejakrasa ine ua Griseldana aganaha. Raja ua bi·sarangko so otjaha. Bolog minggipa songonasa uamangko watatachim. Unon raja Griseldawa nambatgipa ranini ganding chindingko ganataha aro raja skangna bate Griseldana ka·sabataha. Ia dakanirangko nike manderang aiao inmanpilaha. Indake raja aro rani uamangni janggi tangani bangki salrangko kusi ong·bee janggi tangankuaha.

---

### BAK III

### COLUMBUS

Je somoio Pathanrang India bilakgipa ong-engachim, ua apsan somoio a-gilsakni pil-sachi, Columbus minggipa, a-a gitalko nikchenggipa mande saks aatchiaha. Uan saks ba-ra dokgipani depante ong-achim. Uni ma-gitcham pagitchamrangni atchiram songa Italy a-songni Genoa minggipa song ong-achim.

A-gilsak tom-beta ine Columbus bebe ra-achim. Uni gimin ua jahas gesao gakate pangnan saliramchipakna choangaiengode India a-songona sokchongmotgen ine ua behera-achim. Uni chanchiako uororoni bang-a manderang behera-a ong-oba saksaba mikkangpara uko dakchakna tarigipa dongjachim. Portugal aro Englandba uko dakchakna jechakaha. Ja-man ki-tiko Spainni rani Isabela uko dakchakaha, aro uni ka-dongana uko mitelaha. Ua je je a-song gitalrangko nikchegggen ua biaprangni sason ka-ani bil aro nokgipa onganiko, aro ua a-songrangoniko badita man-a uni bak chikungni bak sako una on-gen ine tik ka-ha.

Bili 1492-o ua Santa Maria minggipa jahaso gakate aro un baksa Pinto aro Nina minggipa jahas ge-gniko rimbite chochakatangaha. Ua saliramchi mikkange choangna a-bachengaha Jasana kingking choangani ja-mano mi ripengrang uko manigija dake chopilchina uko duk on na a-bachengaha. Indiba ua uamangna tale agantaitaie uni ska gita chu-sokatna ku-rachakataha, aro unoni adita salrangna choangani ja-mano uamang chichang damsako nikaha. Columbus ua chichangko San Salvador mingaha. Da-ororo uko Watling chichang minga.

Uno donggipa manderang sonaniko dakgimin nachilo gananiko ganachim. Columbus uamango sing-rikkie niao ua gananirangko saliramchiko ra-bara ine nina man-aha. Uani a-selan salaramchina mikkange choanguode Indiaona

sokchongmotgen ine kinkim ka-dongsrangaha. Uamang uanoni choanguon Cuba, Haiti chichangrangona sokaha. Uano uni Santa Maria jahas dubichangaha. Uni gimin ua Spainona re-angpilaha. Aro Cuba Asiani badiaba bak ong-chongmota ine bebera-e Indiaona choangani rama gitalko nikchengaha ine bebera-aha.

Ja sni samsamang chiko songree re-bapilani ja-mano Spainni manderang uko kusi ong-bee rimchaksoaha, aro ruutgijan re-chakattaie a-song gitalrangko niktaichina una jahas ge-sniko aro pilak nanganirangko tarie aro tik ka-e on-aha. Bils 1493 ni September jao ua jahasrangko ra-e chochakattaiaha. Ianpako ua Haiti chichangona sokbaon unoni killako nitimgiparang una sokchakjae kataha, aro ua killako nosto ka-aha ine nikaha.

Ianpako iano aro gipin gipin chichangrangoba ua namen golmal aro kajia ong-ano ga-akaha. Ua kajiarangni a-selan bang-a kratcha-aniko chakchikna nangaha, aro koedi ong-e Spainona re-bapilna nangaha. Indiba gitamgipa re-angao ua Trinidadona sokaha aro South Americani rikamjoljoko ua nikataha. Brigipa chango ua Central Americani rikamjoljol choange Panamani sepang jolona sokangaha.

Columbus changbrina kingking ia a-song gitalona choangaha. Indiba ua dal-begipa a-gilsak gimikko nikaha ine mamung saloba uijachim; maina uan Indiani hak-rangoni baksa onga ine ua chauchiachim. Uni gimin North America aro South Americani gisepgriko donggipa chichangrangko West Indies chichangrang aro uno song-donggipa manderangko West Indians mingaha.

Columbus bils 1506-o Spain a songni ningo donggipa Veladoloid minggipa biapo siaha. Columbus a-gilsakna dal-bea kamko chesokatahaoba, uni tanzmitingo una a-gilsakui kragipa boksisko on-jaha. Ua je a-songko nikchengaha ua a songko uni bimungchi mangmangba mingrikigija gipin mande ja-man niktaigipani bimungchisa mingaha. Ua mande Columbusni siani ja-mano, uni nikchenggipa a-aona re-ange uani gimin dal-begipa ki-tap kingsako seaha. Uni bimung America ong-achin, aro uni

bimung gita ua dal-begipa a-ani bimungko America me mingaha.

Columbusni daka kamni gimin aiao inmanani ong-a. Una skang mande saksaba dal-gipa sagalko batsote re-angna ka-dongkujachim. Uamang sagal rikamjoljolos aadita choe nialengachim. Uni gimin mamung a-a gitalko nikna man-kujachim. Columbusan dal-gipa sagalko batsotna ka-dongchengaha. Apalbegipa sagalni nalsachi a-a gipin gnangma gri uko tiktak uigija ka-dongao pangchake ua songreangaha. Ua je ka-donganiko dake mesokangaha, uko ja-rike, ja-man ja-man a-a gitalko nikchenggiparang ka-donge bang-a a-song gitalrangko nikdapeaha. Uni mesokaniko ja-rike Vasco da Gama aro sakgipingipirangba, dakbewal gitchem chong-motan sagal rikamjoljol choaniko wate sagalni jatchiko chopretangna ka-sokaha. Skangni chasongrango Europeoni Indiaona re-bana nangode Cape of Good Hope gitasa duule chona nangachim. Indiba da-o seng-sota re-ani ramako man-e ruutgija salrango Indiaona sokbana man-aha.

## MARCO POLO

Mande uidapaniko man-oba aro aiao inmangnirangko nikoba uarangko mandeskarangna parakatjaode mamung namgni ong-ja. Marco Polo indakgipa mande ong-jachim.

1254 bilsio. Italyni Venice songjinmao, Marco Polo minggipa mande saks aatchiaba. Uni bilsil bilsil chi-sni ong-ahaoba uni pagipa aro wanggipa baksa songtangoni China a-songona re-angaha. Na-a Europe aro Asiani mapko niode chei-achi re-angaha me nikgen. Uamangni re-angani somoio Europeo donggipa manderangni jako map dongkujachim, aro re-ani ramakoba ukujachim. Sakgitani China a-songchi re-angnitingo chubegipa a-brirangko doangna nangaha aro apalbegipa agisi rangko batna nangaha aro sin-begipa a-songrangko aro diug begipa a-songrangko re-pakna nangachim. Marco Polo pil-nipil sabeuahaoba an-piljaha. Bilsil bongana kingking re-angenba China a-songona sokangaha. Kublai Khan minggipa raja

uamangko soka chakaha. Marco Poloni bilsi bilsi kolgrikni ong'aioaba sapbegipa pante ong'a ine nikani gimin uko noktango rakiaha. Ruutkujaon Masco Polo bang'a kusikrangchi aganna changani gimin Kublai Khan rajaku dakchakbena man'aba. Raja uno India a-songchi aro gipin gipin a-songrangchi watate uachin bang'a kamko chusokataha. Rajani nokona sokpilon je je songrangko nikaha, manderang maikai donga, maiko badinga, chirang, a-hrirangko, pilakkon rajana aganrongachim. Raja knaua sikbeani gimin aro ua pante bimchipgipa ong'a ine nikani gimin uko dal-nikaha aro bang'a gamchatbegipa bosturangko ong'e uko man'e cha'ataha.

Songtangko wata intaltal bilsi kolgrik gitam re'angani ja'mano Marco Polo songtangchi re'angpilna sikbeani gimin raja uko watataha. Kusi ong'e pagipa aro wanggipa baksa songtangchi sokaugaha indiba bakrang aro ripengrang uamangko uijaha. Angan Marco Polo ong'a aro iarang angni pagipa aro wanggipa ong'a ine Marco Polo aganbeoba bakrang aro ripengrang jechake togigiparang ong'a ine chanchitokahachim. Togigiparang ong'a ine uiatna man'na gita uamang alaniko dake songni manderangko okamtokaha. Manderang kusi ong'e re'bae cha'aha indiba uamangni agana katarangko beberajachim. Uamang gamchatbegipa ganani chinanirangko aro gamchatbegipa bosturangko mesokoba manderang jechakangkuabachim. Ja'man ki tiko sakgitaman antangtangni songtango gangimin. chongmotan je je bararangko re'angmitingo ganaha, uarang suri ong'ahanba uarangko gane chine mesokon ong'chongmota ine uike bebera'aha. China aro India a-songrang lakni lak manderang donga aro gamchatbegipa bosturang bang'a ine uamangni agana katarangkode beberajarang'aha. Chasongtangni manderang uni agana katarangko beberajawa ine Marco Polo uia indiba gipin chasongni manderang uiaa man'na gita pilak nikgiminrangko aro uigiminrangko seriktokaha.

Marco Polo budepa ong'e siangaha indiba uni serikani-rangko manderang rakitokaha. Ruutani ja'mano manderang uibatroroange Marco Poloni seanirang bebe chongmot ine

uiaha aro mitam manderang China aro India a'songrangchi  
 re'angon dakchakaniko man-beaha. Marco Poloni atchiantai  
 bilsu 760 re angahaoba China a'songni manderang uko gualkupa  
 batesa gisik ra'ataniko songe uko dal-nikengpiti. Aro da'ona  
 kingking a'gilsako donggipa leka pora man-gipa manderang, je  
 jatba ong bo, Marco Poloko mitelengpiti maina uni serikario  
 bang'en namgniko man'aha

## VASCO DA GAMA

Columbus saliramchi choange India a'songko nikaha ine  
 Portugalo donggipa manderang chanchiaha. Uni gimin  
 chinga salaramchi choangode India a'songona sokanggen ine  
 ka'dongsoaha.

Diza minggipa ka'dongbegipa kalasi saksa Portugaloni  
 salgipengchi choange Africa a'songni salgipengni ku'chotko  
 nikahaoba uko batna kenani gimin Portugatchina choangpilaha.  
 Ua somoio manderang chel-beachi choangna kenbeachim maina  
 chirangko name ukujachim aro chel'achi choangode haida,  
 a'songtangona chobapilna amjanaba donga ine chanchie  
 chel-gijachisan choangrongachim.

Indiba Africa a'songni ku'chot donga ine Diaz nikmanaha,  
 uni gimin Africa a'songni salgipengni ku'chotko bate salaramchi  
 choangode India a'songchi sokgen ine Portugalni raja, King  
 Emmanuel minggipa, chanchibeachim. Uni gimin King  
 Emmanuel jahas ge'gitamko name tarisoe uni ripeng Vasco da  
 Gama minggipa dal'gipa mande saksana on e Indiachi choangbo  
 ine ge'etaha.

Jekai Columbus baksa choanggipa kalasirang kenbeahachim  
 indaken Vasco da Gama baksa choanggipa kalasirangba  
 kenbeahachim Indiba Vasco da Gama kenmangija salgipengchi  
 choangen choangen adita ruutani ja'mano Africa a'songni  
 salgipengni ku'chotko batange Cape of Good Hope' ine  
 mingaha, maina uko batna man'ani gimin India a'songchi  
 sokangna man'gen ine ka'dongani gnanng Ua Africa a'songni  
 salaramni sagalona sokangahaoa mikka wabeaha aro balwa

balbeahani gimin jahasrangko gimaatgen ine chanchipile, Songtangchi pil'bo pil'bo ine kalasirang kenbee Vasco da Gamako mol'molaha. India a'songni a'ao angni ja'ako ga-kujana kingking anga an-piljawa ine Vasco da Gama agancha kaha. Unon kalasirangni gisepe uko so'otna tik ka'ahachim indiba uamangni mangsongako uie uamangko silchi ka'e an'tangan pilak kamrangko ka'aha.

Indake uamang Indian sagalona sokange Africa a'songni dal'dalbegipa songjinmarangko nikaha aro adita salrangni ja'mano India a'songona sokangsrangaha. Uamang India a'songko nikani gimin mairongpile kusi ong'beachim aro Isolko mitelochim. Uamang India a'songo donggipa Calicut minggipa biapona sokaha aro Calicutni raja baksa Vasco da Gama ripeng dakna joton ka'ahachim, indiba ua raja namgijagipa mande ong'achim, maina Vasco da Gama una bang'a boksirangko on'e ua boksirangko ra'chakoba ja'mano uko aro uni kalasirangkoba so'otna joton ka'beachim. Aditani ja'mano Vasco da Gama India a'songko wate a'songtangchi choangpiloa, King Emmanuel uko ra'chaksoaha aro uko mitelbeaha. Cape of Good Hopeko batchenggipa aro sagalko choachi India a'songona ramako nikchenggipa ine Vasco da Gamako mingsingaha. Aro bilsil ritchabrina bate re'angahaoba, da'ona kingking uko mingsingengpiti.

## MAGELLAN

Sebastain Del Cano a'gilsakko chowilwilchenggipa mande ong'achim. Uko re'dilgipa Ferdinand Magellan ong'achim. Uamang bilsil 1519-ni September jani 20 gipa salo Spainoni saliramchipak chochakatangaha, unon bilsil 1522 ni September jani 8 gipa salo salaram gita chobae sokbapilaha. Gimik bilsil gitam ong'na sal chiganisan nangaiaha. Uamangni chochakat-mitingo jahas ge'bonga aro mande sakritchagni sotsni ong'achim, indiba chobapilon jahas geta aro mande sakchichetsan ongaiaha. Magellande ramao siaha aro uni pal Del Cano dilgipa ong'skaaha.



An-ching uamangni re-angmiting somoini gimin on-tim chanchikuna hai Columbusni songreani ja-manoba Spainni raja saliramchiko re-ange India a-songko nikna man-gen ine bebero-engpitchim. Uni gimin ua bebe ong-ama ong-ja uko uina man-na gita Ferdinand Magellanko watataha Magellande Spainni mande ong-jachim, Portugalni mandesa ong-achim. Ua changsa Vasco da Gamani re-a gita India a-songona re-angaha. Columbus saliram gita choe India a-songko nikna man-jaha ine Magellan nike uko dake nina re-chakataha.

Ua South Americaona ka-dongbee choangaha. Saksaba South Americani ku-chotko nikkujachim aro uko bate re-na man-genma man-jagen pilakba uikujachim. Uni kalasirangoni mitamrang uko ka-onangaha aro jahas ge-sade pil-rikaha. indiba ua dondikgija re-anguaha Ua salgipengni sagal rikamrangko nikangaha aro ja-man ki-tiko chirara bangbang dakgipa biapko nikaaha. Ua gita re-angna mangen ine chanchie ua choangaha, indiba uan dal-gipa chiblmasa ong-achim. Ua pil-bataie apchonbee jokgipa aro dare ta-rakgipako choangaha. Balwa ta rakana kene uni kalasirang sinasipilachim, indiba uade kenkujachim. Ua kengiparangko ka-dongate apchongipa sagalko choanguaha Ja-man ki-tiko uamang apalbegipa sagalona sokangaha Ua sagalni chi tom-tombeani gimin Magellan uko Pacific Ocean mingaha Ua chiapgitokko re-na nangachim. Ia chiapgitokko ua an-tangni bimungchi mingaha, chong-motan uko Magellan Strait mingaha. Ua chiapgitok gita South Americako batna man-aha. Uko chobatna sal kolatchichet nangahachim uni gimin uni kalasirang kenna krara ine chanchina man-a. Magellan a-gilsakni adhako re-duulaha. unon ua Phillippine Islandsona sokaha. Unon ua ua chichangrangni manderang baksa dakgrikao siaha. . . .

Magellanni siani ja-mano Del Cano dilgipa ong-e chodilanguaha. Balwa ta-rakoba, chi pokpekoba song-tangchina mikkangengaha ine ka-donge ua choangaha. Vasco da Gamani India a-songona re-bagipa Cape of Good Hope gita uamang re-bapilaha. Unon songni manderang Del Cano saliramchepak choange salaram gita chobapilani gimin a-gilsak

tom-betchongmota aro Del Cano uko re-duulaha ine bebera-aha.

Bang'a manderang Magellan gita a-gilsakko chowilwilna joton ka-beaha aro bilsil sotbongani ja'mano Sir Francis Drake England a-songoni a-gilsakko re-wilwilaha.

## JOAN OF ARC

Henry VI rajani Englando sason ka-mitingo Englishrang Frenchrang gi gisepo dakgrikani ong kataha. Dakgrikna a-bachengon Englishrang Frenchrangko amaha. Frenchrang amako man-engon Joan of Arc minggipa ka-donggipa French me-tra saksa Frenchrangko jokatna dakchakna gita dakgrikani a-baona napbaaha. Joan, Jacques De Arc minggipa saksa game cha-gipani demechik ong-achim. Jacques De Arc Lorraine minggipa a-briraragipa a-songo songdonggipa ong-achim. Joan ua a-brirango, mse aro gipin gipin jillanirangko mobae nirikrongachim. Joan manderangko ua biapo grongrongachim. Uni gimin ua saksan ong-rongbatachim. Joan namen tom-tomgipa me-chik bi-sa ong-achim. Gitimni olakiram noko bang-bata somoion uko nikrongachim. Miteni bimangrang pangnan uni mikkango chadenge, un baksa agangrikenga ine ua pangnan chanchirongachim. Ua jolni Frenchrang gisik sronggipa aro aganme-aparangko bebera-ninggiparang ong-achim. Samtangtangchini gitimrango donggipa pilak manderangan salgini sagre aro mite chongiparang a-aona ong-onbae Joan baksa agangrikronga ine bebera-achim.

Joanni bilsil bilsil kolgrik ong-on sal sao ua jumang mingsako nikaha ine uni pagipana aganaha. Jumango ua aiao inmangipa teng-suako nikaha, aro uoniko ku-rangko knaaha. Ua ku-rang, Frenchko man-rikngigipa raja pante Dauphineko dakchakchina uko ge etaha, aro un baksa sakgni sagreni bimangrang uni mikkango mikkang pa e, uko ka-donggipa aro aiao inmangipa ong-china uko ku-patiangaha. Ua nikaniko nikani ja-manoba ua pangnan uandakgipa bimangrangko nikrongachim, aro

ku'rangkoba knarongachim. Ua Dauphineko dakchakchina. Isol uko ge'etaha aro watataha ine ua ku'rang una aganrongaha.

Joanni pagipa ia pilak jumangrangko bebera-jachim. Joan pangnan roaiani giminsa iarangko chanchironga ine ua chanchiachim. Kam gri salko re'atana bate, dingtangmancha maiba kamko ka'e pangnan ja'gitdotchajaode namgen ine chanchie, Joanni pagipa una dingtangmancha kamko tik ka'e on'na mangsongaha. Ia salrangni adita ja'mano, Dauphinni adita bobilrang ua gitimko batsotangengachim. Uamang ua gitimona re'bae, Joanni olakiram nokko so'aha, aro ma'manti duk ong'anirangko dakaha Indake dakako nike ku'rangchi uko ge'etsogimin gita Dauphineko dakchakna ua gisiko mangsongrangaha. Raja ong'aona kingking Dauphineko dakchakchina da'o ua apsan ku'rang Joanko ge'etanguaha. Bodriko minggipa mande saksachina ua re'angchengna nangachim. Pagipani beng'ako maniglja Joan sal sao an'tangni wanggipa baksa ua mandeona re'angaha. Uni wanggipa garirangko dakgipa ong'achim. Joanni pilak jumangrahgo ua bebera-gipa ong'achim. Sakgnian Bodrikona mikkang pa'caha. Indiba jensalo Bodrikoni dangdike ong'gipa manderang una Joanni katako janapaha, unon ua ka'dingna skako dontongna man'jaha, maina ramram samsam me'chik bi'sa mangmang French a-songko jokatna man'genma? Jeba ong'chong ja'man ki'tiko ua Joanna gure mangsako aro un baksa re'chapchina mande sakgniko on'aha. Joan me asani ganding chindingko gane re'chakataha. Joan re'ange Dauphineko grougeaha. Bobilrangko ame Rheimsni singhasono asong-atna Dauphineko dakchakchina uko watataha ine ua an'tangko uiataha. Aroba Joan gilja nok te'sao namen guchambegipa touual mangsa donggipachi dakgrikgen ine aganaha. Iana skang pilakba ia tonualni gimin knakuiachim. Indiba sandie nioa, ua biapo ua tonualko man'aha Uarangko nike Dauphine Joanni katarangko bebera srangaha aro uni sipairang-ba bebe ra'e ka'dongatako man beaha. Uachin Dauphineni bodilrangde Joanko skal me'chik ine chanchie namen ka'donggija ong'aha, maina uamang gokagipa aro agangitchiarangko bebera-gramaigiparang ong'achim.

Joan rongchinggipa posakko tarie, kang-kareo tonualko kee gure mangsani kosako gakataha. Ame kusi ong'ani katarangko segimin nisan ge-sako mikkango done channa ampilgija sipairangko rimbit, Joan Orleans songjinmachina mikkange re-chakataha. Unomiting Orleans songjinmako Englishrang ame rim-gope chipchangengachim. Indiba rim-gopenggipa Englishrangko Joan dakgrike uamangni bobilko dim-demataha, aro neng-mangijan ua songjinmao ua napna man-aha: Ua somoi intal uko Orleansni me-tra (Maid of Orleans) ine mingaha.

Ua me-chik bi'sani rongchinggipa bimangko nike Frenchrang namen an-saoaha. Bobilrang kena napahani gimin Joan ua songjinmao neng-mangijan napna cholko man-aha. Songjinmaona napango cha-ani grie okkrie sinasienggipa manderangna cha-aniko Joan tik ka-chengaha. Ua songjinmako chipchange rakigiparangde songjinmaoni kate, unoni adita chel-ao dongaha. Joan sipairangko rimbite uamangona chaangaha. Je biapo dakgrikani bilongbatachim Joan ua biapona reange sipairangko an-saoatengachim. Joan an-tangan jang-ki ge-sako de-tomengachim; uochacha bra pongsa uko nangaha aro ua ua biapon gitilaha. Rang-san uko ua biaponiko jitange brako oke galaha. Dikdiksani jamanon nampilenba dakgrikani a-baona re-bataiaha.

Bobilrang uni gitilako nike Joan siaha ine chanchiachim. Uni gimin jensalo uko dakgrikani a-baona pil-bataiako nikaha, uko mite me-chiksa ine chanchiaha. Unon uamangni gisikrang dongtogija ong-na a-bachengaha aro gisikrang dongtojani gimin name dakgrikna man-jae ja-man ki-tiko amako man-aha. Sal gipino uamang ua biapko wate katangaha. Iani ja-manjo Frenchrang, Joanni dakgrikdilako man'e bang'a dakgrikanirango cheaha. Ja-man ki-tiko Dauphineko singhasono asongatna ine Rheims songjinmaona re-bae Joanko grongechina uko aganataha. Indiba Rheimsona re-ani ramao bang'a bobil dongani gimin Dauphine re'angna pa-sokjaha. Ua namen kenrakgipa munde ong'achim, aro ramadilo so-otako man-naba donga

ine kenaha. Jeba ong'chong ja'man ki-tiko Joan Dauphine-ko Rheimsona rimangna man'aha aro uano songjinmani mongsongbataranggipa gilja noko Dauphine, Charles VII ine bimungko ra'e singhasono asongaha. Uko mukut stikat-mitingo Joan, udi nisan gipokko ra'e rajani sepango chadengaha. Mukut stikataniko maniani ja'mano darode kam matchotaha ine chanchie noktangchi re'angpilna bi'aha. Indiba raja uko mamung dakeba re'angna watjaha aro uni na'drangna bang'a tangkarangko watataha.

Englishrang me'chik saksa mangmangna kene katangenba kratcha'a man'beaha. Uamangko dilgipa sipaini pamong Duke of Bedford saksa changgipa dilgipa ong'achim. Ua Charles VII ko ma'manti cholchi dondikatna a'bachengaha. Uni gimin Joanko uni sambao rakiangkuna nangaha. Joan dakchakangkugenchim, indiba ua skangrango gita, ge'etgipa ku-rangko rongtale knajahachim. Uni a'selan Frenchrang skang gita dakgrikanirango amongjaha, aro uamang Joano bebe ra'na man'angjaha.

Ja'man kitiko Joan an'tangni tonualko pe'e galaha. Un baksa Joanni bilba re'angpaaha ine manderang aganna a'bachengaha. Compiegne songjinmako rim'mitingo uamang baksa dakgrikpae Joan bil ama dipet Frenchrangko dakchakna joton ka'aha. Indiba French sipairang dakgrikani a-bao uko saksan gale kataha. Unon bobilrang Joanko rim'gittange ra'angaha.

Englishrang uko bang'a tangkachi breaha aro uko Rouenchi rimange patoko chipaha. Ua skal me'chik ong'a ine uamang chanchie, ua so'otako man'na kraama kraja, uani gimin uko bichal ka'na a'bachengaha. Uni bilsil bilsil kolgrik sa ong'kujaoba aro ua ukiilni dakchakaniko man'na kraoba una indagipa cholko onjaha. Ua mamung saloba me'asani ganding chindingko gantajawaha aro Satansa una jumangko mesokaha ine uamang ma'manti cholchi uko ku'rachakatna joton ka'aha. Uko patok noko donge atam pring ruti dotgni mangmangko cha'e janggi tanga gimikko re'atna nangen ine agane una kragija sastiko on'china hukumko on'aha. Uko bilsil samangna patoko done uko slitingchi kae bichal

ka'taitaiaha. Ja'mano Englishrang uko Rouenni Bazar antidamo we alchi so'e so'otaha.

Frenchrang mairongpile mitelskagijagiparang ong'a, an-ching uko uina man'a, maina bang'a salon pil-nipil Joan an tangni janggi tanganina simsakgija Frenchni rajako bang'a a seloniko jokatahaoba, indimangba raja aro uni montri-rangoni srksamangba uko bichalo uni janggiko jokatskana joton ka'gipa dongjaha

Dauphineni orto rajani depante dal'batgipa, singhasonko man rikgnigipa.

### NAPOLEON BONAPARTE

Napoleon Bonaparte Franceni mingsingbatgipa raja saksa ong'achim. Napoleon 1769 bilsio Corsica minggipa chichango atchiaha. Uan Franceni ukil saksani depante ong'achim. Englandni rajr George III ni somoio Uni janggi tangani salrang ong'achim. Napoleon namen changbegipa sipai pamong ong'achim. Uni bilchin Frenchrang ruuta salna kingking an-tangtangni bilakani aro mingsinganiko komiatgija rakiaha aro bang'a gipin a-songrangko ame, dokol ka'e ka'sne ka'sne dal'roroangna a'bachengaha Indiba ua an-tangan uandake dal'roroang-aniko on tisaba chu'ongnikjaha. Ua Badita a-songrangko amrroangaha, inditan amrroangna skani gisik ong'katangrroaha. Ja'man kitiko ia namgija skanian uni ga akan a'sel ong'aha. Ua jerangko ame man'ahachim ua a songrangkoba ua gimaatangpilna a bachengaha.

Rani Marie Antonetteni sason ka mitingo Franceo rajotrang bobil onge chakataha. Unomiting somoio Napoleon sipairangni dolo ramram kamko ka'gipasan ong'engpichim. Indiba uni budhi aro chalakichi ua bobil onge chakatgipa rajotrangko bamamatani'o pilak manderang uko niksengna a'bachengaha Untaltal ua ka'sne ka'sne bil gnanggipa ong'roro-bauha aro ka'sne ka'sne bang'a dakgnikanirango chena a'bachengaha. Ja'man kitiko ua Franceni sipai dol gimikni dilgipa pamong ong'aha.

Ua somoio Englishrang aro Frenchrangni gisepo dakgrikani ong-engachim; uni gimin Indiao Englishrangni man-gimin a-arangko dokol ka'e ra-na skani gisik Napoleono naaha aro Indjachina re-bamitingo ramao Egypt a-songko ra-seke ra-na mangsodgaha. Indake mangsonge ua salsao sriksrik France a-songoni sagalni ramako re-chakataha. Indiba ua sokangrangjaha, maina uni sipairangko rimbite Egyptona re-angenggipa dakgrikani jahasrangko Englishrang gimaatha. Ua Indiaona kingking re-bana man-jaha. Ja-man ki-tiko Indiako amna ka-donganiko wate ua songtangona re angpilon uko raiotko sason ka na ku-monggrikgipa dolni skanggipa dilgipa dake donaha.

Bilsi gipino us dakgriktaie Italy a-songko amaha. Uni ja-mano uko Franceni raja ine mukut stikataha. Ka-sne ka-sne ua bang'a a-songrangko ame dokol ka-anguaha aro Europe a-song gimikko ong-nasipile a-songrangko bamataha. Amako man-gipa a-songrango an-tangni ma-drangni ba ripengrangni giseponiko seoke sason ka'ani bilko on'e pilakkon an-tangni bilni ning'o rakisrangaha

Napoleon Franceni raja ong-ani ja-mano ruutgijan Englandko dokol ka'na mangsongaha aro Bologne songjinmao bang'a dakgrikani jahasrangko chimonge, uko dakchak-nasigipa Spainni dakgrikani jahasrangni re-baako nisengsoaha. Indakmitingo sakhajalni hajal English manderang a-song-tengko jokatna sipaini dolo skatang napaha. Mingsinggipa Nelson bang'a dakgrikani jahasrangko ra'e, Frenchrangni dakgrikani jahasrangko ja-rikbaaha. Ua Trafalgar chichangni sambao France aro Spainni nangrimgrikgipa dakgrikani jahasrangni dolko grongeha English mande sakprakan, an tangni dakna nangni kamko chu-sokatgen ine England ka-donga, ia mingsinggipa katarang gnanngipa nisanko de'doe ua bobilrangko channa a-bachengaha. Spain aro Franceni nangdim-gipa dakgrikani jahasrang gimik ge'sotbri ong-achim. Indiba Englishrangni dakgrikani jahasrang ge-kolatchi gitamsan ong-arachim. Britishrangni dakgrikani jahas dolgni gnanngchim. Dolsa Nelsonni ning'o aro dolgipin Collingwoodni ning'o ong-achim. Nelson, Victoria minggipa jahaso aro Collingwood Royal Sovereign minggipa jahaso donge dakgrikaha. Adita

ruutana kingking bilonge dakgrikani. ong'aha. Ja'man kitiko Frenchrangni dakgrikani jahasrang ge'chisku Englishrangna bamna ku'rachakaha aro bangkirang amako man'e choangpilaha. Nelson dakgrikani somoio janggi signi be'enni bako bilonge matako man'aha aro ammiting somoi tiktakon ua janggi galaha. Indiba Englishrang ia chio dakgrikao jedake amaha samsachi uamangko dakchakgipa Austrian aro Russianrang Australizt songjinmao amako man srangaha.

Prussia aro Astria a'songrangko amani ja'mano Napoleon an'tangni jonggipa Josephko Spainni singhasono asongataha. Indiba Spainni manderang mamung saloba Napoleonna bamjana gisiktangtango mangsongaha; aro ruutgijan uni kosako bobil ong'e chakataha. Portugal a'songni manderang uamang baksa nangrimpaaha. Englishrang uamangna dakchakaniko watataha. Indiba Napoleon pilak chakatgiparangkon tom'tom ong'e bamataba aro uni jonggipako raja ine manichina Spainni mander-angko draataba. Ia somoio Napoleon an'tangni bilni chubatsranggipa biapo ong'achim. Ong'bebeanio ua da'o Europe a'song gimikni kosako sason ka'engachim. Indiba manderang ka'sne uko namnikjana a bachengaha. Pilakna skang Russia uni ge'eta gita dakna jechakchengaha.

Napoleon sak lakbrina bate sipairangko rimbite Russiachi re'angaha. Ua sipai dolni bimung Grand Army ong'achim. Moscow songjinmaona kingking re'ange ua a'songo mande gri ong'ako nikaha. Je somoio ua songjinmao napaha tiktak ua somoion Russiarang ua songjinmako wa'alchi so'e gimaatsrangaha. Ua gimagimin kamgimin songjingako bakan wate re'anggija sin'kariona kingking uno senganguaha. Uan uni namen gualbeaniong'achim. Ua a'songo sin'kari namen bilonga. Re-brapilmiting somoio. sin'ani gimin Napoleonni sipairang sakhajalni hajal siaha Russiararang samtangtangchini srik srik chadrap chadrape banga sipairangko gimaataba. Uandake ua kenbegni dakgrikna songreanio sak hajalsot-bonga sipairangko gimaataba. Napoleonni indake gima-aniko nike gipin gipin jatrang uni kosako chakatna ka'dongaha Leipzig minggipa biapni dal'gipa dakgrikano



Napoleon amako man'aha. Ua dakgrikanio bang'a jatrangan nangrimgrike dakgrikani gimin ua dakgrikanio; Jatrangan nangrimgrike dakgrikani ine mingaha. Ua dakgrikanio amako man'ani ja'mano Frenchrang Napoleonko rim-gittange Elba chichangona koedi dake patokona watataha.

Aditani ja'mano ua unoni katbae Franceona re-bataiaha Ua uni ning'o donggipa sipairangko name jakkalani gimla, uni sipairang uko namnikbeachim. Da'o unmang sak-hajalni hajal re-bae un baksa nangrimeaha. Napoleon ua sipairangko rimbite Belgiumchipak mikkange re'angaha. Unon ua General Blucherni ning'o donggipa Prussiarangko aro Duke of Wellingtonni ning'o donggipa Englishrangko bamatna mangsongaha. Ua skang Prussiarangko man'e uamangko dakgrike amaha. Uni ja'mano skel skel re'ange 1815 ni June jao Waterloo minggipa biapo Englishrangko grongaha aro uano dakgrikani ong'aha. A'gilsakni itihaso ian mingsingbegipa damsa dakgrikani biap ong'a Englishrang sulsul riting dake chadengaha; Frenchrang pilnipil joton ka'beoba uamangko chilpretna man'jaha. Dolgnichinin bang'en gimaani ong'aha. Englishrangni gamanrang aro gureo gakatgipa sipairang Frenchrangna bate komibatachim; aro uamangni sipai dolo je Belgium sipairang dongpaachim, uamang Frenchrangni dakgrikna a'bachengon, dakgrikaniko golmal ka'e, wate katangaha. Indimangba Englishrang tang-piljaha. Englishni sipai dol pil-nipil chadrapako man'oba changantian Frenchrangko warachakaha.

Ja'man kirtika Imperial Guard minggipa sipaini dolko, jean da'o dipet dakgrikkujachim, Napoleon ua dolko, walo Englishrangko rim'china hukum on'aha Ua Guard dolgni ong'e bobilko chaaha. Dolsa General Neighni ning'o chana a'bachengaha, indiba uamang bobilrangni gulirangko warachakna amchakjae katpilna nangaha. Gnigipa dolni sipai sakhajalgitamba uandaken tang-pilatako man'aha. Tiktak ua somoio General Blucherni ning'o donggipa Prussiarang dakgrikani a'baona sokbaaha. Unon Wellingtonba sipirangko bobilrangko chachina ge'etaha. French

rang amako man'srangaha. Uamangni gisepo sakhajalkol-grik gni sipairang so'otako man'aha

Napoleon rim'gitangako mane, sagal dal'gipa Atlantic jatchio donggipa St. Helena mingripa chichangona, mande grigipa biapona a'songtanganiko a'rikatako man'aha. 1821 bilsio ua chichangon Napoleon janggi g.laha. Indakesa ua ruuta bilsina dakgrika matchotaha. Pilakni itihasaoba Napoleon gita seng'begipa, changbegipa sipairangko dilgipa pamongni gimin seaniko nikna man'ja. Ua jedake mingsinggipa dakgri-kdilgipa ong'aha uandaken mingsinggipa a'songko sason ka'ani niam aro cholrangko uibegipa ong'achim. Chur'ongnikjanian uni cholonni mongsonggipa gualani ong'achim. Namgija skako chur'sokatao chu ongnikgijanian uni gimaani a'sel ong'aha.

## FLORENCE NIGHTINGALE

Na'simang sagipako sananini gimin poraiaha. Skangni chasongo man'e cha'gipa, dal'dalgipa me'chikrang, saako sanani kamko, kratcha'ani onga ine chonnikachim; indiba da'ororo mandera ako man'gipa, dal'gipa ma'drangni me'chikrang, sako sanani kamko, namen dal'gipa kam ine chanchiaha. Da o na'simang me'chik saksani gimin knagen. Uan saako sanani kamko, da'ororoni somoio dal'gipa kam mingsa onga ine channa kraaniko dakchengaha. Uui bimung Florence Nightingale.

Florence Nightingale bilsio 1820 May jani 12 gipa salo Italy a'songni Florence minggipa songo atchiaha. Ua songjinmani bimungchin, uni bimungko mingaha. Uni atchiani ruutgijan uni ma a paa England a'songo songdongna mangsonge uoni jitangaha. England a'songo uni pagipani nok te sa gnan'gachim. Bi'samiting somoio Florence Nightingale doli bebirangko kal'na namnikbeachim, aro uarang saengachim ine chanchia dake uarangko simsakbee sana dakrongachim; uarangni ja arang ba jakrang be'ode uarangko katiprongachim. Ua do'orang aro matburunrangkoba namen namnikbeachim. Uo an'tangni jilla adita do'orang aro matburunrang dongachim.

Changsaoua gureo gakate rona re'angmitingo saksa budepa mes nirikgipako grongaha. Badiaba namgijagipa me'a bi-sarang ua mes nirikgipani achak mangsako bilongen matataha Uko namatna mamung cholkoba nikjae uko so'ote galsrange uni saknaeoniko' jokatna ine mangsongaha. Indiba Florence Nightingale uko namatpilna joton ka'e nina ine uo mol molaha. Achakni ja'a be'srangkujachim. Ua uko namedake imme, kagope sane bang gija salrangni gisepon nampilataha.

Florence Nightingale noktangon leka porako skiaha. Ua ruutgijan leka porako aditan man aha. Ua bi'sa intalan sagipa manderangko sanna namnikbeachim. Uni bilsa briroroahaoba ua uni salrangko nok chongipao aro schoolo re'atrongaha. Sagipa manderangko maidake sana uko nina us songtangoni mongsongbatgipa saa sanram biaprangko re'roroe niaha. Ua saako sanram biaprangoni sangipa me'chikrangko nika namen gisik saaha, aro duk man aha; maina uamang skia man'gijagiparang ong'achim, aro unmang agre chuko ringgiparang ong'achim. Sanram biaprang namen rongtaljasrangchim Florence Nightingale sanram biaprangko nina, France, Italy aro Germany a'songrangchi re'angaha Gimikko nigope nion ua, ua a'songrango adita nama tik ka'e dakanrangko nikaha. Uni bilsa bilsa kolgrik sku ong'on ua saako sanani bidako skina Germany a'songchi re'angaha. Uano ua adita jarangsan dongaaha Indiba ua dik diksa somoion bang'a uidapani aro skidapanirangko man'aha. Pilakna skang ua an tangni nokni sepango donggipa kangal dukirangna dangdike on na aro uamangko sanna a'bachengaha. Adita salrangni jamano ua adita nama kamrango dakchakpana gita London songjinmaona re'angaha.

Ua somoimangon Russiarang baksa Englishrang aro Frenchrangni dakgrika a'bachengaha. In dakgrikanikon itihaso Crimean War, chong'motan Crimeani Dakgrikani ine mingsingaha. Russia baksa dakgrikao amako knae songtangoni manderang pilakan kusi ong beaha; indiba dakgrikani ja'mano sipairangni obostako knae pilakan duk man'aha. Mata bu a man gipa siparangko sanna aro uamangha

dangdike on na mamung tariani aro tik ka'ani dongjachim ; una agreba uamangna nangbea cha anirang aro gana chinanirangba chu-ongjachim Sagipa manderangko sanna Frenchrangni sangipa me'chikrang saksotbonga gnangchim, indiba Englishranged sangipa me'chik saksaba dongjachim.

Dakgrikani pamong Mr. Sydney Harvard us pilak sigairangko sanchina sangipa me'chikko tik ka'e donna mangsongaha ; indiba ja man ki-tiko skia man'gijagipa me'chikrangko ua kamo donode mamung uamgni ong'jawa ine ua chanchiyilaha. Florence Nightingleko ua skang intalan uiachim. Una agre ia kamko ka'na kragipa Englandni me'chikrangi gisepo saksaba dongia ine ua chanchiaha Ua Sorkarioniko hukumko bi'e Crimeani saa sangipa me'chikrangko kam ka'dilgipa ong'china, Florence Nigntingaleko mol'molaha Iana skang dal'gipa me'chikrangoni saksaba sipairangko sanna re'angkujachim.

Mr. Harvardni chitiko man na skangan ua an'tangan Scutary sanramni sangipa me'chik ong'e kamko ka gen ine uiataha. Scutaryni sangipa me'chikrangni skotonggipa dakdligipa ua ong'aha Ua an'tang baksa sangipako, sangipa me'chik sakkolatchi chetko chimongaha.

November jani chetgipa salo sangipa me'chikrang baksa Florence Nightingale sanram biapona re'angon namen misilgni obostako nikeaba. Uano us je rongtal'ganirangko aro mamung niam girirangko nikaha, uarangko aganan amsokpiljachim. Mata bu'a man'gipa sipairang ua biapo, dal'gipa kuturi ge'sao tom'dake dongachim. Uamangni gauding chindingrang an'chirachim, aro uamangni pilak ane pine tuani ba'raranga moilan gapachim. Uamangni be'enni kosako meserang aro maiba maiba jo'ongrang maldapengachim. Florence Nightingale ka'tongtangko ka'dongate an'tangni ripengrangko an'saoataha. Ua song'ram nok te sako rikataha Uano mata bu'a man'gipa aro sagipa manderangni cha'aniko tar'chakram biap dakaha. Mata bu'a man'gipa manderangni aro sagiparangni ba'rarangko su'na aro rongtale rakina ua dingtangmancha biapko seoke ra'aha. Uni manderangko sanani gimin Englandchi see uiataha.


Ua pilak sangipa me'chikrangko rimbite name tik ka'e sanani kamko chi-sokatsu amahachim. Uni ning'o banga skia man-gijagiparang gnangchim, indiba uamang Florence Nightingaleko namon mander ra'beaha, kursaba namgja katako aganjaha aro pangnaba manigija dakjaha.

. Scutaryo jadokna kingking kam ka'manoa Florence Nightingale Crimeani sanram biapko nina re'angaha. Uano sanram biaponi manderang sakritchasa uko kusi ong'bee rimchaksoaha, maina uamang iana skangan uko mitelani banga katarangko knaahachim. Scutaryona re'bapilmitingo jahaso dongmitingo ua Crimea a'songoni be'en ding'e saako man'aha. Unon doctorrang pilakan uko Balaclavachi re'angchina aganaha. Palang ge'sao tuate sipairang uko a'brichipak mikkange ra'angaha. Ia be'en ding'e saani uni janggina kenchakani ong'achim. Jeba ong'chong ua ja'man ki'tiko an'sengpilaha.

Wachi gakatani somoio Sevastopolni gaakan baksa ia dakgrikaniba matchotaha, indiba sanram biapo unomangba banga sagipa aro nom'bokgipa manderang dongengpitchim. Uni gimin Florence Nightingale Eeglandchi re'angpilkujachim. Ua Crimeani sanram biapko niroketaiaha, aro gari ge'sao gakate ua a'briraragipa biapni ramarangko biap damsaoni biap damsaona re'ruraaha. Crimeani sipairangni dongtognina ua bang'en namgniko dakaha. Ua uamangna ki'tap donchakani aro ki'taprangko poraie rochakani biapko dake on'aha. Uamang ua biapo asonge ki'taprangko poraina man'achima. Pilakan uni kamrangi gimin uko mitelaha. Sultan una onani jaksanko boksia on'aha. Moharani Victoria, Prince Albertni seokgimin gamchatgipa ripokko una on'aha. Florence Nightingaleko rimchaksona gita songtango namen kusi ong'ani, katchaani dakanirangko tarisoaha. Uko Englandona rimbana dakgrikani jahas ge'sako tik ka'aha. Indiba Florence Nightingale indake mitelanirangko rachakna namnikjaha. Manderang jedakode uko uijawa indake ua an tangni bimungko Miss Smith ine mingjee Englandchi re'angpilaha. Ua an'tangni noko napon noksamni do'ga gitasa napskaaha.

Uko nina anti sagipao uni roram bakrao tom tokaha. Indiba ua ramram samsam pilak manderangoniko mande ra-aniko ra-chakna sikkipa ong-jachim. Una mitelani chitiko sena dolsa segiparanko teokaha. Uni ripengrang una aganaha, Ua indakgipa mitelani chitiranko rachakja. Sangipa me-chikrangko skina gita dingtangmancha biapko dakokde, uan um kamni boks is ine ua changen Ua tangkako boks is on-na gita Nightingale Fundko dakna a-bachengaha. Ua Fundni tangkako maika koros ka-gen uko tik ka-na Florence Nightingale an-tangni ripengrang baksa ku-mongaha. Uachi sangipa me chikrangni skiani school damsako kuliahaha. Ua an-tangae sabeani gim in gisik sikkbeoba ua schoolni dakkilgipani kamko na-na amjaha

Ua saengomangba an tangni bil ama dipet uamangna nama skianiko on-anguaha. Ua an-tangko skang gitan an-sengpilgen ine chanchiachim Bils i 1857 o Indiao raiotrangni bobil dake chakatani ong-achima ua somoio dangdike on-na ua Indiaona re-bana mangsongaha. Indiba ia mangsongahiko chu-sokatna man-jaha. Indiba ua an-tangni somoiko indin re-atajaha. Uni nama skiani aro agananfrankchi, ua sanani schoolrang aro gipin gipin kamrangko name dakaa aro chu-sokatna man-aha. Ua sangipa schoolo poraigiparankon Nightingale ni Nurserang ine mingaha Uamang Florence Nightingaleko aro uni kamrangko jringjrotna kingking gisik ra-gen.





*Published By :*  
**TURA BOOK ROOM**  
**TURA MEGHALAYA**